

PALEMENE II 1964-1966

Afioga AFAMASAGA MAUA

**Itumalo Faaalaalafaga:**

Aana Alofi Nu.3

Filifilia:

3 Mati 1965

Faatauto:

9 Mati 1965

Lauga Faataupou:

15 Mati 1965


Lau Afioga i le Fofoga o le Fono ma le mamalu o le Palemene i ona tulaga faalupea, ua ou tulai atu e fia fai se taofi i le mataupu o lo o ua i luma o le Fono. O le a ou le toe faaalua le mafuaaga o lou teena o lenei lafo e pei ona faatuina i le vaiaso ua mavae e le Tofa a Asiata, ona ua ou lagona ua tele ona lavea mai i le tele o tootoo. Ae pau lava le upu e tasi ou te aofai ai ia mafuaaga, ou te teteina. Mo le fia faasaoina lava o le tatou taimi ma le paia o lenei Fono, ou te le toe tautala auiliili i le mafuaaga o le taua o fuafuaga a le Komiti o le atiina ae ma lo tatou Malo ma le taua foi o nisi vaega ua maua mai i le lafo na faatu aua ua tele foi ona aoga i lenei vaiaso e faamalolo ai la tatou Fono; ua leai se tauaofiaga i le Aso Faraile, a ua lava lenei avanoa mo sui uma o lenei Fono e auiliili ai le tuuina mai i luma o nei fuafuaga a le Komiti. E i ai foi lou alofaga tele i le na ia faatuina le lafo atoa ma se tasi vaega o le agaga o lenei lafo ona ou te iloa lelei o lo o tele ona taupeupe le agaga o le lafo ma le finagalo o le na ia faatu le lafo i le tulafono maualuga o lo tatou Malo ia faavae lava i a tatou talitonuga faa-Kerisiano ma aganuu. Ae ou te taofi o le a le aafia ai i la tatou tulafono lea fuafuaga ma le tulaga ua i ai fuafuaga a le Komiti o le atiina ae aua foi o i o outou aao ma le mamalu o lenei Fono le siomia lelei o aiaiga lelei ma le maeaea ona auiliili mo le puipuiga o le agai atu o nisi o tupulaga po o le toatele o le atunuu i aganuu e le talafeagai ai ma le tulafono maualuga a lo tatou Malo. O lea foi e tulai mai le agaga maualuga o lo tatou Malo ma le mea ua tatou i ai, ua matua manaomia lo tatou atiina ae faamanuiaina.

Le mamalu o le Laulau ma le paia o lenei Fono, ma le faafofoga mai o lo atunuu, o afea ea e tali ai lou manao? Ua lafo mai nei i o outou aao le Palemene; ia tulaia ane la lo tatou Palemene i le manuia o Samoa ma lona atiina ae. O le fesili, e faapefea ona maua lenei atiina ae? Atonu o i lava tatou te i ai i faataitaiga ma fuafuaga faataitai ua tuuina mai i le agaga faaaloalo o lenei Komiti. Ou te faamalu atu foi i le Fono. Pe tatou te lei oo ea i le faataunuuna o le tasi o upu a le Aposetolo o Nuu Ese? "Tatou savavali tonu i le mea ua feagai ma lo tatou Malo i nei ona po ma nei ona aso". Ou te le faatausui i le paia o le agaga o le Fono a ou te talitonu ma ou lagona e lou lava tootoo, atonu o le agaga lea e fulisia i ai lenei Maota; o le lagolagoina o nei fuafuaga a o lei oo ina saisaia faale-tulafono ma o lea ou te faapea atu ai, a oo ina faamaonia lenei fuafuaga tau le atiina ae, ma faamaonia se lafo na faatuina, po o le tuuina mai o le fesili, ua sii atu lou lima ou te faaluaina. Afai e gase ona ou tauina o lau

faaluaina, ou te faatoluina lenei mataupu e faailoa ai lou lagolagoina ma ua ou malie i lenei fuafuaga.

Ma le faaaloalo lava o au toe upu ia o lou lava taofi ua faaalua. Faafetai tele i fautuaga ua tuuina mai i luma o le mamalu o lenei Fono, ma ou te faapea atu ai, ia tatou taumafai i le paia o la tatou Fono, ia aua nei lava se lima o ni maila ua oo i ai le savaliga a le lalolagi a o lo o tatou nonofo pea ma saofafai i le mea e tasi, nei o tatou tigaina i tulituli loa a ua mamao.

Afioga AIONO LULUALII

**Itumalo Faaalaalafaga:**

Aana Alofi Nu.1

Filifilia:

10 Aperila 1964

Faatauto:

16 Aperila 1964

Lauga Faataupou:

25 Iuni 1964

Lau Tofa le Fofoga o le Fono, ma le mamalu eseeese o lenei Maota, ou te fia tautala i lenei mataupu ua gai atu nei i ai la tatou felafolafoaiga, e amata mai i le aso ananafi e oo i lenei taeao. E muamua lava ona ou fia momoli atule faafetai i le alii Minisita o Tupe, ua avea le malamalama o lana faaaliga tau tupe me mea e maua ai manatu o le Fono, ma ua mafai ai ona maua lenei felafolafoaiga e faataata i lenei mataupu, o lemea la ou te lagona e pei ona ou tulai atu i luma o lenei Fono mamalu, e i ai se mafaufauga faapea tau le poto, e taua "O le poto o le Atua o le mamalu lea," Ua faavae tonu la lo tatou Malo i le Atua lo tatou Tama e avea ma faauluuluga i fuafuaga uma lava ma taitaiina ai i lea lava tulaga lelei. Ua avea la le mataupu tau tupe ua loteina nei e peiseai o le a avea ma fuafuaga o ou manatu o le a ou faaali atu e uiga i lenei mataupu; o le mataupu lea e uiga i le pau o le koko, ma popo o lo o i ai. Ou te manatu ai e tusa ma lou tulai atu, ou te faatusaina faapea o au o se Tamaitai fai faiva, ma ua ou mafaufau la o le tamaitai fai faiva e i ai mea nei, e le o se i'a e tasi na te aumai i lona faiva, o lo o i ai figot eseeese ua mafai ona ia aumai, e i ai sea, gau, ape ma isi lava figota o le a mafai e ia ona aumai i lona faiva, a e peitai o lo o i ai le au tali faiva o le a latou filifili ia mea ma faaogaina e tusa lav ama lona manao i ai, e faapena la lau faatautauga; o le 'au tali faiva o le alii Palemia lea ma le Kapeneta, a o le au fai faiva o lo o faataata tonu i le 'au fai lauga ma e o le a latou avatua lea mataupu ma lea mataupu e faataata i ai finagalo o taitai o le Malo, o le a fuafua i ai i mea ua faaogaina i lenei faiva e pei ona ou tau atu i lenei taeao. O le mea la ua ou manatu mamafa i ai i le Tala o le Tupe, o le mea lea e tau o le leai o se tupe, po o le faale lava o se tupe, po o le lava o le faasoasoaga o le tupe, ona ou manatua ai lea se tasi lauga i le aso ananafi sa ui ma i ni kamupani mai fafo i le gaosiga o mea, e pei ona tatou tagai atu i o tatou uso i Sasae, o lo o lelei lava le gasologa o lea tulaga o le gaosiga o mea e masani ona tatou femalagai i luga o le 'ea ma silasila ifo i lo latou lafanua e le lava, a o mea ua tatou iloa, ua matua matagofie mea ua latou oo atu i ai, ona ou mafaufau ai lea; pe le tataui se a ona aumai ia mea i totonu o lo tatou Malo o Samoa i Sisifo ina ia mafai ai

ona maua ia fuafuaga lelei e le Malo o Samoa i Sisifo ina ia mafai ai ona maua ia fuafuaga lelei e le Malo mo sana tupe maua, pe faigofie ai foi ona galulue le atunuu i galuega esese e pei ona gasolo atu i fafo alo o le atunuu ona o fuafua faapea, aua e le o lava se tupe i ni galuega e maua i lo tatou atunuu ina ia mafai ai ona maua se Tupe Maua a le Malo e faatatau i ana galuega. E i ai foi nisi tagi o lo o aumai i Itumalo e faatatau i eleele; o lo o i ai le tele o eleele o lo o i le Esetete Tausi a Samoa, pe le mafai 'ea ona faia se fuafuaga e lea Komiti ina ia mafai ona tatala atu ia eleele mo le ati a'e, aua o ia mea o nisi alaalfaga po o nisi afioaga e le o lava a latou fuafuaga i mea tau eleele i lenei vaitaimi, o lea la ua i ai le manatu i lou tootoo e tau ina faaali atu ai faapea ma le ava lava ina ia mafai ona tatalaina i tua ia eleele i le atunuu aua ua tu tonu lava le Malo o Samoa mo Samoa lava, ia faigofie ai se tulaga ma maua lelei ai se Tupe a Samoa i tulaga e masani ai e fai ai lana faasoasoaga e tusa ma nei ona po i le pau o le tupe.

O le isi foi vaega o vai paipa, e peiseai o lo o lagona tele o lea foi tulaga o se mea e mafai foi ona maua se tupe a le Malo i lea tulaga tau vai paipa, aua ua ou faalogologo i le tele o tootoo ua mavae atu o lo o lavea i lea itu e oo i lenei Itumalo faavai paipa e le o lelei foi lona tulaga i le faaaogaina o le suavai, a oo nei foi ina faatu lelei nei tulaga ma o le a mafai ai foi ona tuu atu ni gutu paipa taitasi i aiga uma lava ma tuuina atu i ai ma so latou laisene e tatau ai e faatatau ai i le aumaia o le fua o le suavai ma lo latou faaaogaina, e le taumate o le a maua ai foi se tupe tele a le Malo i ia mea tau vai paipa.

O le isi itu ou te fia taua o le mea ua leva ona ou faalogo ai a e ou te lei i lenei tofi o le Itumalo e faapea. "Ia faamamaluina pulega faaItumalo ma nuu." Ou te le o malamalama nei la, e fia manino nei i ai lou tootoo, e peiseai e faatalosaga atu pe faafesili i lenei mataupu, aua ou te mafaufau foi o le tali atu lea i ia auala lelei e faatatau e tusa ma le mamalu o le faiga malo. O se tasi aso sa ou malaga i Niu Sila, sa ou malaga ai i se tasi nuu mao tua lava e igoa o Manakino, sa ou iloa lelei ai le matagofie o tulaga faapea, sa ou vaavaai i ai ma talatalanoa ma se tasi o Komiti o Maori ma faaali mai ia te a'u le tulaga o lo o fai ai, ia lau vaai i totonu o lea lava alaalfaga o tagata Maota e i ai o latou Fale Talimalo, e i ai o latou Fale Tifaga, e i ai o latou Falema'i, e iloga leleimea e tuu ai oloa gatasitasi, sa ou fesili pe ni mea ia mai le Laumua o Aukilani po o Ueligitone? Fai mai e leai o mea a le Komiti e faatatau i totonu o lenei lava mea matou te nonofo ai, ma ua maua ai lenei tulaga lelei, ona ou iloa lea, ua matagofie lea fuafuaga sa faia e le Malo i tausaga ua mavae pe ana faataunuaina seia oo mai i le aso, o le a maua ai lava le tonu lelei ma maua ai ala tupe e fai ai nuu taitasi i lea vaega ma lea vaega le Malo o Samoa i Sisifo.

O lo o i ai le mataupu lenei e le tuua i lou mafaufau e tatau ona ou tautala atu ai, e i ai nisi mea e faale fetau i ia malū ai le vai.

Faafetai atu e tusa ma le faauilavea a lau Tofa a le Fofoga Fetalai, ua ala foi ona ou tautalagia o lenei mataupu peiseai sa tautalagia foi e nisi Sui, o le ala lea ua ala ai ona ou tautala ai ai, ae afai o el a gata ai faapea, faafetai atu faatonutonu mai e tusa lava ma lenei tulaga, o

ela la ua ou faafetai atu ua lava foi lea i lou manatu. Ia manuia le fonu.

Afioga AMITUANAI VILI



Itumalo Faaalaalfaga:

Gagaifomauga Nu.2

Filifilia:

10 Aperila 1964

Faatauto:

16 Aperila 1964

Lauga Faataupou:

24 Iuni 1964

Ou te fia avatu lava le faafetai i lau Afioga a le Fofoga Fetalai

ma le mamalu o le Fonu, ona o le uiga lava o le fia malamalama, e tatau ai lava foi ona avatu ni nai fesili. Ou te avatu le faafetai ma le faamalo i le Minisita i le Lauga matagofie ua i luma o le Maota Fonu, a o lo o i ai foi ni nai mea e fia malamalama ai, ma o ia mataupu ua i le itulau e lua o le Vaega o le Lauga a le alii Minisita. I lona lima o laina i lalo e faapea le mataupu o i ai – "I le tusa o le 1,396 tone o le tupe e £94,734. O le upu lea o le "tusa" e pei e le mautinoa, o le mea lea ou te fia maua ai se faamatalaga pe a faapea e tusi ai le taimi sa faataunuaina ai ia tone o popo po o koko po o mea e tupe, e pei foi o tulaga faale-tulafono, o mea e tatau lava ona faamaonia se mea i aso e taua. Pe a tuliloa le faitauina lea ona taunuu mai ai foi lea i le laina aupito i lalo o lo o taua ai foi nisi tone o Popo e 6,816 m a tupe e maua mai ai e £49,376.10.0. o le tiute, a e a ou vaai i le Tala Faaopoopo o le Tupe na o le £30,000 le tiute o le Popo lea latou te taua ai, o le mea la lea ou te fia manao ai foi i se faamalamalama i lea itu. Pe a toe soso ane i le laina lea e i lalo i le Mataupu tau i le Koko, e faapea mai ai, na auina atu foi ia Koko e maua ai le 1,847 tone, ma ua maua ai tupe e £313,347. E tatau ona sili atu i le £30,000 le tiute o na mea a e le o taua mai i le Tala Faatatau o le Tupe pe ai se ā, aua na o le Popo lea e taua mai a e le o taua mai ai se tiute o le Koko, e fia malamalama ai foi?"

Ua fememeai foi lou manatu ina ua taunuu ifo foi i le isi laina i lalo ifo i le Mataupu tau Pusa Fai, ona o le Tala Faatatau Faaopoopo o le Tupe lea ua fai mai, e toese ai le tiute o le auina ese atu o fa'i. Sa faapea e tu i le tulaga faaopoopo o Tupe Maua, aua o lea e tu mai i i e 1,078 pusa. A faatatau foi i le 1/- i le pusa fa'i e maoae foi lava le tiute e maua mai ai, a ua fememeai la lou manatu ona o le Tala Faatatau o le Tupe lea ua tu mai ai, fai mai, e toese mai ai le £6,000 o le tiute o fa'i, a e sa ou faapea e tu i le tulaga o Tupe Maua, e fia malamalama ai foi i lona itu.

O le tulaga foi e uiga i taro, o lo o taua mai ai le molimau faapea - sa lelei foi le tau o taro na auina atu, ae peitai o a'u o se tasi tagata o lo o faatau atu taro i Niu Sila, e matua pau tele le tau, sa matua gau uma na oo lava i le Mano na gau, ae peiseai ua le fetau i le lipoti ua vivii faatasi ma taro a o taro ia na auina atu sa faaletonuga ona ua auina atu faatasi ma taro a Fiti ma ua pau ai le maketi, ua malamalama lelei uma lava i ai tagata faatau talo i lea itu. A o lea ua fai mai i i , ua faatauina atu taro i se tau lelei tele, e fia malamalama ai foi la po o le a le tulaga ua i ai, aua o matou foi e faatau taro i Niu Sila ai po ua i ai se togafiti ua fai mai e le maketi ia matou nei i tua.

Pe a oo ane fo i lalo i le Mataupu lea fai mai e fai se Faalapotopotoga o Maketi o fua o le Laualeele. O lea mataupu e fia malamalama ai, o le a le uiga o lea Faalapotopotoga po o le uiga ea o le Komiti e avatu iinei i totonu o le Maota Fono, pe fai se Faalapotopotoga mai nisi tagata mai tua, aua e eseese foi le faalogo atu i le Mataupu e pei e fou mai. O lo o taua mai ai foi faapea o le a faamaeaina i se taimi a o alu pea a tatou tualumaga o le Fono se fuafuaga ma se Tala Faatatau o le Tupe pau ma ou te fia malamalama pe ai se ā, aua o Aperila uma ai le palota e tatau ona maea, ma aumai ia matou nei lipoti matou te faitau ai muamua a o lei oo i le Fono, ma e fia malamalama po o le a le mea ua ala ai ona faatali faapea a e le muamua ona aumai, aua e le o se mea faigofie foi ma o lo o toatele foi tagata faigaluega o lo o latou galuegaiina.

Ou te fia malamalama foi i lalo ifo i ī i le mea ua traia mai ai e faapea o le mea lea ua faaititia ai la tatou Tupe teu faagaga e £352,357 pe faatatau le Tupe teu faagaga lea i le popo ma le koko aua sa sili lava ona matou malamalama pe ana tuu e se vaevae ese mai le tupe teu faagaga o le popo ma le tupe teu faagaga o le fa'i. Po o le fa'i e faatatau i ai po le tupe aofai lava lea o le fa'i ma le popo.

I le faaiuga o lo o taua mai ai e faapea o le tupe foai mai le Esetete Tausi o Samoa i Sisifo e £50,000 a e ou te fia malamalama po o le a le mea ua le taua mai ai i ī i le faamatalaga a le Minisita le tupe lea e taua mai i ī i le Tala Faatatau o le Tupe fai mai e £11,800 le tupe faameaalofa mai a le Teuga Tupe Faaagaga o le Fa'i, a ua le taua mai ou te lei maua i ī i le faamatalaga o le Lauga a le alii Minisita le tupe na foai mai e le Esetete Tausi i Samoa i Sisifo.

Ou te fia malamalama foi po o le a le ituaiga pule na auina atu ai lea £11,800 lea e taua mai i le Tala Faaopoopo lea e fai ma mea alofa a le Faaputuga Tupe lea o le fa'i po o le Malo, po o le a le tulaga, pe na pasia e lenei Maota Fono po o se Komiti foi o faia fa'i po o nisi foi fuafuaga? E fiaifia lava le agaga e faalogo atu i nei tulaga, ma e toe tasi si au mataupu lea ia malie foi le Maota, o si Mataupu lea i lalo ifo lava e faapea – O lea foi ua faamaopoopoina ai nei le Ofisa o le Failautusi Tau Atiina A'e ina ia sagai atu i le fuafuaina o la tatou Polokalame tau le Atiina A'e. Na o le fia faamalamalama po o lenei ofisa ua pasia atu i lenei Maota Fono po o ni tulaga o ni fuafuaga faapena a o a foi ni ana galuega ma faatasiga i tulaga tupe ua mafaufauina e faatatau i ai, na o le fia malamalama lava?

Ou te avatu lava foi le faafetai i le Minisita i lana lauga.

Tofa APULU MOEVA



Itumalo Faaalaalafaga:

Aana Alofi Nu.1

Filifilia:

10 Aperila 1964

Faatauto:

16 Aperila 1964

Lauga Faataupou:

24 Iuni 1964

Lau Afioga i le Fofoga o le Fono ma le mamalu o lenei

Maota Fono, ua faagaetia lava a'u e tusa ma lenei aso matagofie ma ou te fia tautala e tusa ma le saunoaga ua faataatia i luma o le Laulau a Fono e pei ona saunia e le Minisita o Tupe. E le gata la ua faamalieina lo'u Tootoo i le tuuina mai o le Tala Faatatau o le Tupe ae atoa ai ma fuainumera malamalama ua tuuina mai e le Minisita, ae faapea foi ma le faamalieina o a'u talu ai lipoti eseese ua tuuina mai i totonu o nei pepa i matata eseese e 24.

Ua saunoa sui usufono mamalu o lenei Fono i tulaga eseese e pei ona aumai malamalama i le saunoaga ma le lauga, po'o mea uma foi ua faamoemoeina e le atunuu aua se manuia, ma ua faapea foi ona auai ai lo'u nei Tootoo. O nei la moomooga uma ua tuuina atu i luma o le Fono, o lo'o faalagolago lava i le faatuatuga mautū ma le mausalī o sui usufono uma i le Palemia ma Minisita, aua o i latou ia o lo'o mataituina faamoemoeina o Samoa ma lona Malo i lona atiaeina ma le faaleleia o mea uma aua se lumanai o lenei atunuu. O le a le lava la'u tautalaga e auiliili ai lo'u matua lagona ma le faafetai i lipoti eseese ua tuuina mai i luma o le Fono e ala i le Tala Fatatau o le Tupe a le Minisita mo lenei taimi. Ou te matua faafetai atu i le mataala ma le matua apepeleina o fuafuaga uma mo le manuia o le atunuu e faavae lea i fuainumera malamalama tuusasa'o ua tuuina mai ina ia malamalama ai lenei Fono.

O la'u faafetai e faapipii faatasi atu ai ma la'u talosaga e faapea, ua tuu atu lo'u talitonuga moni ma le faatuatua i le tofa sa'o ma le tofa alofa aemaise o le tofa faamaoni a le Palemia ma le Kapeneta o le a mafai ai ona outou tauaaoina alatupe eseese mo le manuia o Samoa i matata eseese mo ē o lo'o mafatia, e faafiafiaina ai i latou ona o le tōfā ua faia ma le alofa. O la'u faafetai lea ona o vaega eseese ua tuuina mai i luma o le Fono e 24 i mataitusi malamalama, atoa foi ma fuainumera ua faatulagaina mai nei, aemaise lava lau Afioga i le Minisita o Tupe, ona o nei fuafuaga malamalama ua faamalieina ai lava lo'u lotu.

O lo'o i ai se fuainumera e tasi o lo'o i totonu o lau saunoaga o lo'o ou le malamalama ai. O lea fuainumera o lo'o faapea mai lona faaupuga, "Ma se tupe foai e £50,000 mai le Faalapotopotoga a le Esetete Tausi a Samoa i Sisifo". Lau Afioga i le Minisita o Tupe, ua mafua lo'u le malamalama ona na o le pau lava lea o le tupe ua e faatu mai i lau saunoaga ua leai sona faamatalaga i le saunoaga atoa o le Tala Faaopoopo, a'o pepa uma o lo'o i luga o lenei Laulau a Fono ua ou malamalama ai. Ou te talosaga atu ai ma lo'u faamaualalo i lau Afioga i le Minisita, se'i e faamanino mai po'o ai e ā latou lenei Faalapotopotoga a'o ai foi na pulea mai lenei £50,000 mai totonu o lenei Faalapotopotoga? Afai o le Malo o Samoa e pei o nei upu ua tusia – Esetete Tausi a le Malo o Samoa i Sisifo – aisea ua le tuuina mai ai i luma o lenei Fono le tala auiliili o tupe na maua, o tagata faigaluega ma le faagaioiga o ia galuega atoa ai foi ma tupe alu a lenei Faalapotopotoga faamoemoeina a Samoa?

E faai'u atu ai a'u upu e faapea, le mamalu e o le Fono Aoaofa Fautulafono, o lo tatou fetalitonua'i ma lo tatou felagolagoma'i o le a fai lea ma mea e maua ai le manuia pe afai tatou te galulue faatasi aua se manuia o lo tatou atunuu ma taunuu ai i se taunuuga manuia o faamoemoeina.

Ma lou faaloalo lava.

Tofa APULU PITA



Itumalo Faaalaalafaga:

Aana Alofi Nu.1

Filifilia:

3 Mati 1966

Faatauto:

9 Mati 1966

Lauga Faataupou:

7 Iuni 1966

Lau Afioga i le Fofoga o le Fono ma le mamalu o le Fono Aoaofaitulafono, e ui ina e le o nofoia le nofoaga o Tavita le afioga i le alii Palemia, tatou talosia ia lona latō i le tai, ta'ita'i e le Atua lona ulufafo atu faapena foi ona toe ta'ita'i e le Atua lona ulufale mai i lona atunuu moni. O lenei taimi i lenei tootoo, o le a aga'i tonu lava o'u mafaufauga i le lauga lenei ua tuuina mai e le afioga a le alii Minisita o Tupe mai le aso 13 o le masina ua te'a nei se'ia oo mai le aso 7 o le aso lenei o loo matamata pea i ai i le lauga lenei.

E momoli atu lava la'u faafetai i le alii Minisita ona o lenei lauga matagofie, ma lo'u lagona e le'i saunia lenei lauga i se masina e tasi, a o ni masina se tele na faavasegaina ai ma sauniuni ai mai le tausaga e 1965 i le 1966. Ua matua manino lelei lava tulaga mai le 1965 se'i tau mai i le 1966 ma le mafatia o le atunuu o loo ua tatou feagai nei. O le popo, o le koko, ma le fa'i o mea ia e tolu mo le ala-manuia o Samoa ma ona tupe maua i le pa'u e pei ona pa'u talu ai nei le afā o Samoa. O lea la ua ou maua se tasi vaega o le lauga, le vaega lea e 4 o loo i ai le laina siliva lea e pei ua mou atu ua outou le silasila i ai ma maimoa i ai le atunuu ma le mamalu o Ofisa eseese ua sola le manuia lea. O le fesili la e faapea – Pe faapefea ona tatou toe silasila i le laina siliva lea pe mafua i se a se ala tatau o le a mafai ai ona tatou toe maua faavave lea lava laina? Ona o lenei, afai o le a tapu'ao faatasi ma tatou amo faatasi lenei avega ua mafatia ai Samoa o le a māmā fua se mea.

Ona o tupe nei e pei ona faalogoina o loo nono mai ma le faaupuga mo le atiina a'e o le Malo o Samoa. O le talosaga la a nei foi e taunuu mai nei vaega tupe ona o mai foi lea o e e i ai a latou mea totino ave le ta'i fia afe a e talofa i le atunuu o Samoa e leai ni a latou mea totino e faamau ai ma mokesi ai ni mea faapea; e pei o le ala tonu lea o le agaga ma le mafaufau ia alofagia e le alii Minisita ma le Komiti, ia avanoa so o se isi o le atunuu o Samoa ua mafatia lana faatoaga ua tatau ona toina mai se vaega tupe a o ia i latou lava le aiā tatau.

Ina ne'i taunuu mai nei tupe ona o atu foi lea o i latou ia e tele a latou mea totino e faamau ai, e i ai le au mau mea ma le au fai faatoaga toto lua ona saga faula'i ai lava lea o a latou tupe ma lo latou manuia a e talofa e i le atunuu i tagata taitoatasi. Ona taunuu ai lea o le upu lea e pei ona taia ai pea taliga i le faalogo – Ua manuia Samoa i lona Malotutoatasi pe a fai o le a tatalaina i le atunuu atoa lenei vaega tupe e pei ona nonoina mai. Aua ou te lagona le upu o loo faalele i le 'ea i le Si'ufofoga o Samoa, ua manuia Samoa ma lona Malotutoatasi. Ou te faapuina i lo'u lava loto toatasi o le manuia o le Malo o Samoa o ē latou te maua tofi o le manuia lea o le Malo. A o le lautele o le atunuu e leai se manuia o i ai vagana lava le tagiilima

o loo taumafai ai ona maua sina fasi tupe e tausai ai ia atoa ma le aiga i le mea o loo alaala ai ma afio ai.

E pei o mea nei:- O vaipaipa, silasila le mamalu o le Fono o loo silafia lelei lava le paipa o loo taoto nei i le auala i le ala i Alofi Aana Nu.1 i le alu atu lea i Leulumoega, ma oute le fefe e ta'u atu ua na o se atigi paipa le mea o loo ta'atia i le auala e leai se vai o i ai. Ia silasila lelei e le mamalu o le Fono o se tasi vaega o se nuu a pe le tai ona o lea eli le matafaga e maua mai ai sina suavai, a e sa le iloa i le pogisa po o ai sa o ma faatitipa ai i le mea lena. O se tasi vaega o le nuu o loo tau puipui i ni nai maa se mea e maua ai ni nai vai e maua aai le latou ola, a sau le sami ua lepetia, o le ala lea ua ou tuuina atu ai i luma, o fea itumalo e aga'i i ai paipa ma aga'i i ai le suavai a o fea itumalo e faapologa pea. Masalo ua lima nei tausaga o loo taatitia pea nei paipa ma o le a oo foi ina pala ma toe alu ai foi nisi tupe a le Malo, a faapea o le a toe eli le paipa lea e sui leaga ua pala a e leai se mea o loo i ai na o se atigi paipa lava o i ai. E pei foi o ni faatalosaga a ni sui o lenei itumalo i ni tausaga ua mavae i le paipa lea o loo taoto i Aleisa. Ona o le agaga moni ia faaauu lea paipa e tau a ii Tanumalala, ma o le afe ma afe o tagata o lenei itumalo e i faatoaga, ma o le tasi lea vaega e maua tele mai ai le tupe tele a le Malo a o le faalavelave e leai se suavaie maua e ola ai ia tagata e toatele e fia selau o loo i ai i totonu i lea ogaelele i le alu atu i Faleasi'u e tau i Tanumalala. O lea la sa tuuina atu ai e ni sui o lea itumalo i tausaga ua mavae, ma o lea foi ua ou toe faaalua atu ma talosaga atu ai ia alofa mai o i o loo puna mai ai ala-manuia o le Malo o Samoa a o le faalavelave la o le le maua o se suavai e mau ai ma nofo mau ai se'ia oo mai aso o lona lava i'uga. Faapea foi i tulaga faa-falema'i o lea e afio mai le afioga i le alii Minisita o le Soifua Maloloina, ma o le falema'i o lenei itumalo o loo olegia pea e lo tatou Malo e oo mai i le taimi lenei.

O le fale o loo i ai i le ogatotonu o le fale lea o loo afa'afa i ai le Malo ma le itumalo. O lona lua, o le fale na fai e le itumalo e nonofo ai foma'i, a o lenei faaupuga a le alii Minisita sa i ai o Tufuga Fatu o le a faia e le Malo le isi falema'i e lua ai falema'i e tao'oto ai ma'i o lenei itumalo, e oo mai i le asō e leai se mea ua faataunuuina; o lona uiga o lona tauoleole o le itumalo lenei, ma e leai sona agaga faamaoni e tusa foi lona tulaga sa i ai nei e avea ma tamā o le Soifua Maloloina, ma o lea e tuuina atu ai faa-talosaga, a o lea foi e faafofoga mai le alii Minisita o Ulualofoaiga, ia tautuana lenei foi mafatia o loo i ai lenei itumalo faa'falema'i. O le taimi lenei ua le ofi le falema'i ma ua ave i tua nisi gasegase ma taoto ai i nisi laoa o Leulumoega a e tau savali i ai le foma'i ona o le vaapiapi. O mea uma lava ia e pei ona ou ta'ua afai o le a faataunuuina mo le lumana'i ona matua lagona ai lava lea i le faamoemoe o le Malo o Samoa ua aoga mo le ma'ave eseese o itu e fia o le atunuu o Samoa.

O le vaega la lenei e fia tuuina atu faatalosaga i le alii Minisita o Tupe, ona o le agaga moni o lenei vaega tupe e pei ona ta'ua ma ua fuafuaina faale-maufaufau aga'i atu mo le manuia o le atunuu ua le talafeagai, e laitiiti. E a pe a taumafai e nono mai se afa miliona teinane foi alu se fia tausaga o totogi a o le a vave ai ona maua ni vai pe a tele ni tupe o le a tuuina atu i fafo mo tagata Samoa o loo fai

faatoaga, e vave ai ona maua ni ala-tupe e totogi ai ia tupe.

O a'u toe upu, a malie le atunuu e tigā ona maua luga o mauga o le taimi e tasi e lepetia ai ma soloia i le malie, a e a lē malie le atunuu e tiga sina maupu'epu'e e le mafai ona talepe. O lea la e tuina atu ai i luma ma le faaloalo lava le talosaga o mea tau tupe ina ia tufatufaina mo le atunuu atoa. Ia manuia le Fono.

Afioga AUELUA FILIPO



Itumalo Faaalaalafaga:

Lepa

Filifilia:

10 Aperila 1964

Faatauto:

16 Aperila 1964

Lauga Faataupou:

25 Iuni 1964

Lau Tofa le Fofoga o le Fono, e viia le Atua i ala o mea lelei

uma. Ae ona o mataupu ua faasoloina ai pea galeuga i lenei vaiaso, ma ua amataina i le aso ua mavae, e momoli atu ai le faafetai aemaise lava le galuega tele sa saunia e le alii Minisita o Tupe faatasi ma felafolafoaiga a tootoo o le Fono. Ou te faafetai ua faaavanoaina a'u e le Fofoga Fetala, ma o le a ou tautala atu ai i ni manatu ua maua i elnei vaiaso. Ou te tautala atu ma le faaloalo ma le ava tele, afai o le a oo atu sau tautalaga ma ni ou mafaufauga mo ni mataupu ua uma ona pasi ma iloiloaina e le au fita ua mavae, faatasi ma le outou paeaiga o lo o faatasi ai nei ma lo matou foi fotuai fou mai, ona pau lava o lo tatou iloiloaina o lenei upu, o le Atiina a'e. O le atiina a'e, o lona uiga o le taumafai lea ina ia lelei tagata uma, ia lelei a tatou fuafuaga ma a tatou felagolagoma'iga i le tofa a liuliu ma fuafuaga mo le atunuu male lumanai o Samoa, ma o i tatou taitoatasi uma ua filifilia mai i tulaga faanonapo nei mai lea Itumalo ma lea Itumalo latou te fefaaliai ai o latou finagalo i mea lelei. Ou te matua momoli atu le faafetai i le alii Palemia ma le Kapeneta, mo le galuega tele i le fefulia'iga o o latou finagalo mo fuafuaga o soo se tulaga o mea lelei o le a tatou felagolagoma'i ai nei, matou te fesoasoani atu foi e avatu ni o matou taofi mo fuafuaga o le Atiina a'e. Ou te faamalu atu ai i le alii Palemia ma le Kapeneta, ma le au fita o e o lo o toe alaala mai nei, ma i tatou uma ua usufono mai, ina ia faatasi mai le Atua ia i tatou, a i ai se upu e laa ese, ia lava ona faapalepale.

O le vaega tupe e faatatau i le Falemai e i ai le faanoanoa i le taumafai e atiina a'e, ae ou te fautuaina ai le alii Minisita o le Falemai ma lona feagai ai i lea galuega, aua o le mea ou te mautinoa i le taumafai o le atiina a'e, o le tasi lea tupe tele a le atunuu o lo o goto ifo i le Falemai, o lona uiga o ma'i le togia, ma ou te fautuaina ai lenei Fono, ina ia aiaia se tulaga tatau mo lea itu o lea o lo o i totonu o le Malo tiute o le faaleleia o tagata ia maua le soifua lelei a o le faalavelave o le telegese ona totogi. O le tasi lea mea ou te iloa i le Falema'i i le tupe alu ese ona o tupe o le tausiga o le Falema'i, ou te le faaopoopo se isi mea, o lou faaloalo lava ou te matua tautala atu ai ina ua ou vaai faalua pe faatolu vae atu le Mamalu o le Fono, e lu ape tolu loli e mafai ona aveese mea ua faaleagaina mai

fea? E mai fuafuaga, vae atu le paia ua tele le soona faia o ia tusiga o le mea ou te vaai i ai i ia loli tetele, e tumu i fualaaui ua le aoga, e tasi lea faafitauli, sei taumafai e fuafua faatatau, o le tele o ia mea, o le tasi lenei tupe goto ifo.

O le Atiina a'e, pe faapefea ona tatou maua faatasi le atiina a'e? E pau lava lou lagona ol e mea moni e igoa o le atiina a'e "ia lelei ala." O le faaleleia lava o ala, o le mea moni lenei o le a maua ai le atiina a'e, te tautala i le mea sao ao lo o alaala mai le Tofa ia Asiata, ou te le tautala fapito; o le tausiga le la na sei mavae sa ou malaga ai i Savaii, sa ou taumafai ia Asiata i lana taavale, e fefe tele Asiata i lana taavale, leaga tele auala o lea nuu o Tafua, ou te le tautala faapito i lou Itumalo ma Aleipata, a o le mea moni o nei auala ua na o na amata ae leai se taunuuga, a ia manatua ua tiai ai tupe a le Malo na tuu atu e fesoasoani i le faaleleia ai o auala a ua le aoga mo e galulue i a latou faatoaga; o lea e talosaga atu ai ona o nei foi auala i lenei itumalo, ia manatua na o le faaoga lava o le tietie ai, a ia taumafai foi ona faaoga ina ia maua ai fua o le laueleele, o le lumanai lenei o Samoa ma le Malo, na le nofonofo le mea la la e i nei la Itumalo, ou te talosagaina ai le Malo, a ua ou vaai atu nei i pepa i fuafuaga e la outou Komiti o mea tau Tupe Alu, sei tautuana ma outou fai ia lelei o tatou auala, e le faapito ia auala i se itumalo ae soo se nuu lava o i ai se faafitauli i auala.

O le itu i vai paipa, ua matua ootia lava lou loto ananafi i le tootoo na saunao mai i Salafai i Faasaleleaga, ou te ioe i lea uiga, ou te fautuaina ai lenei Fono, o le mea e tatau lava ona fai, tatou faamoemoe i le atiina a'e, ia manatua, o le tasi lea atiina a'e o le soifua o le tagata ia lelei, o le tasi lava lenei mea ia sili ona taua o vai lava o le tasi lava le ala soifua, ou te lagona e ao ona oo i ai finagalo o le Fono i la tatou iloiloaina lenei o nuu ua i ai ia ituaiga faafitauli faapea; e manaia tele le vai i Palauli, sei taumafai ona ia faafesootai e tatau lava ona fai ia lelei tiute o le Malo ina ia faafesootai nuu o lo o i ai lea tulaga faafitauli o le vai e i ai Aleipata; e tatau lava ona faafesootai i se taimi vave pe a finagalo ai; o lenei Itumalo o lo o i ai le nofoaga taua mo le Falema'i, e leai lava se mea e tua i ai, e talosaga atu ai ma le faaloalo i ia fuafuaga ina ia faanatinati a faapefea ona maua o le soifua maloloina? A maua lava le vai, ia maua foi le soifua lelei i tagata, e fautuaina ai, le Malo, ia taumafai ona faafesootai ane i Lotofaga in aia tau i Aleipata i se taimi vave. Ae le gata i lea, e faapea foi i le motu i Salafai, ou te tautala tonu i le mea ua ou iloa, e mafai i le vai i Palauli ma Satupaitea ona faasoo le motu atoa o Savaii. E mafai faapefea? Pe a finagalo i ai le Fono ma sui o le atunuu e taumafai oan faalelele le motu atoa i Savaii, e 100% le mafai e ia vai e lua aua o vai malolosi tele.


Ou te le tautala e fai ma tulaga le migao i e ua mavae atu ma e sa latou iloiloaina ma le alii Palemia ma le Kapeneta atoa ma e o lo o alaala mai nei lenei mataupu ma ua pasia, a o se mea faigata foi lea ia te au le tautala i se mea ua uma ona pasia i le Tulafono pe sa faapefea ona fai, ae ui lava i lea na ona tuu atu lava o ni mafaufauga i luma o le Fono; ona o le mea ua popole i ai ona o faaaliga e avatu pea i le 'ea, o lea ua ou matua vaai ifo lava ma le matua ootia o lou loto i lenei tupeTele ua maua mai ia tatou fanau, o le £36,475, o se itu e faanoanoa ai vae lava

lo outou mamamlu i e na iloiloina ma pasia lenei mataupu e fautuaina atu ai e faapea, o lea ua ou vaai i pepa nei ua aumai o lo o i ai ni lafo faatu i lenei Mataupu a e ona o le mataupu lava e uiga i tupe, ua faaopoopo atu lenei tupe o le a fesoasoani i Tupe Alu o lenei tausaga e 1964, ou te faapea atu ai ma le vaivai lava; E a 'ea pe a malie le Fono i le Alii Palemia ma le Kapeneta ma e sa fuafuaina le tulaga o totogi o A'oga, ona o itu nei, o leitu e sili ona ou manumanu ia te outou o e o feoi i atunuu mamao, e fesagai ma le faiga o Malo ona o le totogi o aoga a Samoa. E na ona fesoasoani atu o le toeaina ia te outou o le 'au malamalama, ma e o i fafo, pe matagofie lenei mea o le totogi o aoga a Samoa? Ou te le fiasia i lenei tupe, a le mafai ea ona fai o se isi fesuiaiga faapea; ia tatau ona lafo se lafoga, a o nei lafoga e le iloa faaupu mai o tupe maua mai lafoga leiloa e sau pea nei lafoga e a pe a iloilo pea se lafoga aloaia ia silafia lelei e le Atunuu ua fai le lafoga, i lo le avatu o lenei avega mamafa; ia manatua ou te tautala lava ma le faaaloalo, o lo o faafeagai nei mea e lua o lo o aumai i le Tusi Paia, "o mea vaivai e faamaina ai mea malolosi;" e le o tulaga tutusa nei le atunuu tatou te le silafia, o le tasi lava toeaina vaivai a e na te maua ni tamaiti, o le na maua lava se taleni e aoga mo le atunuu, a o le faalavelave, o le a na le mafai oan totogi aoga mo le atunuu, a o le faalavelave, o le an le mafai ona totogi aoga a lenei tamaitiiti; e tauau la ina soli ai le tulafono a le Atua, ma faapea atu loa i lona toalua sena e, nofo ia le teine lea e tausi taua ua leai se tupe e totogi a aoga; ou te tautala atu ai ma lou matua faaaloalo ui ina ua pasia le Tulafono, a e ou te le ma lava e faaali atu lea mafaufauga; E a e ape a sui is e lafoga a le atunuu?

O le tasi lenei mea tele ua tulai mai o le Tiute a le Malo, o le mea lea ua vaai atu nei i ai, e matua £99,000 tupe ua maua, ou te le ma e fai atu, o le atunuu ua ala uma ma taumafai i le atiina a'e, a ua malosi tele le lima o le Malo, ua tago atu le Malo i le kamupani, a e tago mai le kamupani i le tau atiina a'e o le Samoa, ua tupu le Faalavelave, ua tago atu le Malo ia i le kamupani a e tago mai le kamupani ia ma luluu atu ita ua tupu loa ma le faalavelave, ua mamafa tele le mea lea ua i ai le tiute o lea ou te fautuaina ai lenei Maota sei taumafai le tiute ua malosi tele, ma ou te le tautala fua a e tautala i le mea ua ou iloa aua o au na amataina tau taro e lau i Tutuila ua malosi tele le tiute toetoe ina ta le mfai ona manava, a o lo o taumafai foi le atiina a'e ia.

Tagai foi i le tau o le popo, ou te fai atu i lou lava malamalama i ai e le taumate foi se tiute tele a le Malo o i lenei popo, o lemea lea ua alu atu nei ia matou i tua e £49 i le tone, a e ou te lagona, e tele se mea faapea foi o la foi ua tuu mai matou i i lea mea i le aumaina o popo ia malosi tele o lona uiga, ua toe luluu atu foi e kamupani lea mea mo le au fai popo, o le mea lea e talosagaina ai le Malo, sei fesoasoani mo le taumafai o le atiina a'e, a o le atiina a'e e tau titina i lalo ua le talafeagai lea e le soifua lelei ai se Samoa, na o le alu ifo ai i lalo, a o le mea tatou te mananao i ai, ia lelei ona tamalii ma ona failauga, ia lelei foi le lautele o le atunuu mo le lumanai.

Tofa FAATUPUINATI FAAVAE



Itumalo Faaalaalafaga:

Palauli Sisifo

Filifilia:

10 Aperila 1964

Faatauto:

16 Apreila 1964

Lauga Faataupou:

29 Iuni 1964

Lau Tofa i le Fofoga o le Fono ma le paia maualuga o le Fono Aoao Faitulafono, o le mataupu tau i aoga. I le vaitaimi ua mavae atu nei, sa faasalalauina ai i se Nusipepa ma lona faaupuga e faapea – "Ua faanoanoa le Malo ina ua totogi aoga" a o lou manatu, ole faaupuga sao e tatau ona i ai, "Ua fiasia le Malo." "Ma le tasi ua faanoanoa matua ina ua totogi aoga a alo o Samoa." Ona o lenei, e tele matua o Samoa e vaivai ma le maua le tamaoiga, a e tele foi matua o Samoa e maua le tamaoiga ualava lena e totogi aiaoga a a latou fanau. Na o le mea e tasi, talofa e i matua ua vaivai, e ui lava ina latou taumafai, e pau lava le mea latou te iloa, pe tasi pe lua kuata o le a mafai ona totogi o lona uiga, o le a le aoga loa a latou fanau. I le ma le tasi, o afioaga ma alaalfaga uma i Samoa sa latou taumafai ma le mativa ona o le faamoemoe, aua tupulaga o Samoa mo a taeao, ae peitai, ua avea lava lenei tulaga o le totogi o aoga ma toatuga i nai matua vaivai. O lea, e faatalosagaina atu ai le mamalu o le Fono Aoao ina ia toe liliu le tofa mo se isi tulaga, aua o Samoa o le atunuu felagolagoma'i, ma le atunuu fesilafai ma le atunuu foi fealofani. O lona lua, o le mataupu tau Auala.

Sa taua e nisi tootoo ile vaiaso ua mavae le mataupu lava lenei, ma ou te lagolagoina foi le mataupu lava tau i auala, aua ua silafia lelei e le mamalu uma o le Fono o auala i Salafai, ua na o le faafoliga mai o auala a e tele naua faafitauli o i ai i totonu o ia auala, o le mea la lea ua talosagaina ai le mamalu o le Fono ina ia faataunuuina ma faamatagofieina auala o Salafai atoa foi ma Upolu, ma ia mautinoa lelei a lelei auala o le a faafaigofieina le felauaiga o le tamaoiga o Samoa, ma o le a mafai foi ona faafaigofie ona faaulufale mai i Apia nei. O le mea lea e talosagaina ai le mamalu o le Fono Aoao ina ia faaalila finagalo o tootoo taitasi ma ia faataunuuina. O lona tolu o le mataupu tau i le Popo.

Ua ou vaai atu i le faaaliga ma le tusiga o lo o i ai i le pepa lea, ina ia lagolagoina e le Fono mamalu ina ia faia seponesi e faataata i le au sali popo ina ia faafaigofie ai ona uuna'iina o latou finagalo ma faafiafiaina, aua lesaliga o le popo mo le tamaoiga o le Malo. O le mea lea e talosagaina ai le mamalu o le Fono Aoao ina ia faataunuuina lea filfiliga aua o le a avea lena ma auala o le amafai ai ona faafiafiaina ai loto o le au sali popo, ma e le taumate o le a atili ai ona maua le tamaoiga tele o lo tatou Malo mo le lumanai. O le mea lea e matua talosagaina lava o mataupu uma e pei ona faaalila e finagalo o tootoo usufono o le Fono e i ai vai paipa, e i ai isi mataupu tau i le fa'i, ma isi lava mataupu eseese ua matua talosagaina e lou tootoo ina ia alofagia e le Fono mamalu ma ia faataunuuina. O le a gata ai i i lau tautalaga a ia manuia le Fono.

Tofa FOLASA MAAUGA



Itumalo Faaalaalafaga:

Alataua Sisifo

Filifilia:

10 Aperila 1964

Faatauto:

16 Aperila 1964

Lauga Faataupou:

26 Iuni 1964

Lau Tofa a le Fofoga o le Fono ma le mamalu o le Fono, ou te momoli atu se faafetai tele e tusa ma le lauga a le alii Minisita o Tupe ua tauaaoina i totonu o lenei Maota Fono i lenei lava aso. Ou te momoli atu foi le faafetai tele i le alii Palemia ma le vasega o Minisita ona o la latou galuega fita ua tauaaoina lava lenei mataupu ma soo se mataupu lava ua fuafuaina mo le atiina a'e o le tatou malo. Muamua o le itu tau vai, mai le aso lava na aofi ai le fono mamalu seia oo mai lava i lenei aso o lo o fautuaina pea ma tauina atu i luma o le alii Palemia ma le Kapeneta ma le mamalu o lenei Fono manao taitasi e pei ona tolaulauina o lenei lava mataupu tau i vai paipa. Ou te matua iloa lava ma lou talitonu ma lou faamaoni, o le tasi lenei atiina a'e malosi o le atunuu o Samoa o le vai paipa pe a fai o le a mafai ona maua lelei e le soifuuga ma maua lelei ai e tagata taitoatasi uma lava o le atunuu se suavai o e o le a matelaina vae atu le mamalu o le fono. O le a ou tautala loa agai i se itumalo mai Asau i Falelima ma o le mea lava ou te matua iloa tonu i totonu o lea itumalo tele o lo o i ai nei ua matua matelaina i le itu tau vai, ma e faapea o vai o lo o i ai ua saunia foi e le Malo omea tau tane o lo o i ai a e tasi le mea ou te matua avatu lava i luma o lenei Maota Fono, ua le lava ia fuafuaga o lo o i ai nei, aua ua tupu ma ua atiina a'e le Malo o Samoa i nei ona po. Ae ou te matua talitonu lava ua i ai nisi i totonu o lenei Maota Fono ua latou silafia le naumati o nei itumalo i le itu tau vai, silasila, afai o ni aso ua faapenei le la pea, o le mea moni ou te iloa i Falealupo, Tupu, Neiafu, o le mamalu o lenei Fono, o le a taumamafa i se vai faataufusi. O le mea lea e i ai lava le agaga faapenei ou te avatua faatalosaga i luma o lenei fono mamalu pe le finagalo malie ea le Susuga i le Palemia ma le Kapeneta ma le Palemene a e faaalu atu le vai o lo o i ai i Samata agai i Asau ona maua lea o le soifuuga lelei o nei itumalo tetele. Sa i ai i luma i aso ua mavae lenei mataupu tau i paipa i le taumafai atu i le va o Samata agai i Falelima ma sa maua foi se tasi tala e faapea, e fai ai faigata iina ona e fai sina vavamamao ma o le mea lava la ou te iloaitino, o lona va o lo o i ai nei ua matua tumu ua lata ina fesootai faatoaga, ma afai o le a alu atu pea le paipa seia tau i o ou te iloa, o le tasi lea ala tupe malosi a le Malo o laisene e pei ona silafia. O le mea lava lea e avatu ai le talosaga tele ma le ava i luma o lenei Maota Fono seia alofagia itumalo ua naumati i vai.

O le itu i totogi o Aoga. O lenei lava mataupu ou te tautala i ai ma le faaeteete i totonu o lenei Maota Fono, ona o se mataupu ua pasia i taii ua tuanai ma tausaga ua mavae atu e le alii Palemia ma le Kapeneta atoa foi ma le mamalu o le Palemene. Ae ui i lea, e ao ina tatou felagolagoma'i ona o se tulaga ua i ai nei lo taotu atunuu i lenei vai taimi, e avatu ai foi la se fautuaga faapenei, po

o le a se finagalo o le alii Palemia ma le mamalu o lenei Maota Fono, a e ao ina toe iloilo ma toe sasaa le tofa ma le utaga i lenei maota ona o se tulaga ua i ai lo tatou atunuu talofa e ua tagi mai ala. Ou te matua talitonu ma le faamaoni, e tele lava nisi ala o le a saunia e le alii Minisita ma le Kapeneta ma le mamalu o lenei maota, a o le auala o lo o i ai nei e ao ina alofa le mamalu o lenei fono a e taatia ia.

O le itu tau i le fa'i, mai lava i le Aso Lulu seia oo mai i lenei aso, na matua mamafa lava i saunoaga a Tootoo i totonu o lenei Maota le faafitauli ua aliali mai nei i le fa'i. O le mea foi ua ou iloa, ua matua liliu le tofa i le Minisita o Faatoaga i tausaga ua mavae i sailiiliga na fai i ni auala ma ni togafiti ina ia mafai ai ona tineia lenei faama'i ua aliali mai i faatoaga ona o le faama'i fa'i. O le mea ua ou iloa, ua matua leai lava se mea e aliali mai ai ua aoga, e tele lava nisi galuega ua fai i ai, ae le mafai ona mate ma o lo'o tupu pea le faama'i e pei ona aliali mai nei o la ua oo atu i Salafai, ma o le a toe oo mai foi i Upolu nei. O le mea lea afai o le a uma Salafai o le a toe oo mai foi i Upolu nei. O le mea lea ou te matua iloa ma talitonu i ai ma lo'u faamaoni, ua leai lava se togafiti a lo tatou Malo e fai i ai i lenei faama'i. O le mea moni lava ou te iloa ma talosagaina ai le mamalu o lenei Fono, ae a pe a tatou sii ma'i atu ia i luma o le Silisili Ese ona o lenei lava faalavelave? Aua o le mea ou te iloa ua uma le malamalama, ua uma foi ona liliu le tofa a le Minisita o Faatoaga, ua leai se mea e mafai i ai ae peiseai o lo'u lava iloa toatasi, e peiseai e sau malie pea lava, ma ua ou faauigaina faapea o se mala pe ā. Tailo i ai i le mamalu o lenei Fono, ae ou te iloa o se mea faapena, aua ua siliga le malamalama mai fafo e oo mai lava i lo tatou atunuu, ua leai. Ua siliga foi le tofa i le alii Minisita o Faatoaga ua leai lava. E peiseai la ou te iloa, e ao ina tatou tuu atu filemu i luma o le Silisili Ese e tusa ma le Faavae o lo tatou Malo lenei mala ua oo mai.

O le popo. Ou te matua iloa lelei lava le itu tau popo, o le mamalu ma le aganuu faa-Samoa o le tasi lea uunaina malosi e uunaina ai lea atina'e ona o lenei. Sa oo i le tasi aso na ou te'i lava i lo matou nuu ua tutu se tasi vaega tele o le Ofisa o Faatoaga, sa ou fesili atu i ai mamatou feiloai, ma ua oo ina matou talatalanoa i le pogai o le malaga, sa saunoa foi la se tasi alii sa ia avatua lea malaga e faapea; ua ala ona tatou feiloai ma tatou faatasi iinei i lo outou nuu, ua auina mai matou e le Malo e faapea, o lo outou afioaga nei, o lo o sili le pauna popo ia Salafai, o le ala lea ua matou o mai ai sei fai muamua le galuega a le Ofisa o Faatoaga i lo outou alaafaga o le makaina lea o Niu. O le mea lea ou te matua iloa moni lava; ia tatou galulue i le faiga o a tatou faatoaga, a ua iloa o lo o i totonu o le puipuga mamalu i tupu ma tamalii i alaafaga taitasi. Aua, afai na ona oo atu nei ia aualii ona pau lea na ona o atu e galulue faapea, a e leai so latou malosi e uunaina malosi ai e le aoga a o lou talitonu, o le pulega mamalu lava a alii ma faipule i alaafaga taitasi latou te uunaina malosi lea itu. E fai Komiti o le Eleele i masina uma taitasi ia alu i le niu e tasi e le mafai ona pau. O le mea lea ou te avatu ai i luma o lenei fono mamalu afai ua faamaonia lea lipoti ua i ai nei e uiga i faatoaga e tusa ma faiga o lo o i ai i Eleele i totonu o nei nuu ou te ioe maou talitonu o i tonu lava i le mamalu o le pulega a alii ma faipule le uluai malosi o le atiina a'e o le popo. O le mea

lea ou te avatu ai i luma o lenei fono mamalu o la tatou aganuu lava. E leai se malsimaifafo na te mafai ona uunaia malosi a tatou faatoaga, ona pau lava lea, na o le malosi ole pulega mamalu i nuu taitasi ma alaafafaga latou te mafai ona uunai atu fa'i, koko, niu, kofe mamea uma faapena i luga o le mamalu o le pulega matagofie i tupu ma tamalii i totonu o lo tatou atunuu ona atiina a'e lea o mea uma e tusa ma lo tatou faamoemoe i lo tatou Malo.

Afioga FUATAGA PENITA



Itumalo Faaalaalafaga:

Aleipata Itupa i Luga

Filifilia:

10 Aperila 1964

Faatauto:

16 Aperila 1964

Lauga Faataupou:

9 Iulai 1964

Le Fofoga Fetalai ma le mamalu o le Fono, ua ou tulai atu ou te le lagolagoina le lafo. Sa ou fia lagolagoina le lafo pe ana fai na o le tasi le vaituuaga ma totogi ai aoga a tamaiti i le tausaga. Ae le aofia ai aoga i itumalo ma aoga i Apia - o le vaega e 5 o le lafo ua fai mai ia sue e le Malo ni ala e maua ai ni tupe maua - ae pei lava o le upu - a alo mai i le mageso o le taamu - ae lavea atu foi i le salako. O lou lava taofi - o le uiga o le upu totogi o aoga - o se mea alofa a tamaiti i le Malo.

Afioga FUIMAONO MOASOPE



Itumalo Faaalaalafaga:

Falealii

Filifilia:

15 Setema 1964

Faatauto:

20 Oketopa 1964

Lauga Faataupou:

17 Novema 1964

Lau Tofa i le Fofoga o le Fono ma le mamalu o le Fono Aoao, ou te tulai e fia fai sina manatu i le mataupu ua i luma o le laulau-a-fono. Muamua ona ou fia momoli lau faafetai tele i le Afioga a le alii Minisita ona o se lauga matagofie ua outou silasila i ai ma tatou vaavaai i ai ma ua aliali mai i lea lauga ni aiaiga matagofie ua fuafuaina e le Malo. Ae peitai, e faanoanoa ona o ni mataupu faafitauli o lo o i ai i totonu o lenei lipoti, ona o se uiga vaivai o le Malo i mea tau tupe. O ia uiga ua folafolaina e le alii Minisita ona o le leai o se tupe a le Malo o Samoa, sa le tatau ona oo i ai le Malo. Aua o lo o faulai uiga ma galuega sa tatau ona faasaga atu i ai le Malo latou te faatinoina ai le mafatia o le Malo. Ae peitai e aliali mai e matua leai lava se galuega a le Malo e faatinoina ai ia faafitauli eseese ua aliali mai i lauga ma saunoaga e fai i tausaga taitasi ma ua faafofoga i ai Samoa i lea tausaga ma lea tausaga, a ua matua leai se galeuga e faatinoina ai. O lea e talosaga ai le Malo ina ia latou taumafai e uunai le faia o galuega aua e leai se matagaluega a le Malo e le maua mai ai se tupe a le Malo;

e tele naunau tupe a le Malo e tatau ona maua mai i matagaluega taitasi pe afai latou te aiaia nisi galuega mo ni itu i ni faatatau e maua mai ai le tupe a Samoa. O lea la ou te faaali ai ou manatu i le atiina ae o le atunuu.

E fia faaalua sina mantu i le Popo a Samoa - Silasila le mamalu o le Fono, o le popo ua toe maua e tagata suesue o le lalolagi, o le suauu sa faaaogaina muamua e sui ai le popo ua le toe faaaogaina i nei onapo. Ua toe taliu mai nei le lalolagi latou te toe faaaogaina le suauu o lo o maua mai i totonu o le popo. Ua aliali mai ai le manaomia tele o le popo a Samoa, ae peitai o e o lo o latou aiaia le popo ua le o gatasi ma lea faamoemoe o le atunuu po o le lalolagi foi. Sa saunoa i ai nisi Tootoo ua mavae atu e tusa ma le afa miliona pauni le tupe a ē e fai popo o lo o i totonu o le Ofisa o le Komiti o le Popo. O lea tupe o le tupe lava a e fai popo, o lea tupe latou te vaavaia ai le galueaiina o le popo; peitai ona o ni aiaiga a le Komiti o le Popo ua latou faatauina atu ni popo i la atunuu, ae leai se popo ma ua o mai ai vaa ae ua le lava le popo ma ua totogi pea e lenei Ofisa le pasene sa tatau ona i ai le popo i lea lava itula. A o le mea ua oo mai nei i ai, ua toe faapau nei le popo a Samoa i le mea sese talu ai le Komiti o le Popo. Ana le seanoa lea itu semanu e faapenei ua aliali mai o lo o lelei pea le popo a Samoa. A ua aliali mai nei o e fai popo ua latou aveina le sese o e sa latou aiaia le popo. Ae pei ua aliali mai i le faamatalaga a le alii Minisita o Tupe ua liliu ma faaitnoina mai i le le totoina o niu ma nisi itu faapena; o le itumalo ou te sau ai ua lava niu ua uma ona toto sei vaeatu le mamalu o le Fono. E pei o le niu e atoa le ono tausaga ona faatoa faaoga lea. O na aiaiga uma ua leva ona i ai i Samoa, ae peiseai o mea sese a tagata ua ala ai ona tupu le faasalaga o le atunuu atoa. Ona pau lea o lou manatu e faaali i lea itu i le atiina ae o le popo, ma lau fesili e tasi lea i le Afioga a le alii Minisita o Tupe, faamolemole pe mafai ona aumai i totonu o le Fono le tupe atoa o le tau o le popo ma vaevaaina mai i itu nei; o le tupe ua alu i tagata i tua, ma le tupe na alu i faleoloa ma le tupe na avatuina ai popo, ma le tupe o lo o i totonu o lenei lava Komiti Popo? O le tupe lea o lo o i totonu o le 'Board' pe fia la o lo o tuu e tausi ai le 'Board' ae fia foi o lo o tuu i le 'Reserve' aua e ala ona ou vailia lea itu ona o le tele o le tupe o lo o i totonu o le 'Reserve', o le tupe lava a i tatou o lo o gaosia le popo po o lo o latou aiaia le popo.

Ou te tautala i le Fa'i. O le fa'i a Samoa o le faamai fa'i ma mea ua aliali mai ai e pei ona ou faaali atu muamua, o mea ua tatau ona leva ona faaumatia. Ae peitai ona o le faagesegese o aiaiga a le Malo ua ala ai ona tatou oo i lea tulaga ma le lē faia o se mea e tasi. Ou te faafetai i le Malo ona o lea seleni ua faaopopo i pusa fa'i taitasi ae peitai ua aliali mai ua auina mai le pusa fa'i fou mai Ausetalia i Niu Sila; o lau fesili la i le Afioga a le alii Minisita pe taifia la le tau o le pusa fa'i ua faatauina mai ai e Niu Sila mai le Malo o Ausetalia? Ua aliali mai le manaomia o ituaiga fa'i uumi sei vaeane le mamalu o lenei Fono. A o Niu Sila ae afio atu ma tala aao atu i ai e faatau ni au fa'i i le fale fa'i, e te lē faapea e aumai la ni au fa'i uumi; e leai o le mamafa o le fa'i e aoga i na atunuu. O le mea la lea, pe aisea ua vailiili mai ai na o fa'i uumi ma le matagofie ao Niu Sila o le mamafa lava o le fa'i e te alu atu lava ma aumai ni au fa'i pe faapea e 6 pauna e sau faatasi lava le pupuu atoa ma le uumi ae le

faapea e tau iloilo ina na o fa'i uumi. Ae pe aisea la ua faapea ai iinei? Ona gata mai ai lea o lau tautalaga i le fa'i a ua ou fia tautala atu nei i le koko.

O le koko, ua aliali mai ua fuafuaina nei e le Malo se Ofisa latou te vaavaaia lea tamaoaiga o le atunuu o le koko, e tusa o le popo. A o le fesili atu pe tutusa la fesoasoani a le Malo i e fai koko i nei ona po e tusa ma le fesoasoani a kamupani i nei ona po aua a manao le tagata fai faatoaga i se tupe e mafai ona malaga atu i le Ofisa o lea kamupani ma aumai ai se tupe. O le fesili la pe a fai o le a i ai lea 'Board' e vaavaaia le koko, pe fai lava e le Malo lea fesoasoani pe mafai ona avatu ni tupe i ni tagata latou te mafai ai ona faia ni galuega? Afai o le a faatinoina e le Malo ia fuafuaga ina ia faaaogaina le Komiti o le Popo o lo o i ai nei i le popo latou te vaavaaia uma fa'i ma koko, ou te matua tetee atu i ai lou nei lava tootoo, ona o le a aliali mai ai o le a leai se 'competition' a ia tagata o le a taotooto lava le tagata; ia pe alu i fafo le popo, koko ma le fa'i pe leai ae pei ou te lagolagoina ma faatuina atu i lou nei taofi ina ia tofu nei tamaoaiga o Samoa ma le Komiti; o le Popo, Koko faapea ma le Fa'i.

I le fefaatauiga i fafo ou te faaali atu lou manatu ona o lenei pagatia ua i ai le Malo i mea tau tupe. Ou te tuuaia lava e au le Malo, aua ua ia i latou le aiaiga po o le malosiaga latou te faia ai nisi aiaiga uma e manuia ai; ae peitai ua latou le faia. O lenei ua aliali mai ua maulalo lava le tupe a Samoa. Ae afai o le a faataunuaina ia fuafuaga a le Malo e faaopoopo i luga nisi tau o oloa po o le tiute o mea taumafa tau le soifuaga o tagata o le a maua luga, o le a faigata lava i tagata uma, ma o nei mea uma o le a aliali mai ai le mafatia o tagata uma talu ai le faatamala o le Malo.


Ou te fia faaali sina manatu i le totogi o tagata faigaluega o le Malo. O tagata faigaluega o le Malo ua tatau ona siitia ma faaaogaina la latou tusi talosaga i le fia siitia o o latou totogi. Silasila mai i le tausaga e 1959 e tasi le siitaga o tagata faigaluega a le Malo, a e fa'a ai siitaga a Papalagi o lo o mai i latou iinei mai le tausaga e 1959. O le ala foi lea ua outou silasila ai ma faafofoga i tulafono tau tupe o lo o solia soo pea e tagata faigaluega o le Malo, ona o le le lava o o latou totogi. Ae seasea se tagata palagi ona faapea sei vagana ai lava tagata faigaluega a le Malo ona o le le lava o totogi o tagata. O le fesili, po o fea le tupe o le a totogi ai? A e pei ona ou faaali muamua e tele naunau ala-tupe a le Malo e maua mai ai tupe, e totoe foi pe a amata ona galueaina e le Malo nisi uiga e maua mai ai tupe ia mo nei aiaiga e pei ona tatou silasila i ai.

Ou te fia faaali se manatu i le faafaigaluegaina o tagata faigaluega a le Malo, e pei ona faaalia e se tasi tootoo le le tuuina atu o avanoa mo tagata faigaluega i Samoa nei. O au foi o se tasi tagata sa faigaluega i le Malo, ma e puipuia le avanoa e papalagi mo i matou nei Samoa vae atu le paia mo lo matou oo atu i ai i ia galuega. O lea ou te talosaga atu ai, o le tupe tele a le Malo o lo o alu i nei tagata ae le i matua maoae se aoga i totonu o le Malo ona o le avanoa e le o tuuina atu i uso-Samoa e faatino ai le finagalo o Samoa ina ia faia ai e Samoa lo latou lava Malo. Ana ua faatinoina ia itu uma ua mafai lava e Samoa ona taitaiina ma faia galuega a lo latou Malo. O lou taofi lenei ua faaali atu ina ia talosagaina le

Malo ina ia faia ni aiaiga mo ia fuafuaga uma ina ia faataunuaina ai.

Le Fofoga o le Fono - O au fautuaga na i le Malo ina ia faia ni faiga e maua ai tupe e faataunuaina ai ia itu uma.

Afioga FULU MISIATA



Itumalo Faaalaalafaga:

Anoamaa Sisifo

Filifilia:

10 Aperila 1964

Faatauto:

16 Aperila 1964

Lauga Faataupou:

25 Iuni 1964

Lau Tofa a le Fofoga Fetalai ma le mamalu o le Fono, ou te tuu atu ma le matua faaloalo ma le ava tele tatau ai i le mamalu o lenei Maota Fono e fia faaali ai lava se manatu vaivai e faatatau i luga o le Lauga a le alii Minisita o lo o taatia nei i luma o le Laulau a Fono. Ou te avatu lava le faafetai ma le faamalo i le alii Minisita aua ua faaali foi lona poto masani, e pei o se tusitala faasoaso upu matagofie e pei o le Lauga ua taatia mai nei lona faaupuga male vaevaeina lelei o tulaga eseese ua i ai. O lea ua tatau lava ona ou faaali atu se manatu. O lenei pepa ma lenei lauga e leai sona faafitauli ua i ai, o ai lava i totonu o le Maota lenei le mea e ao ina fofo ai, aua e peiseai e aliali mai lava i le tele o faaupuga o saunoaga a le alii ma lana polokalame o lo o aliali mai lea i lana Lauga, e peiseai o lona agaga lava ina ua pau o le fa'i ma le koko, o le ala lea ua le maua ai se lelei e pei ona manaomia. Peiseai ua aliali mai, o nai popo lava ia o lo o tali mai nei i lenei vaitaimi, a ua matua pau lava le fa'i atoa ma le koko. Ou te tautala atu ai lava ma le ava ma le faaloalo, e le faapea o le fa'i ina ua vaivai, pe faapea o le fa'i ua maua i le faama'i e pei ona taua e nisi tootoo vae ane le Maota, e leai, o lona uiga ua le malosia ai le fa'i i lenei vaitaimi, ua faale fiafia tagata e fai pusa fa'i. Ua le fiafia le 'au fai pusa fa'i ona o faiga a le Ofisa o Fa'i, ma le Minisita o Faatoaga. O le ala lea ua ala ai ona le fiafia e fai pusa fa'i, a ole fa'i e pei lava ona taua e nisi tootoo i le aso ananafi, ua o solo nei i le taulaga i Apia o lo o faatau ai, aua ua mumusu i fai pusa fa'i. Sa solosolo matagofie mai lava le tulaga o le fa'i mai le amataga, sa faia foi ma le fiafia ma le loto malie e le au fai fa'i, ona o le tautua i lona malo, ma ua aliali mai nei i le vaitaimi e lei mamao atu nei, ua le fiafia, ona o le ponesi, aua ua pau. Ua le gata ina pau ua 1/- a ua pau foi i le 6d a ua toe aliali mai foi le isi tulaga e pei ona faasalalauina e le Minisita o le Pasene. Ua le malamalama la nai tagata vaivai i nai toeaiina ma nai olomatutua i lenei mea e tau o le pasene. Ua ou lagona lava le agaga o le matua faanoanoa ma le vaivai ona o le Ofisa lea, aua ua tatau lava ona faaleleia ona o lo o i ai le ola o le atunuu atoa i le fa'i. A malie lava e fai ai se mea faigata e fai lava e oo lava i le 6d, a e afai foi e 1/- ia 1/- la ponesi. A o nei uiga ua aliali mai, o le ala lenei o le fautuaga atu i le mamalu o lenei Maota Fono; o lenei ua le malilie ai le au fai pusa fa'i. Ou te matua tau atu o lou Itumalo ua na o se lua i le tolu ni nai pusa fa'i, a ua tele i le lau mai i le taulaga e faatau ai.

O le mataupu i le koko. Ua leva tausaga o leaga pea le tulaga o le koko, a e a pe a tago aao le Malo e fai se togafiti e faalelei ai le koko a le atunuu. E le faapea ua pau le koko ona ua faapea ua laititi, e leai ona ua vaivai le koko. Ua tele le koko a ua fai foi i ai nifi faiga faale sao, ua le faamaoni, o le ala lea ua ala ai ona tupu le faalavelave. O lea e faufautuain ai le Malo ina ia faia se Tulafono e puipui malu ai le koko ma tago aao foi le Malo e aumai le koko a le atunuu e fai e le Malo.

O le popo. Ua tatau lava ona fai ni aiaiga malu a le Malo faatatau i le tulaga o le manu 'ainiu o lo o matua tele tupe a le Malo o lo o alu nei i le Ofisa o Faatoaga i lea tulaga, e leai lava se mea o fua mai ai; o lo o tumau pea i lea tulaga lea, a o lo o tele pea le tupe a le Malo o lo o alu ai pea i lea Ofisa. O la ou te talosaga atu ai lava i lenei Maota Fono ian ia faia ni aiaiga ina ia i ai se paoa i le Pulenuu ma Alii ma Faipule, a e toe tuu atu i ai le tulaga o le suega o le manu'ainiu, ia galulue faatasimasetasi vaega o le Ofisa o Faatoaga. O lea ou te matua talosaga atu ai lava ma le ava ma le faaaloalo i le aiga a Minisita po o le Kapeneta po o le Afioga a le alii Palemi ia fuafua mamao mai ia fai mea uma lava e pei ona manao i ai le atunuu. 'Aua le na ona folafola, folafola lea mea ma lea mea a e leai lava se mea o faia. O mea foi sa lote i lea tausaga lea foi ua toe lote i lenei tausaga a e le faia lava. Afai o le a faia e lenei Maota Fono mea e malilie ai le atunuu atoa male au fai faatoaga, o le a faia foi e le atunuu le mea e Mano ai le Kapeneta ma lenei Maota Fono. Ia manatua mai e lenei Maota Fono o lo o faafeagai nei le Malo o Samoa ma nialuega tetele se lua, o le Uafu i Apia ma leuafu i Asau, o se aitalafu maoae, a e afai e malilie le atunuu, o lo o i o latou aao lava le mea faatauva e faatu ai uafu nei, pe a malie. O lea ou te matua talosaga atu ai lava i le mamalu ma le paia o le Maota Fono nei, ma le aiga Minisita ma le Kapeneta ma le alii Palemia, aua e peiseai o i latou lava ia o lo o taulamua ma faafoeina uiga uma o tulafono a le malo, o lea ia outou alofagia ia tuutuu mamao le tofa ma ia aua nei tatou galulue faapito a ia tatou galulue e le o se taulaga na o Upolu, e leai ia fai ia lelei foi mea o lo o tagi mai ai Savaii latou, o lea foi o le a toe uma atu foi lenei auganofa a e le i faia lava mea na fai mai i ia auganofa, na o folafolaga lava a e le taunuu.

Ou te matua tautala atu ai lava ma le ava ma le faaaloalo i lenei Maota Fono, e leai se mea e ese ai le Malo ma se matai ua pulea sona aiga. Ua faaali atu e le Matai i lona auaiga ia fai lea ma lea, ma e galulue le auaiga e fai mea uma lava e tusa ma le manao o le matai, a e a tupu mai la se faalavelave i nisi o le aiga ua 'alo loa le matai ua le faia. E faapena foi la le Malo, e fai atu le Malo i le atunuu e fai lea ma lea, ona fai lava lea po o le au fai faatoaga. A ou te le i oo mai i lenei Maota Fono, sa ou faalogologo mai lava i le taimi ma mavae ma tausaga ua tea i le motu ia Salafai e tusa ma lo latou manao i lo latou Vaipaipa, peitai ua na o folafolaga e oo i auala a e le o faia. Atonu o le a tali mai nei le alii Minisita o Galuega po o le mamalu foi i le Kapeneta e faapea, ua leai ni tupe a e ou te matua tautino atu e tele tupe a le Malo. E tuu o le a tupe a le Malo faaleoleo, ia fai le mea e manao ai le atunuu. Ia manatua lelei o iina lava o lo o i ai nei le miliona pauni lea o lo o fai ai nei auala ma le taulaga, pe a malie lava Samoa i tagata uma o le atunuu, a e a le malilie

ua tatau ona ou faapea atu vae atu le mamalu o lenei Maota "toe afe lava faia." O lea ou te matua talosaga atu ai ma le faamaualalo ma le ava i lenei Maota Fono ia fai mea e malie ai le atunuu, o lea ou te matua tapaina lava le tulaga o le Kapeneta ma le aiga Minisita, aua o latou lava ia ia matua tuutuu loloto le tofa mamao mo le manuia lautele o le atunuu. Afai e leai ni tupe ia aitalafu mai se tupe i tulaga lava ia o Malo e galulue felagolagoma'i. O lea ou te faapea atu ai lava ma le faaaloalo ma faaiu atu lenei lafo vaivai ma faufautua atu i lenei Maota i le aiga Minisita ma le mamalu o le Kapeneta ma le Afioga i le alii Palemia ia outou alofagia manaoga o le atunuu ma ia aua nei tuulafoaiina e le Minisita o Faatoaga, aua oiina tonu lava o lo o i ai le puna ole manuia o le atunuu. Ia manuia le Maota.

Tofa GALUVAO FARANI



Itumalo Faaalaalafaga:

Gagaemauga Nu.3

Filifilia:

10 Aperila 1964

Faatauto:

16 Aperila 1964

Lauga Faataupou:

29 Iuni 1964

I le mamalu tele i le Fono a le Pelemene, ma sui o le Kapeneta. E muamua lava ona ou momoli atu le faafetai tele ma le faamalo i le alii Minisita ona o leneo faamatalaga auiliili ua tuuina mai nei i luma o le Fono. E muamua lava ona ou fia taua le itu i le aoao tetele o le tulaga tau le tamaoaiga i totonu o le atunuu. E pei lava ona outou silafia o le folasaga ua tuuina mai e le afioga a le alii Minisita o Tupe o lo o tuuina mai ai ia i tatou i se ata i se tulaga faamalosi'au, ina ia mafai ai ona tatou faamoemoe i ai o le a taunuu, aepetai o nei mafaufauga ma le ata lea o le a ou tuuina atu i ou mafaufauga faaalua, olea matua faaalua manino ai lava le mea moni ma le tulaga tonu o lo o tatou oi ai nei i le itu tau i le tamaoaiga, faapea ma mea e tatau ona tatou oo i ai i le lumanai lata mai. Tatou muai tepa atu i le tulaga o le alamanuia o le popo. I le tausaga e 1962 o lo o faaalua ai le tulaga e faapenei, o popo na maua i lenei tausaga e 12,806 tone ma na maua mai ai tupe e £654,905. I le tausaga e 1963 o le aofaiga o tonu popo na auina ese at e 15,197 tone ma sa maua mai ai le aofaiga o tupe e £871,422. Ua avea lava ia fuainumera ma mea e faagaetia ai le mafaufauga fiafai ona o le tulaga lelei sa i ai le siisii a'e o lea alamanuia i ia tausaga e lua, ma o lea foi na aliali mai ai ni tone faasilua e 2,391 i le tausaga na sosoo ai atoa ma le esesega i le itu e tatau ona tatou i ai e £216,517. O le ala manuia numera lua i nei lava tausaga e pei ona ou taua atu o le koko lea. I le 1962 sa auina ese atu aiia tonu koko e 5,258 ma o le tupe na maua mai ai £1,165,802. I le 1963 o tonu koko na auina ese atu e 4,324 tone, o tupe na maua mai ai e £835,649. O lona uiga e pei ona faaalua mai ua pau ifo koko e mafai ona maua i le tusa ma le 934 tone pau ua faapea foi ona pau ifo ai ma tupe na maua mai ai i le vaega tupe e £330,153. O le alamanuia numera numera tolu o le fa'i. O lo o faaalua i fuainumera i le tausaga e 1962 e 760,935 pusa fa'i auina ese atu ma maua mai ai

tupe e £908,098. I le tausaga e 1963 o pusa na auina ese atu e 686,458 pusa a o le tupe na maua mai ai e £824,964 ma o le mea moni na taunuu i ai, o le pau ifo lea o pua na maua i le pet usa male 74,477 ma pau ifo ai foi ma tupe i le £84,134. O le aofaiga o tupe atoa na maua mai i nei ala manuia e pei ona auina ese atu, o le popo, koko ma fa'i e £2,532,035 a o le aofaiga atoa o oloa na faaulufaleina mai i totonu o le atunuu e £3,006,939. O lona uiga la o le tupe ua le fetau ai, o lona uiga ua sili ai oloa na faaulufaleina mai nai lo fua na auina ese atu e £474,904. Ona o ia la mea e pei ona ou taua atu i le mamalu tele o tulaga ole fono, ou te matua tautino atu lava, o le tulaga ua oo nei i ai tatou o se tulaga faale lelei, ma ole mea foi lava lea e ao ai lava ia i tatou ona tatou mataala ina ia mafai ona toe fatu ni faiga ma ni auala e mafai ai ona foia ia itu faaletonu ua aliali mai i lo tatou tamaoiga. Afai nei la o le a tatou toe liliu atu ma toe maimoa i le isi itu o le ata tau le tamaoiga, ua outou silafia lelei o lenei ua faafeagai nei le atunuu ma galuega tetele e lua e pei ona ua amatalia nei, o le itu lea i le fausia o uafu i le sami loloto ma ou te faapenei atu, ao aoaoina matou i totonu o Nius Sila ile ituaiga aoga foi lea e taua o le TWI po o le aoaoina o le faia o galuega i lona tulaga sao i totonu o fale faigaluega, sa avea lava ma faatumutumuga lenei fuaitau po le ea sa tulimatai i ai ia faiga faavae a lea foi ituaiga aoga, ina ia fai auauai le faiga o galuega tetele.

O le a ou liliu atu nei e tuuina atu se isi ata i luma o le mamalu o sui usufono o lenei Maota e faatatau i le eseese o e o lo o nofoi i totonu o le talafatai i Apia nei, ma i latou foi o lo o alaala i nuu i tua ma nuu e fai sina mamao atu. I totonu o le talafatai i Apia nei ma e o lo o alaala foi i Apia nei, ma i latou foi o lo o alaala i nuu i tua ma nuu e fai sina mamao atu. I totonu o le talafatai i Apia nei ma e o lo o alaala foi i Apia ma nuu taulata mai, o lo o tele lava ni faamanuiaga o loo latou maua e pei o nei. O lo o latou maua auala lelei, o nei auala e tele lava ni taii e toe faafou ai ma saga faafou pea ma o lo o latou maua pea lea avanoa matagofie, e le gata i lea, o lo o latou maua foi le itu i le eletise, lea o lo o latou mafai ona faaogaina, o lo o i ai foi vai pai[a lelei o lo o mafai ona latou feinu ma taumamafa ai, a e le gata i lea o telefoni po o ia lava uiga e mafai ona faafaigofieina ai fesootaiga. O lo o mafai foi ona latou maua le itu i taavale laiti e tali mai i o latou manaoga vave i le po atoa ma le ao. E le gata foi ilea, o lo o i ai foi le fale taavale tuufatasi o le Malo o lo o i ai nei o lo o faagaioia foi po o lo o faagasolo i ia lava taualumaga i le po atoa foi ma le ao. Ae le gata foi i lea, o lo o i ai i totonu i Apai nei fale oloa e mafai ona latou maua ai soo se mea i le tau taugofie. O lo o i ai le maketi e mafai ona latou maua ai soo se mea e manao ai e pei o taro, fa'i ma mea uma faapena o lo o mafai lava i soo se taimi ona latou maua mai ai mea i totonu o le maketi lea o lo o faatuina i totonu o Apia nei. Ae le gata foi i lea, o lo o i ai le itu i le falema'i e mafai ai ona latou maua le falemai lelei ma o lo o mautu lelei i totonu o le loto i Apia nei, o tasi foi ia uiga o faamanuiaina ua latou maua. E tafili saunoa foi latou i itu tau aoaoga e faaogaina ai a latou fanau. O lona uiga e mafai lava ona latou filifili pe aveina atu i aoga a le lotu po o aoga a le Malo, o le avanoa lena ma le tasi lena faamanuiaga ua latou maua. O le itu foi i avanoa tau i galuega o lea foi o lo o sili ona maua tele e tagata o lo o nofoi ai i totonu o Apia nei, au

o lo o tele avanoa e le gata i totonu o galuega a le Malo a e faapea foi i Kamupani, a o lo o faasalalauina pea i luga o le Uaealesi Faasalalau i le 2AP, ma na o i latou lava i totonu o Apia o lo o mauagofie ia lava tulaga. Ona o ia la uiga aliali mai o le a ou fia fesili ai lava ma ou faapea ane. Ua mafua i sse a ona maua e ia tagata nei uiga faamanuiaina? Ma o lau lava tau i ai i lenei olaga ua soifua ai nei tagata iinei o se soifuaga tulaga maoa'e ma ua maualuga tele le soifuaga ai nei tagata iinei o se soifuaga tulaga maoa'e ma ua maualuga tele le soifua ai nei tagata iinei o se soifuaga tulaga maoa'e ma ua maualuga tele le soifuaga o tagata i Apia nei. O lau tali la i ai i le fesili lena, pe ua mafua i se a ona maua e i latou nei faamanuiaga? e faapenei. Ua latou maua ia mea lelei ma faamanuiaga aua o iinei i Apia nei o le nofoaga tutonu lea o lo o faatuina ail o tatou Malo, ae le gata i lea, ua avea foi Apia nei ma taulotoa'iga ma nofoaga tutotonu mo faiga pisinisi ma le au fai'oloa o lo o faatuina ai iinei o latou faleoloa. O le mea moni lava la, afai ua moni lea itu, e ao lava foi ina sei liuliu ane se isi fuafuaga ma tuuina atu ai nisi faatatau ma se agaga alofa ia i matou nei o lo o nosofimai nuu i tua, o lo o mafatia tele i le tele o itu faigata uma faapena.

O le itu ia i matou nei o lo o nonofo ma alaala i nuu i tua. O auala e matua mafatia tele ona o le pefu e maua lava le pefu i aso uma, ma o nuu uma foi o lo o matua sili ona mafatia i lea tulaga ona o le leaga o auala. Oitu i le eletise po o moli uila e leai ni moli uila o i ai nei. O le itu foi i vai paipa e moni ua i ai nai nisi nuu ua i ai o latou vai paipa, ae le o talafeagai tutusa i le itu i nuu uma i le motu ia Salafai, ma a tatou mafaufau atu foi ma tatou silasila ane i le Itumalo tele lea oFaasaleleaga lea o lo o nofoi ai le sili atu ile toa 8,000 o tagata i lona itumalo, o lo o i ai ni paipa ua uma ona fausia mau taatitia nei ua le iloa, po ua fia tausaga talu ona taatitia nei paipa e aunoa ma se vai ma o le mea moni ua mafua lea mea ona ua faatuatuanai e le Malo i lo latou tausia ma lo latou silasila lelei i ai o lo o faatinoina ia manaoga o tagata e pei ona latou tagai mai ai ma o le mea moni la e oo mai i le taimi nei, o lo o taumafaina pea e lea itumalo vai mai sei vae atu le mamalu o le Fono. I le faagataina o lenei itu i vai paipa, a o tatou mafaufau atu i femalagaiga, e i ai ni taimi o e foi e malaga atu i Apia nei po o e foi e fia faimalaga mai i le motu ia Salafai, ma atonu e le o silafia e le toatele o lenei Maota, aua e le masani o na femalagai, a e ou te tautino atu lneie mea moni, e tele nisi taimi a o fai se malaga mai i Apia nei, ma e taunuu mai i Salelologa ua leai se vaa, e leai lava ma se mea e mafai ona e toe mapu atu i ai sei e malolo ai, pe mafai ona maua ai sau mapusaga, o lona uiga, a e sau lava ua timuga pe la o le a e tau faatali ai lava iina i le la ma timuga sei ua timuga pe la o le a e tau faatali ai lava iina i le la ma timuga sei maua sou avanoa ona e faatoa malaga mai ai lea. O itu faafitauli la faapena ua sili ona mafatia tele ai matou nei o lo o aofia ai i totonu o lea tulaga. Tatou liliu atu nei i le itu tau i le Telefoni. Ua matua leai piu lava ni telefoni i le motu ia Salafai, ma e pei lava ona outou silafia o nei lava fesootaiga, o ala faanei ona po e mafai ai ona fesootai i telefoni, ua tele naunau ni soifua ma ni ola ua faasaoina ai i totonu o le motu ia Upolu, aua o lo o i ai telefoni e mafai ona fesootai vave ai. E le gata i lea, o lo o i ai ala lelei, auala lelei e mafai ona faaogaina, o lo o i ai foi taavale

laiti e mafai ai ona fai ai fuafuaga faavavave i taimi e tupu mai ai faalavelave faafuasei ma mafai ai ona faasaoina le soifua. A tau ane foi i se isi itu, o lo o i ai lava le Ofisa o le Soifua Maloloina o lo o i ai le tiute i le po ma le ao. O ia itu uma o faamanuiaga o lo o maua lava e i latou o lo o alaala ma nofoi ai i totonu o le talafatai i Apia nei.

O le mea moni lava i lau Tofa ma le mamalu o le Fono, ua tele lava ni soifua ua uma ma nisi foi ua maliliu i le motu ia Salafai, ona o lele lelei o ala e femalagaai ai ma mea e fesootai ai fuafuaga faapena, ua tatou silafia lelei i totonu ia Savaii o lo o i a nisi falemai, e i ai taavale a e i ai nisi falemai e leai ni taavale, pe ai se a ua faapea ai? E fia ea ni Tulafono Faavae o lo o taitaiina ai le faiga o Savaii? Ou te le la alea itu ina nei faapea ua ou sailiilia vale po ua ou suesuevale i lea itu po ua faailoga tagata ia Pai ma Lafai, a e na ona ou faapena atu, e aliali mai ma ou te fia maua ai se faamalamalama, po ua mafua i se a lea fiaga o le le taga tutusa o falemai uma?

O le a liliu atu lau tautalaga i le taunuu mai i le Uafu i Salelologa, o le mea foi o lo o faatoai mai ai faigamalaga i lenei foi motu ia Upolu. Na i ai se aso sa ou i ai i se pasese e tusa ma le toa 50 o tagata na matou taunuu mai ai i le tasi po, p tusa o le ta o le 3 i le vaveao, o lo o iai se tamai fale i lenei Uafu, e mafai ona ofi lelei ai tagata pet usa e toa 20 ao lenei la ua feomai ai ma fetinai ai matou nei, o le mea moni o lea po sa matua iloga ni timuga maligi ma sa matagi foi a e sa matou nonofo ai lava i lea fale mai le itula e 3 i le vaveao seia oo i le ta o le afa o le ono i le taeao faatoa maua mai ailo matou ala i Apia, aua e leai se telefoni e mafai ona fesootai mai ai se auala, e leai foi ni pasi na i ai ma sa m aua ai i matou i se tulaga mafatia tele ona o lea vaega o lo tatou Malo i luga o le Uafu. O lou lava la talitonuga, le mamalu e o le Fono, e tatau lava ona avea ma avega tauave a le Malo le tausisia ma le fausia o ni fale leleii luga o ia uafu, le uafu lea i Salelologa ma le uafu lea i Mulifanua, aua e le gata ina o le a aoga tele i malo fegasoloai po o e foi e fai malaga i totonu o le atunuu, a o le a mafai ai foi ona lelei lea itu mo i latou o e fai malaga mai fafoma mata'ina ai foi lea itu o leo faaletonu ai lo tatou atunuu i le taimi nei.

O le a ou liliu atu i tulaga o galuega a le Malo, ma galuega foi ia tau Kamupani Vaa ma mea faapena. Ou te matua faasilasila atu lava i lau Tofa a le Fofoga o le Fono ma le mamalu o sui usufono, e tele avanoa o lo o mafai ona maua e i latou o lo o nonofo i totonu o le talafatai i Apia, e itiiti lava foi ni nai avanoa o lo o maua e nisi mai nuu ma itumalo i tua, a o lo o tele nina faamanuiaina ai letalafatai nei. Ona o ia la mea moni e pei ona ou faailoa atu i o outou luma, e mafai ai lava ona ou faapea atu i le taimi nei, e matua maoae lava le faamanuiaga o le soifuaga o tagata o lo o nofoi i totonu o Apia nei, a e mafai foi ona faapea o le soifuaga ma le olaga o lo o matou ola ai matou nei ua o mai i nuu i tua e matua tulaga maulalo tele.

O le taimi nei o lo o sagai atu nei le Malo i le faatinoina o se tasi o fuafuaga i le motu ia Salafai o le fausiaina lea o le uafu e pei ona outou silafia lelei. Ou te faapenei atu e tatau lava ona fai, a e pau lava lau faitio i ai ona o le taimi, e le o le taimi lenei i lau fuafuaga e tatau ai ona faia lea fuafuaga, aua foi o lo o i ai nai mea laiti e tatau ona luai tagofia e le Malo, itu ia e tatau ona faaleleia atili

ina ia mautinoa, o lo o lelei lava ma sologa lelei le soifuaga o tagata o lo o ola ai i lea vaega o le atunuu, ma e le taumate o le mea moni lava ua tatou iloa, e matua tele naua ni tupe ua faamoemoeina e faaluina ai i lea galuega faamoemoeina. Ae ou te tautino atu se manu e laitiiti lava se vaega tupe o na tupe o le a faaluina ai e faamalieina ai le manaoga o tagata nei o lo o tagi mai pea i mea e fia faaleleia atili. E pei lava foi ona outou silafia lelei le itu lava o loo faamamafaina e nisi o tootoo sui usufono i a latou saunoaga, o le itu lava i le Aufaifaatoaga. I le taimi nei ua le lava lo latou malosi ma ua latou faatagisia ai se fesoasoani mai le Malo i le itu tau tupe mo le faalauteleina ma le saga atiina a'e ai o le itu tau i faatoaga. O mea la na ou te talitonu e tatau ona luai sagai atu i ai le Malo muamua nai lo fuafuaga ia e pei ona o lo o loma ma agai atu nei i ai le Malo ina ia faatinoina.

Ona o lou taimi ua tau faaiuiu o lea la ia malie lau Tofa o le a sei ou taua puupuu lava le itu tau i aoaoga. O le taimi nei, o se mea lava e avea ma faanoanoaga tele a matou foi o lo o nonofo ma alala i nuu i tua lenei faiga fou a le Malo tau i le totogiina o aoga. A tatou fuafua loloto lava i ai ma tatou silasila ane i le aoga lea i Malifa ma Leifiifi. O le fanua lava o lo o i totonu o le aoga i Malifa ma Leifiifi, faapea ma fale o lo o i ai, o fale uma lava na e pule ai tatou uma lava i tagata uma lava o le atunuu. A o matou i nuu i tua, ia silafia lelei lava i tagata uma lava o le atunuu. Ao matou i nuu i tua, ia silafia lelei lava o le fanua e i ai aoga o le fanua lava tau i le nuu lava latou. E le gata i lea, o le nuu foi po o le itumalo lava ua latou fausia o lagoon lava faleaoga. O lenei foi la ua toe faaopoopo atui ai ma lenei mea, o le totogiina lea o aoga, o se mea lava lea e matua lagona ai lava le matua mafatia ma le faanoanoa ona o lea itu, aua e matua sili lava ona mafatia o matua ona o le tau sailia mai o ni tupe e totogi ai pili o aoga a tamaiti i lenei vaitaimi a o lea o lo o maulalo le tulaga tau atiina a'e, ma e le o lava foi le fesoasoani a le Malo mo le atiina a'e i mea e manuia ai tagata o lo o nofoi ma soifua i nuu i tua.

Afioga IIGA KALAPU



Itumalo Faaalaalafaga:

Faasaleleaga Nu.4

Filifilia:

10 Aperila 1964

Faatauto:

16 Aperila 1964

Lauga Faataupou:

24 Iuni 1964

Lau Tofa a le Fofoga Fetalai ma le mamalu maua luga o lenei Maota Fono, e muamua ona ou taua i lau lauga ma ou tapa le Faavae o Samoa, ou te faapea atu ai, ia faasoifuaina e le Atua le Faavae o Samoa, le Ao o le Malo ma ia foaiina e le Atua se malosiaiga i le Palemia atoa ma le Kapeneta o i latou ia o lo o tauaoina ma faagaioia le finagalo o lenei Fono. Ia faamanuia le Atua ma ia 'autasi i finagalo o lenei Fono i le amiotonu ma le faamaoni e tusa ma o tatou tofi. Ou te matua fiafia lava e vivii ae loua gaga i le Atua ma faafetai atu ai i le alii Minisita o Tupe, e pei ona lana

lauga na tatou silafia i ai. ou te faafetai lava i le agavaa o le toeaina o le ua avea nei ma Minisita o Tupe, o lo tatou Malo ma ia saga faateleina pea e le Atua lana amiotonu ma lona faamaoni i lea faiva taua.

O nei faufauga uma lava epei ona ou faitau i ai, o le a le fia avea au ma faiaoga i le alii Minisita ae na o na ou talosagaina ia faaatoatoaina lona mataala i lana galuega e tusa ma le tausiga o le tupe a le Malo o lo o tatou atunuu. I lau Susuga a le Minisita o Tupe ou te matua faasaga atu lava ma le faaaloalo tele faapea foi le mamalu o le Kapeneta ma le Maota Fono nei i tootoo o sui usufono o Samoa, ou te talosaga atu ai ma ou faatuina atu lenei upu a Solomona e fai ma faavae o lau tautalaga – “O mata o le poto o i le fale o le mativa.” Le Minisita o Tupe, o mata o le poto o i le fale o le mativa. Silasila foi le Kapeneta ma lo tatou Malo e mativa le fale o Samoa. Pe afai la ua avea i tatou ma e popoto ma ua atiina ae o tatou Malo i luga o le Atua, o mata o le poto o i le fale o le mativa. E ao lava ina tatou fuafua lelei ia tatou fuafuaga uma aua o i tatou, o lo o i ai le soifua o Samoa. E mativa Samoa. Ae silasila foi i galuega ua tatou i ai ua matua mao’e tele le saosaoa ma ua televave tele. E faanoanoa lava pe a mafaufau atu ma vaavaai atu i galuega uma ua faia nei i lo tatou Malo ae le tusa ai ma la tatou tupe. Pe ana mafai foi la ona ou tautala atu ai i ia galuega ou te matua fiafia lava e i ai , aua a ou tautala atu agai i nei uafu e pei ona ua faia nei uafu e lua ma ua faafualua i luma o Samoa, o se mea lava e matua ofo ai pe a fuafua atu i ai.

Maimau lava, pe ana fai e i ai uma lea agaga e tasi e pei o lou nei lava mafaufauga, pe ana sei tau o le uafu i Apia nei e tauaaoina e lo tatou Malo. O lenei foi ua faafofoga lo tatou Malo i faufautuaga eseese ona o le fia atiina ae o le manuia tau faatoaga a e fuafuagta lava pe a faatatau i le tupe o lo o ia i tatou, a o lea vaega tele ua gase ua o se mea lava e matua ofo ai. O se mea lava ua leva ona mafaufauina e lou nei tootoo o lo o ou mafaufau lava ma le faanoanoa tele i nei uafu e lua ua faafualua nei ona galuea’ina e Samoa, ma o lo o ou tau fesilisili po o le mea ea lenei o se saoga uafu a malo, po o se asiasiga a taulaga vaa, sa ou tau fesilisili lava faapea ona o nei uafu tetele ua faia a e mativa le Malo o Samoa. O lo o taua foi i le Tusi Paia le upu na ou faitau ai i le isi po fai mai, “E sili le mea ua i ai i le mea e le i i ai.” Maimau lava pe ana fuafua faapena e le Kapeneta ma lau Afioga a le alii Palemia ma tau fuafua faapena po ua aiaia tatau. Ou te le mafai foi la ona ou faapea ou te faaeteete ou te tautala atu ona o iinei ni FAipule Asau aua e le o se Uafu o Asau po o nisi Faipule o na nuu, e leai o le uafu o Samoa. O lea la ou te tautala atu ai lava ma le matua tautino atu le Palemia e, ma le Kapeneta ua mao’e galuega ua faia e lo tatou Malo a e silasila i le au fai faatoaga e leai se aao fesoasoani o lo tatou Malo o lo o i ai, o le ala foi lea o le telegese o le gaoioiga o Faatoaga o le ola o le Malo o Samoa. Maimau lava le mamalu o le Fono ma le Palemia ma le Kapeneta pe ana ootia faatasi o tatou loto e faavaveina lenei uafu ina ia tatou maimoa vave i ai ma sei tatou iloa le tulaga taua ma le lelei, ma lona faataunuuna. E sili le taunuuga o se mea i lo le amataga o se mea. Ou te matua tau atu ma le le fealoalofa’i ou te matua faamaoni e sili pe a taumafai e le Kapeneta ma lenei Fono ina ia toe faia se fuafuaga po o le toe liliu foi o le tofa ina ia faia le uafu e tasi. E lelei lava pe a aofia faatasi o tatou

loto i lenei lava agaga, afai lava a e maea lo tatou uafu lenei ma lo tatou taulaga o le mea moni, e viia le Atua e tagata uma o Samoa e tusa ma le Faavae o Samoa.

Ou te manatua lava le isi au malaga sa ou malaga atu i le ala lea oel Vao Tele sa ou malaga i le pasi ma sa ou maua atu se tasi loomatua, i le sa faatu loa le taavale ma sa tapa loa le ave taavale i le loomatua lenei e fia fesoasoani i ai e alu ane i luga ma lana avega ma sa oso ae loa i luga si loomatua ma matou malaga a e i ai se faalavelave na oo mai i si loomatua, e tu lava i luga o le pasi ma amo lana avega. Ia silasila foi la e le o le loomatua e alea o Samoa lea, e ui lava ina faapea o lenei ua faavaeina lo tatou Malo ma ua alu o le Malo Tutoatasi o Samoa a o lea lava e tietie le loomatua ma le avega, e lei aveesea lava le avega a Samoa e lei tuuina lava i lalo. Silasila foi, tatou te iloa o le faaunegatupe lea e fai ai ia uafu, e le o lo tatou Malo eau a faavaeina ma ua mitamita ai tatou o le Malo e faavae i le Atua le Malo Tutoatasi o Samoa a o la e tietie le loomatua ma le avega. O lona uiga ea la i lau Afioga a le Palemia ma le Kapeneta ma le mamalu o tootoo o lenei fono, o lona uiga ea e le faamaonia le suafa o le Faavae o Samoa o le Atua Sili e toatasi. Maimau pe ana fai lava a e tasi le faautaga ma le tofa i lenei Maota Fono a e fai le taulaga ma le uafu lea a e uma i le tausaga lea ma tatou vaai i ai ma viia loa le Atua le Faavae o le Malo o Samoa. Silasila foi ou te le tau atua aua ua silafia e Samoa. Silasila i lena uafu i Salelologa o lena tou te silafia uma lava, o le faitotoa lea e ulufale atu ai Upolu ia Savaii, a e le gata i lea o a tatou Malo e asiasi mai fafo e luai ulufale i le Uafu lea i Salelologa, ua tatou silafia ma tatou iloa ou te le mili atua au upu pe ou te tautala atu ‘alo’alo aua fai mai Solomona e tele le feasogi o le ua inoino a e faamaoni manua mai le Uo. Ou te tautala atu i lo outou vasega a le alii Palemia e leai se fale o tuuina i le Uafu lea i Salelologa.

Lau Afioga a le alii Minisita o Galuega, po o le a lau silafaga, e le o se luma ea lena o le Malo o Samoa, e selau ma selau papalagi ia o lo o i ai i Savaii a o mai pasese i luga e timuia, laina e leai se fale e mapu i ai, o le mea taalo. Ou te le faapea atu la ona o le Uafu o le Faasaleleaga ma o a’u o le Faipule o lea itumalo, e leai o le uafu o le Malo o Samoa. A o lau Susuga la a le Minisita o Galuega ou te le fesili atu pe ou te faamasinoa ou sese pe ou te fia fai ma faiaoga ia te oe na ona ou te tautala sao atu, ua fai le luma o lo tatou malo o lo o leaga mea lea ia matua fia le mea ua i ai a e taatia ia o Asau latou a uma nei uafu ona toe fai le ape a umi le soifua. Ou te masalo i lou taofi ou te iloa o faapea foi Minisita sa galulue i lea tausaga atoa ma se vasega tuai o e sa latou tauaveina mai lenei galuega faigata, o le a faapea mai, o ai lea tootoo o le a toe fai le mea ua uma ona fai, ioe, ou te iloa o lo o faapena, ma o la tatou lava aganuu a sese se mea ma toe fai. Ou te matua tau atu e sese.

Le alii Palemia e, ma le Kapeneta, ou te faamanatu atu pea i o outou finagalo ma ia malu ave i fale i lou tautala atu ona o le alofa moni mo Samoa. E nonofo lava tatou ma toe faalelei tatou, e nonofo foi tatou ma toe faaleaga tatou, nei tele vave lo tatou manao a e vaivai a tatou seleni e mativa le fale o Samoa, a o mata o le poto e i le fale o le mativa, o le upu lea a le poto o Solomona.

Ua aliali mai foi e pei ona taua e se isi tootoo le faigata o le faiga o a latou faatoaga i o latou aao i aiga ausage ma

le taitoatasi o lo o valaau atu foi le Minisita o Faatoaga e fai mai lea ma lea. Maimau lava pe ana fai e tutusa o tatou loto ma ia i ai i o outou finagalo le tulafono o le alofa o le Faavae o Samoa, ua maimau lava lea vaega tupe o le a fai ai le uafu i Asau pe ana lilo ane ia sei tali ai le manao o fai faatoaga a e tufatufa atu i ai e fai ma aitalafu ia i latou a e toe totogi mai, a e sei fesoasoani atu ai i aao o ia tagata faifaatoaga. O a ea la sa tatou silafaga i ai i le lumanai pe afai e mafai ona faia ia fuafuaga, o ou lava mafaufauga o lo o ou tautala atu ai ma fola i luma o le Fono. E le ua tatau ea ona matua ola lelei faatoaga uma a nai e au vaivai ma taitoatasi ole atunuu, vagana ai na o le tupe e mafai ai na o tatou foi lenei ua tietie ma maua o tatou alauni ma a tatou tupe o le a fesoasoani foi i a tatou faatoaga a e talofa i galuega ia e fai nei, ou te matua tau atu a matua talia le manao lenei, a e taatia ia o le uafu ia e toe fai lav pea manao i ai Samoa. O lau mate i le Malo o Samoa le alii Palemia e ma le Kapeneta ma le mamalu o lenei fono ou te tautala atu ai. Sa ia te au le isi upu a le poto foi, “Ina pupue ia ma tatou o alope iti o lo o faamaumau ai vine.” O Samoa ma lona Malo o le Vine a e silasila foi o lo tatou faatamala i nai mea iti, e i ai faatoaga, ma auuala o matou i Savaii ou te matua tau atu e matua pesi le faama’i mata aua e taumafa le ea o le auuala, e taumafa le palapala e tamalii ma tupu o Samoa. Ia tele se faamanuiaga a le Atua, ma ia afio ifo le agaga o le Atua i lo outou vasega.

Afioga LESA ANISI



Itumalo Faaalalafaga:

Aiga i le Tai

Filifilia:

10 Aperila 1964

Faatauto:

16 Aperila 1964

Lauga Faataupou:

24 Iuni 1964

Lau Tofa a le Fofoga Fetalai ma le mamalu o le Fono, ua out u atu foi e fai sina ou mafaufauga e tusa ma le tulaga aua tatou i ai nei. E fia tuu atu sau faafetai ma lou faamalo i le Kapeneta e tusa ma galuega lelei sa feagai ma i latou a o lei amataina le Fono o le aso. Ou te faamalo atu i le alii Minisita o Tupe ma le laulauga lelei mai o lana Lauga faapea foi le iloiloga auiliili o le Tala Faatauto o le Tupe mo le faaiuga o lenei tausaga. Ou te talitonu a’u o faitioga agai i le Kapeneta, o se sao lelei lea mai sui usufono uma lava, a e le o se lui lea mo i latou. Le mamalu o le fono, ma le Fofoga Fetalai e muamua ona ou fia faatepa le mamalu o le Fono i tusi ia e lua, o le tusi lea o le tusi o Tupe mo le tausaga ua mavae atu, o lo o i ai foi ma le tusi o tupe o le tausaga e 1962, a o le tusi lenei mo le tausaga e 1964 o ela o le a talanoaina i se vaitaimi o lumanai nei. O le tusi lenei o le tusi lea o Tulafono Tumau a le Malo talu ona maua le Malo Tutoatasi a o lo o i i nei le isi pepa o le tusi faaopoopo. O le Pepa fou lea ua aumai i le suiga fou a le Palemene fou o lo o nofoia nei, vaai la i le eseese o ia tusi. O se uiga la ua aliali mai nei ua alualu i tua le galuega lea. Sa sili ina ua amata le Malo Tutoatasi, a o le tausaga nei ina ua i ai le suiga a usufono fou ua agai lava i le tulaga faale-lelei o le

Matagaluega lea, ua aliali mai lea le upu foi lea faapea ua tatou iloaia e faapea – “Ua ofutino, ofutino toe mitiafu”. Ona o afifi pepa faapea ia ua tuu mai i o tatou luma vae atu le mamalu o lenei Fono. O le mea ua aliali mai i le tulaga o nei pepa, ma lenei tusi, ua eseese le va, i le lelei ona saunia o nei tusi. Ua matuai fai lelei o latou ufi tusi, a o lea e leai, o le pogai, ua aliali mai se mea ua tupu i totonu o le matagaluega ua faalelava le faautauta ma le fuafuaga ua i ai i lenei vaitaimi. O le alii sa avea ma pule i totonu o le Fale Lomitusi a le Malo, ua faateaina o ia, a o le i uma lona taimi, ua aliali mai la ina ua uma se suesuega e lei faaslaina o ia, a ua ave tupe a le Malo e faaolaina ai taimi sa i ai le alii nei ona maua ai lea o le tupe e sili atu e £1,600 ua ave i ai a e le lelei le galuega. O le fesili la, o ai e pogai mai ai lenei tulaga faapenei ua ala ai ona leiloa lenei tupe? Ou te faapea atu, o le Ofisa o le Komesina e pulea le aufaigaluega a le Malo ua le lava le faautauta ma ua le lava le puipuga o taata faigaleuga, e le faautauta i le vaaiga ma le faasoasoaina o tupe a le Malo ma ua aliali mai ai nei e faale lelei lenei matagaluega e tusa ma tulaga ua aliali mai nei, ua lusi tetele ai le Malo ona o ia fuafuaga faaletonu. O tulaga o tagata e pulea Fale Lomitusi, o nisi e pasi mai i le Iunivesite, a o le tulaga o le aveese o lenei tagata, o le malaia o le a tatou toe oo atu i ai. O le tulaga foi o lo i ai lenei Fale Lomitusi, o loo i ai ni lipoti mai vaega eseese o matagaluega a le Malo o lo o faapea o lo o tele le taimi faaopoopo o lo o galulue ai i latou a e le o mafai ona latou faavaveveina le galuega ina ia maua tusi i taimi ma itula ua tatau ai mo le faaogaina i totonu o vaega eseese o Ofisa o le Malo. Afai o le a alu faapenei lenei fale lomitusi e tusa ma le faatonuga a le alii e pulea galuega a le Malo, o ai o le a na faia? Ua i ai ‘ea se isi o lo o tatou Malo ua agavaa i lea galuega? Afai o i ai faafetai. A o se tulaga e ao ina tuuina atu i se tagata ua maua lona lona poto, e le gat ail e poto i nanu, a ia poto foi i vaega eseese. Ou te manatua, po ua ono ‘ea tausaga talu ona talanoaina tupe sa tuuina atu e faatau mai ai nei masini, ua ou le manatua i le vaitaimi lenei pe atoa lea le £21,000 o se tupe maoae lava lea a le atunuu o lo o ua fusifusia ai iina, ua ao ai foi la ina ia i ai se isi e agavaa i le vaaiga lelei o masini ia aua le vaai atu i tupulaga o le atunuu o lo o tutupu mai nei. O lo o taua i i nei i le lipoti a le alii Minisita o Tupe e faapea, o lo o i ai se tasi o i i nei sa faufautua agai i le tulaga alea o le fuafuaga tau le atiina ae o le atunuu, afai o le a faataunuuna lea tulaga, e ao ina lote ai foi e lea alii le tulaga lea i le fale lomitusi, aua o lo o tele pea le tupe a le atunuu o lo o alu ai nei.

O le vaega o Fa’i. Sa ou faitau i le lauga a le alii Minisita ma le faanoanoa lava e tusa ma le faa’upuga i le mataupu lea e uiga i le faatau atu o fa’i i fafo ua aliali mai ai nei le faaletonu. E moi o lo o popole le alii e tusa ma lenei tulaga ua oo i ai, a o lo o faapea mai upu, o Savaii o lo o faateleina mai ai le fa’i, masalo o le a tele mai Savaii, a o le a faapefea la Upolu o le a faafilemu pea Upolu faapenei ma faapea e tuu ia Savaii le fa’i. Ou te fia faafetai atu i le lauga matagofie lea a le alii Minisita o Faatoaga, ua ese lava ma lona matagofie ma o se mea lava e fia talosaga atu ai i tagata o le atunuu ina ia mafai ona lagolagoina le fautuaga sa tuuina atu e le alii Minisita, o se mea ua tatau ma ua sao lea tulaga. A le mfai ona ‘au faatasi le atunuu ina ia mafai ona totoina lea

tamaoiga, e le mafai lava ona tatou maua se lelei i ni tausaga o lumanai. O le isi mea ua talosagaina ai le alii Minisita o Faatoaga, sei tagai aen i le tulag ao vailaau ia na aumai e faalelei ai fa'i, sei fai ma mea e tapeina ai lenei faama'i, e tele tupe a le atunuu na alu ai a e oo mai i le taimi nei e leai lava se mea ua aliali mai faapea ua aoga le vailaau lea i fa'i ua lavea i le faama'i, a o lea o le a mou mou malie atu lava fa'i latou a e alu lava le faama'i fa'i ia i le atoa. O lo o maua nei le faamanuiaga i le fa'i mai Savaii, faafetai a e a tuu foi Savaii e pei o le tuua o Upolu ae leai se mea e faia ia mafai ai ona tea ese ai lenei faama'i. o le a faapea foi ona aliali mai lea faama'i fa'i i Savaii. O le a leai la se lumanai o le fa'i pe a le mafai ona aiaia e le Ofisa o Faatoaga ina ia fai i ai se faiga tonu e tapeina ai lea faama'i. O le tulaga lea o le lipoti o le fa'i i totonu o le Tala o le Tupe; o lo o i ai le tupe pau mai e £13,770 ou te le matauina pe fia foi nisi pau i le tausaga e 1963. Afai o le tulaga lea o le a faapea ona alu, ai o le a le mafai lava ona tutu aai le tulaga o le maketi o lo o faatau ai fa'i i totonu o le atunuu, o le a le mafai ona alululu i luma e pei o le tulaga lea, a alu alu uma le tupe a le atunuu ma le au fai fa'i o lo o teuina e le Malo e totogi ai le pau lea, o le a fai fai uma le tupe a leai la se tupe, o le a le mea o le a aliali mai, o le a faaoga loa lava tupe a le Malo, a uma le tupe a le Malo, o le a le mea o le a aliali mai, o le a fai loa faiga, aua ua pipili le tulaga o le Fa'i, o le a le aoga le tulaga o le fa'i i le vaitaimi lenei. Afai e faaitiitia le fa'i i totonu o le fale fa'i, ma mea o lo o maua mai nei e le atunuu ua ao foi la ona faaitiitia le au faigaluega, aua o le autu moni a toatele le aufaigaluega ua le mafai foi ona faapaleni le tulaga o lo o sau ai le tupe o fa'i a le atunuu.

O le faatau atu o fa'i i le pasia i tua. o lo o faanoanoa lava lou loto ona o le alii Minisita, o ia lava sa na tuu le lafo i le Maota lenei i el tausaga na tea atu e uiga i fa'i ua le pasia ina ia faapau le tau. Sa faatau atu i le 4/- aua fai le lafo a le alii Minisita nei ina ia faapau le tau o pusa fa'i leaga i le 2/- i le pusa fa'i. Sa faia lelei lava ina ua oo lata mai nei le alii i le nofoaga o le Minisita o le fale fa'i, ua toe suia foi nisi faiga ua 4/- foi nisi pusa fa'i. O le a ea le tulaga ua faapea ai ona fai? Sa ou i ai i le tasi aso ma ou asiasi tonu i le aso sa faatau ai pusa fa'i, ona ou vaai ai loa lea o itu nei:- O le tulaga muamua mai e aumai a latou pusa fa'i. O le vaega e 4/- a faapea e te alu atu a e 3/- pe 4/- ua ave alu tusi i le alii pule o le fale fa'i, ina ia taofi mai ai le pus alea mo oe, pe ai se ā? Afai e 4/- ua ao loa ina faaitietie i se taavale a le Malo ae tufa atu i ē e ona pusa fa'i ia e tai 4/-.

Afioga LEUTELE POUTOA



Itumalo Faaalafaga:

Anoamaa Sasae

Filifilia:

10 Aperila 1964

Faatauto:

16 Aperila 1964

Lauga Faataupou:

26 & 29 Iuni 1964

Lau Tofa a le Fofoga Fetalai ma le mamalu o le fonon.

Faafetai tele i le avanoa ua tuuina mai mo au i lenei iutla.

O le faafetai foi i le alii Minisita o Tupe e tusa i le matagofie ua i luma nei o le Maota ma ua fai ma mea e laga ai le tele o mataupu taua mo le atiina a'e o le manuia mo le Malo o Samoa. O le mea muamua e faaali ai lava lou fiafia ona o le mataupu i Uafu. Ua fai le Uafu ma o se lui tele lea i le Malo o Samoa. Ina ia mataala ai le Malo o Samoa i ana aiaiga mo le Atiina a'e. Aua o le uafu lenei ua tuu mai ai le isi fesili taua ia Samoa; po o a mea o le a lau i le uafu lea. Ma o le galuega moni lea a le Maota Fonon lenei o le saili o auala e maua ai mea e lau i le uafu lea. O le mea muamua e ao ina faia, o auala ia e ao ina faia ia lelei ia soo ai Samoa. E pei ona silafia o lo o i ai nisi nuu latou te lei iloa lava ua fai le Malo o Samoa, aua e le i oo atu lava i ai auala. E i ai le itumalo o Fagaloo, aua e lei oo i ai auala ia Fagaloo. E i ai la nuu ia e i lou itumalo o Sauago ma Saletele. O lea ou te talosagaina ai le Minisita o Galuega ina ia alofa ma faatanuina lea auala. Aua ou te mautinoa tasi lenei itumalo o lo o i le tausaga e 1963, i le amata mai ia Ianuari seia oo mai ia Me i le tausaga nei e 37,379 pusa fa'i sa auina atu e lou itumalo i fafo. O ia pusa afai o lo o taofi e le Malo le 1/- o le itute o ia pusa male Malo, o le tupe a le Malo na maua mai ai e £1,869.

O le popo sa auina atu e lou itumalo i lea lava tausaga e 1963, seia oo mai ia Me i le tausaga nei e 1,466 tone popo. Afai o le tiute a le Malo o lo o taofia ai le 5% i le tone o le tupe a le Malo o lo o maua ai e £7,330. Manatua e na o mea e lua ia, na o le popo ma le fa'i, a o le koko ma isi ala tupe eseese e le o lavea i lau tautalaga lenei, ae tele foi tupe e maua ai. O le tupe a le Malo mai lenei itumalo i nei ala tupe e lua, e £9,159. Afai la o le a aveese le £2,159 e totogi ai alii tofia o lo o galulue i lou itumalo, e toe ai le £7,000 mama a le Malo. O lea la e talosaga atu ai e lei lava ea lenei £7,000 tupe mama e fesoasoani ai sei fai ai o matou auala i Sauago ma Saletele. Aua o le tasi lea mea sili i le atunuu lenei o auala. Ana fai e oo atu auala i nei itumalo o Sauago ma Saletele, ou te talitonu e toe faaopoopo le isi 10,000 o pusa fa'i i tausaga o lumanai. E pei ona silafia o le mea lava e i ai le auala e tusa po o le a le vaomatua, a e a oo i ai le auala, o le a mau ai foi ma tagata.

O le itu i le popo, o le tasi lea ala manuia a le atunuu lenei, ma ou te taofi o le tele o gaoioiga o lo o faia nei i le popo a le Ofisa o Faatoaga e le o manuia, e i ai le auina atu o tagata e faitau niu, tasi lea tupe tele ua alu fua lava. O le a le mea e faitau ai fua niu latou, aua o la e ola a'e niu latou ma iloa e nuu la la'u mai o fua o a latou faatoaga, a o le faitau fua lava ma maimau ai lenei tupe tele ae ana alu le tupe tele e fai ai auala po o aoga. O le itu i le faatamaia o le niu e le manu'ainiu, ua tele taumafaiga a le Malo i ai, ae le o manuia na o lenei lava mea ou te talosagaina ai e pei o nisi tootoo ua mavae atu, afai e i ai se isi faatatau e leai se isi faatatau e sili na o le tuuina atu lea i tua i nuu taitasi, aua o lo o i ai le mamalu ma le puipuiga i alii ma faipule o lea alaafaga ma lea alaafaga, ma ia faatonuina ia sue manu tagata uma. O le pule la a alii ma faipule e mafai ai ona sue manu tagata, a e le mafai ona usitai i faatonuga a le Malo. Aua o lo o i ai i alii ma faipule o lea afioaga ma lea afioaga lo latou silafia lelei lava o o latou tagata, latou e iloa ai o ai lea, ao ai lea, ina ia mafai ai ona sue manu uma tagata. A e le mafai ona iloa e le Malo pe afai e alu

atu se isi o le Malo na te faia lea galuega, a ua lava le Pulenuu e fai ma sui o le Malo i lea alaafaga ma lea alaafaga e faaopopo iai le mamalu o le pulega a alii ma faipule. Olea ou te talosagaina ai lava lenei Maota Fono ina ia faia ni aiaiga ma ni tulafono e avatu ai le malosi i le pulenuu mo le puipuiga o lea galuega ole sueina lea o le manu'ainiu. Ma ia alofa le Malo ma lenei Maota Fono ia fai ia lelei le togoti o le Pulenuu.

O le komo o le tasi lea laau taua ma le lelei e maua ai le tamaoiga o Samoa. E pei ona silafia ua pau le tau o le koko i nei aso. Ona ua faaetonu le koko a Samoa ua faale lelei ona saunia. E i ai le laasaga faigata o le Koko. O le laasaga faigata, aua e ese Samoa i atunuu e tele o le lalolagi. O Samoa e fa ituaiga koko, ma o ia ituaig ae fa e tofu ma lona tulafono e saunia lelei ai o le ala lea e le mafai ai, aua o le koko a Samoa e le faailogaina a e palu faatasi lava nei ituaiga e fa. O lea foi e tiga lava ona taumafai atu ma taumafai, a e le mafai lava aua e pei ona ou fai atu e fa ituaiga e tofu lava ma lona faiga. O le ala ou te talosagaina ai lava le Maota e leai se isi togafiti e fai ai seiloga lava e matua tago i ai le Malo.

O le fa'i. E faanoanoa lava loua gaga e faatatau i lenei tamaoiga aua o le sefulu lenei o tausaga po o le sili atu a o lo o tumau pea le fa'i a Samoa i le £1. 4. 0. i le pusa. A e a tatou faatatau atu i le tau o mea e lau mai nei ma Niu Sila, o lo o siisii pea agai i luga le tau i tausaga uma. Pe le mafai ea e le afioga a le alii Minisita ona talsoagaina sei sii a'e le tau o la tatou fa'i i luga. O le faaogaina o le tau lea i le faiga o le £1. 4. 0. lenei, o le tau o le atigi pusa e 7/6d o le tupe e avatu i le o puapuagatia i le faiga o pusa fa'i e 11/- o le togoti o le aualii e pasia le fa'i e 4/- i le pusa. O le inisiuaina o le pusa fa'i i le laupapa e 3d i le pusa. O le inisiuaina o le fa'i pe a tupu ai se faalavelave e 3d i le pusa. O le tiute a ave ma le malo e 1/- i lepusa ona maua ai lea o le £1. 4. 0d e faaogaina i gaoioiga esese ua lavea ai ma e o lo o tigaina e toto le fa'i. a o le 3/6d o lo o aveina e le Ofisa o Faatoaga masalo ai o i ai nisi a latou faiga e fai ai.


O le ava e tatau ai i lau Tofa a le Fofoga Fetalai ma le mamalu o le Fono Aoao a le Palemene o Samoa, e faafetai atu mo le avanoa ua tuuina mai.

O le fai. Ona o le mataupu i le sueina o atigi pusa, o le Ofisa o Faatoaga i le amataina mai o le fa'i i le tausaga e 1927 seia oo mai lava i le aso, o lo o faaauauina pea lava le taofia o le inisiua o le atigi pusa a e lei i ai se faalavelave e tupu mai ai, a o lea la e talosagaina ai, pe mafai ona taofia ole inisiuaina o le atigi pusa a e aveane le tupe lea e faaopopo i le tau o le fa'i ina ia fesoasoani i le aufai fa'i? O le taro. Ou te momoli atu le faafetai tele i le Ofisa o Faatoaga ona o lenei foi mea fou ua aliali mai o le taro ua auina atu i Niu Sila. E mni lava sa i ai nisi tootoo sa faitioina le taro, a e ou te lagona ua i ai foi la lenei alamanuia ua auina atu i Niu Sila le taro o le a tumafai foi tagata i Niu Sila e faamasani ona taumafa i le taro ma faalateleina ai lava e pei o le amataga o le fa'i. Silasila foi o le amataga o le fa'i, sa na o le 5/- i le pusa, a o lenei o le taro e $\frac{16}{10}$ i le pusa. Atonu ai a taumamafa uma Niu Sila i le taro, o le a manaomia tele lava ma o le a maua foi se tau lelei e fesoasoani mai pe a oo ina faaleagaina pea le fa'i. O lea ou te faapea atu ai, ona ua laitiiti lou taimi, o nisi nei mea ou te fautuaina ai lenei Maota ina ia taumafai i ai e i ai aano o manu tuuapa o i'i

ma isi mea uma faapena, o ia mea uma e mafai lava ona gaosia i Samoa pe a liliu i ai Samoa e fai, o lo o faaalua mai ai ilea alamanuia e lava le afa miliona pauni o le tupe o le a le alu ese atu i faf ope afai o le a faia e i tatou, o le a faasoina ai lava lea afa miliona pauni pe afai o le a gaosia ia mea i totonu o Samoa nei.

O tagata tafafao mai. Ou te talosagaina ai lenei Maota ina ia faaavanoaina iinei tagata tafafao mai, aua o le tasi lea alatupe tele e fesoasoani mai i le Malo.

Tofa MANO TOGAMAU



Itumalo Faaalaalafaga:

Siumu

Filifilia:

10 Aperila 1964

Faatauto:

16 Aperila 1964

Lauga Faataupou:

17 Novema 1964

Lau Tofa a le Fofoga Fetalai ma Sui mamalu o lenei

Maota, out e fia tautala fo'i i le Faamatalaga tau Tupe e tusa ma saunoaga a le Minisita o Tupe, ma le fia lavea atu ai foi ma lona Lua o Faamatalaga Faaopopo o le Tupe. Ou te muamua lava ona avatu le faamalo i le alii Minisita o Tupe ona o le maopopo o lenei galuega fita i le fausia o lenei Lipoti umi ua na faamalamalamaina mai ai itu esese o gaoioiga a le Malo, aemaise lava le itu i le tulaga faigata tau tupe ua le paleni e tusa ma Tupe, ma ua ia faailoa mai foi ia i tatou le Tupe Teu a le Malo e tusa ma le 20035pauni ma ua tatau ai ona maua lenei aofaiga ina ia talafeagai ma le paleni o tupe alu ua sili atu i lo upe na faatatauina.

Ou te fia tautala muamua i le fefa'ataua'iga ma atunuu i fafo, aua ua ou lagona o le a aveava lava lenei itu ma faafitauli i le atunuu e le gata o le taimi nei, a e atoa foi ma tausaga o lata mai. O fuainumera o lo o faamauina e pei ona faaalua mai, o le tupe toe o le fefaatauaiga o le 1962 ua pa'u ifo i lalo i le 103,000pauni a o le 1963, ua toe manu a'e ai se isi tupe ua le tala feagai ai ma le isi foi 493,000pauni mai le aso 31 Setema o lena lava tausaga, ua toe faaopopo atu ai la le 229,670pauni i le tupe alu ua sili atu i lo le tupe na faatatauina mo le fefa'ataua'iga o lea tausaga, e maua se fuainumera e 70,000pauni, ua ta'ua uma lava o tupe alu ua sili atu i lo tupe na faatatauina. E pei ona ou talitonu lava a'u, afai o se Malo Tutoatasi o loo faavae a'e ona Mataupu i le faa-Temokarasi, e ao lava ona tatou tausisi atu pea i a tatou fesootaiga fa'auo ma isi Malo, ma ua tatau lava i lenei vaitaimi ona ia taumafai le pulega o le Malo ia faaitiitia oloa e auina mai i atunuu e 15 e pei ona tusia faasolo mai ai i le Faamatalaga tau Tupe: Atunuu lava ia o loo tatou faatau mai ai a tatou mea taumafa.

O nisi fuainumera o loo faaalua mai i nei atunuu e 15, ua fetauti lelei lava; a o isi ua matua lava oloa e auina mai ma oloa e au'eseina atu. Ou te matua fautuaina ai lava le alii Minisita o Tupe ma le Kapeneta ina ia latou matua iloilo ina mae'a lea itu faigata e pei ona o le a tatou faafeagai ai i tausaga o lumana'i.

Ua tatou mautinoa lava lenei mea moni e uiga i le fai ua matua aga'i ifo lava i lalo, e faapea foi ma le tau o le

popo. O la tatou koko foi ua faapea lava ona aga'iga'i pea o le tau i lalo ma, ua tataua ona matua sailia nisi tupe ia maua mai e faafetaui a'i ma a tatou oloa faaulufale mai, ma ia maua ai foi ni a tatou tupe faavae mo le tele o a tatou galuega tetele o loo feagai ai. Ua tatou silafia lava lenei itu; pe afai o le a tatou lavea nei i se afa ma ni matagi vale ma faaleagaina ai lo tatou tamaoiga e tusa lava ma le pule a le Silisili Ese, o le a oo loa ina feagai i tatou ma se tulaga pagatia, e tusa lava po o le aitalafu lea e Miliona Pauni o loo sasao nei e Niu Sila e le taitai lava ona tatali ma gafatia e lona Miliona pauni; ae na ona i'u ai i lo tatou toe totogi atu i le (Miliona pauni) ma tatou te matua mafatia tele i le tau sailia o ni ala ma ni faiga e maua ai lona tupe pe afai o le faiga lava lea o loo tatou alu ai nei o le pa'u pea lava pea o le tau o fua o a tatou fa'atoaga

Silasila foi i le 653,000pauni ua ta'ua mai i le Faamatalaga tau tupe a le Minisita o Tupe sa maua mai i tagata tafafao mai fafo o e na ulufale mai i lo tatou atunuu i le 1963-1964. O se tulaga lelei e fiafia ai; o lea, o lau Tofa i le Fofoga o le Fono, ou te loto lava a'u ia o mai tagata tafafao i lo tatou atunuu. Ua matua faamaonia tele lava lona itu i itu eseese o le lalolagi e pei o Fiti ma Amerika Samoa e le o se mea leaga lea. O nei atunuu latou ati a'e ni fale talimalo; a e ou te le malamalama a'u i le mafuaga ua tete'e ai le Malo i le faatuina ma le faia lelei o nei itu aoga. Ou te manatu ai a'u, ua tataua i le Malo ona faia ni tulafono e puipui a'i i latou o e tafafao ma ulufale mai i totonu o lo tatou atunuu ina ia tatou maua ai lenei ala tupe maua mo lo tatou nei foi atunuu. Ao nisi itu faafitauli e aliali mai i tagata tafafao mai fafo, e mafai lava e i tatou ona tau faaleleia na uiga ina ia tatou manumalo i ai i le tele o ni itu faaletonu o le a ono aliali mai; aua o na lava foi uiga o loo i totonu lava o lo tatou foi atunuu. O lea tatou te le soona popole tele i ai, aua o uiga lava na o lenei olaga fesuisuia'i e pei ona ua tatou o'o nei i ai i le soifuaga o tagata, tatou te le maalofia lava, aua tusa lava pe tatou te mumusu ai pe manana'o foi i ai, ae o'o mai lava ia i tatou.

Ou te fautuaina atu ai lava le Malo ina ia fausia ni fale talimalo i totonu o lo tatou atunuu. Afai ua le lava ni tupe a lo tatou Malo, ua tataua ona valaau atu i le atunuu e aumai ni o latou sea, o matai, fafine ma tamaiti ma tagata uma, aua afai o le a alualu manuia lea itu i e tafafao mai fafo, o le a maua ai lava i le malo lona sao e tataua ai e faapea foi ma tagata o le atunuu; aemaise lava le au fai sea ia, ma alualu lelei ai lava ona agai i luma ae afai o ni faafitauli e uiga i amioga ae tafafao mai e pei ona ta'ua, e faigofie lava le faiga i ai, aua o le a faia lava i totonu o lenei maota tulafono e puipui malu ai na uiga faaletonu. Ua tatou i ai iinei ina ia tatou faia le mea tonu e manuia ma lelei ai o tatou lava tagata ae le ona ia faaleagaina ai i latou. E leai lava se mea e faigata pe a aiaia lava i finagalo maopoopo o lenei Maota Fono.

O le itu i lo tatou alamanuia tau le popo, out e faaailoa atu e a'u, o le itu lava lenei ua au tausaga o manuia ai lenei atunuu, ma o le tulaga No.1 lava lona o alamanuia uma o lenei atunuu. Ao se itu e faanoanoa ma te'i ai ina ua aliali mai i fuainumera faamauiina o le 1919 e 16,000 tone popo sa maua i totonu o le atunuu, ma, sa toe faatotoeina le tului atu i le 18,000 tone popo sa maua; a o aso nei ua tatou vaai atu nei i le tupe mama o le popoona

o le 12,000pauni, o se faaitiitiga tele lava lea ma a ou tau faatusatusa atu le popo sa maua i le 1919 ae sa na o le 36,000 le faitau aofa'i o tagata o le atunuu atoa. O le aofa'i la o popo sa sali e le tagata e toatasi e tusa ma le 16,000 a o le faatatau i tone e 120 tone popo i le tausaga, a o lenei la ua oo le faitau aofai o le atunuu i le 115,000, a ua latou salia popo na o le 15,000 tone ma ua tatou mautinoa ai e tusa e 20 pauna popo e sali e le tagata e toatasi. O se faatusatusaga e matua le fetauti tele lona i lau Tofa a le Fofoga Fetala'i ona o le pa'u ifo pea aga'i i lalo o lenei alamanuia o le atunuu.

O fuainumera faamauiina o le Tusiga Igoa o le atunuu e tusa e 6,000 Matai o le atunuu atoa; ae afai e i ai se itu e faaletonu ai ona faapea lea ia tau ia o le to'a 5,000 Matai. Afai la e totona e le matai e toatasi le 600 niu fou i le tausaga, o lona uiga o le a maua ai e i tatou le 3,000,000 niu fou. A oo ina fua main a niu fou, o le a maua ai se tupe tele e tusa ma le 1,500,000pauni ma ua tatou mautinoa ai nei la e 30,669 tone popo e maua ai i le aso e tasi, ma e faateleina la i le 365 aso o le tausaga ona tatou maua ai loa lea o le 11,194,185 tone popo ma afai tatou te faaopoopo atu lona numera i le tulaga o lo o i ai nei le itu tau lea alamanuia, tatou te maua mai ai lava se aofa'iga tele lava.

Lau Tofa le Fofoga o le Fono, ua faaalua i le Tala Faatatau o le Tupe, o le aofa'iga o Tupe alu mo le 1965 o le a tu mai i se tulaga e 2,187,360pauni ma o lo'u la taofi, o se tupe tele lava o le a faaalua e le Malo ma a ou toe vaai ifo i lalo i isi itulau, ma ua ou maua ai le 1,024,225 o le a faaalua foi mo le Tausiga. Ao se itu e sili atu ona matua faapopoleina ai nei, pe a tatou manatua o le a iai pea lava tupe faaalu e aliali mai pea i lea tausaga ma lea tausaga e masani ai ma o le aofa'iga lava lona o tupe alu i le tausiga i le faagasologa o le tausaga na se'i mavae atu nei.

E i ai foi se vaega tupe faaopoopo ua faataatia ese i le Tala o le Tupe mo le atiina a'e o lea out e lagona, e tataua lava ona faaalua e le Malo sea vaega tupe ititi e faamalieina ai le manaoga o tagata o le atunuu o loo talosaga mai pea mo le atiina a'e. O le tasi foi itu e te'i ai, ona ua tatou taunuu i se tupe alu ua sili mamao atu i lo tupe sa faatatauina e 2,270,715pauni talu ai la lenei tupe alu ua sili atu, o lona uiga o lea mea o le a toto'o loa le Malo i le Tupe Teu Fa'aagaaga o le Malo o Samoa i Sisifo ma faaoga loa ina ia tau faalelei ai le tupe alu lea ua faaoga pea lava o Tupe Teu Fa'aagaga i lea tausaga ma lea tausaga ma o le a leai ai sa tatou tupe o totoe ia tatou tupe teu i le Fale Tupe; a ua aliali mai foi le 619,000pauni ua toe faaalua foi o a tatou tupe o loo teu i fafo e totogi a'i a tatou aitalafu a le Malo i atunuu i fafo ma o se itu lava lea o le a matua faapopoleina ai le mafaufau. Ua tataua i le Malo ona saili nisi atu i lo tupe na faatatauina, a e le o le aapa atu pea ma faaoga tupe o loo teu faaagaaga a le atunuu.

O le itu i le (miliona pauni) lea ua faatulaga mai, e le lava lea numera. Sa fautuaina se (miliona pauni) mo atiina a'e eseese i lenei Maota ae o'o foi i lona numera e le lava. Out e manao a'u e aitalafu mai se 10 miliona pauni ina ia lava lelei ai atiina a'e eseese o le atunuu i lona Malo. Sa ou faaogaina ni tupe se tele e taumafai ai sa'u faatoaga i le totona ai o laau, a na leai na tupe ou te taitai lava taunuu atu i se uiga lelei e pei ona ou i ai nei.

Out e tautala i mea moni ua ou faia ma va'ava'ai i ai. Na o le o'otia o le mafaufau i le alofa i nisi o le atunuu o loo latou taumafai pea e atiina a'e le lauelele i le faiga o faatoaga. O nisi lava tagata e oo lava ina mama'i ai ina ua fiu i ta le vaomatua ma i'u ai loa ina mumusu ma le taulau lo latou faamoemoe i se faatoaga ona o le faigata o le atiina a'e pe a leai se tupe e fai ai ia atiina a'e. O le mea lea, o lau Tofa le Fofoga o le Fono, ou te fautuaina ai le Malo ina ia tuuina atu se vaega tupe fesoasoani mo le atiina a'e o faatoaga a tagata o le atunuu, ona tatou le faanoanoa ai lea i lena itu e tusa i la latou taumafaiga aoga.

O lo'u lava talitonuga, o tupe maua uma lava o le fa'i ma le popo e faitau miliona pauni tatou te maua pe ana se'i fai lelei pulega o nei alamanuia- faato'a mafai lava ona lelei o na itu pe a lava lelei tupe e faaleleia ai lo latou atiina a'e ma le galuea'iina; a e afai na ona tatou vina pea i le atiina a'e ma le faateleina o fua o a tatou faatoaga a e leai ni tupe e faagaioia, na o le atili ai ona faateleina o o tatou faafitauli a e le faaitiitiina ai.

Ou te faai'u atu i lo'u talosagaina o le Malo ina ia sailia ma aiaia ni faiga mautu ma ni ala lelei e siitia a'e ai ni tupe ia lava e fesoasoani atu ai i tagata o si atunuu mo le atiina a'e o lona tamaoiga.

Tofa MAPUILESUA MALO



Itumalo Faaalaalafaga:

Palauli le Falefa

Filifilia:

10 Aperila 1964

Faatauto:

16 Aperila 1964

Lauga Faataupou:

26 Iuni 1964

Faafetai i lau tofa a le Fofoga o le Fono, faafetai foi i le fonotaga mamamlu ina ua maua se avanoa emafai ona ou tautala atu ai e faaali atu se mafaufauga e tusa ma le mataupu ua i ai nei i luga o le laulau. Faafetai lava i le alii Minisita o Tupe ona o lenei lauga manaia ua faaalii i totonu o lenei fonotaga. Ua aliali mai lava i le lauga a le alii Minisita o Tupe ua matua faamalamalamaina ai nei itu uma lava, ua leai se mea o faaletonu pe aumaia ai foi ni faafitauli po o ni mea o le a aliali mai e tutupu i le tausaga o lo o lumanai nei. Ou te faafetai atu fi ona ole nofo a Minisita i le tausaga ua mavae ma la latou galuega maeaea e oo foi i le suiga fou ua i ai nei. E ui ina ua faatoa nofoia a ua faamoemoe lava lenei fono mamalu o lea a mafai ona outou galueaiina ma atiina a'e mea e manuia ai ma faatinoina mai mea ua manomia e Salafai po o Upolu, ina ia faataunuuina e tusa ma ona tulaga ua i ai. Ou te matua momoli atu foi le faafetai tele i le alii Minisita o Tupe ina ua aliali mai i lenei galuega faigata ma le fita e pei ona taua e nisi tootoo i le taimi ua mavae, o le faaopoopoina, le toeseina, ma le vaevaeina, aua ua le tofu oo foi i ai le malamalamaga o lenei fonotaga i lea vaega, o lea e matua momoli atu ai le faafetai tele ona o ia uiga ua aliali mai, ma ua faaali mai ai mea ol e a tutupu ina ia agai tonu i ai mafaufauga o lene fonotaga. E faapenei atu ai lou manatu ua ou malamalama e tusa ma le faamalamalamaina o le Tala o le Tupe aepeitai, e avatu


ai ni nai faufautuaga po o ni nai manatu e pei ona tatou i ai nei i tulaga o le fonotaga, ma ua faaali atu ai faapenei ina ia faatunuuina ona o ni lafo o i ai po o ni manao mai itumalo i tua e tusa ma le atiina a'e o mea e manuia ai le Malo e pei o popo, koko, fa'i atoa foi ma vai paipa po o a mea faapea ua taua e pei ona taua e lenei fonotaga. Ou te faaali atu ai faapenei i le alii Palemia ma le Kapeneta ina ia alofagia lava ma ia tuuina atu se pule malosi i alii Pulenuu i nuu taitasi o le atunuu faatasi ma le galuega a alii ma faipule ina ia taumafai e atiina a'e ai le tamaoiga i totonu o Samoa; aua ua tatou iloa tino ua leai se tamaoiga e maua i nisi fuafuaga o i ai, a avatu ni alii Pule faatoaga po o ni alii Asiasi Fa'i, a uma lo latou taimi ua o mai ona faasaga foi lea o le tagata faiaiga ia e fai lona loto, a e tuu le mea e tatau ona fai, aua le atiina a'e o Samoa ma lona lumanai, aua ua aliali mai ua pau nei le fa'i, faatasi ma lekoko a e na o le popo o lo o manuia i lenei taimi. Ou te faaluaina ai se taofi sa faaalii e se tasi sui sa talosagaina ai le mamalu o lenei fono, pe le mafai ea ona tuuina atu se vaega tupe mama o lo o i ai o le popo mo atiina a'e i nuu taitasi, a o lea tulaga ua tatau ona i ai ma se tulafoo e aiaia ai ina ia i ai ni sui o le Malo e vaaia po o faataunuuina ia fuafuaga pe leai, ina ia mafai ona tuuina atu se totogi pe tusa o le 1/- i le niu e tasi po o lo 2/- i le niu e tasi ina faamalie ai le au faifaatoaga ina ia alualu lelei pea ma solo manuia tulaga o le atiina a'e o Samoa i lona malo.

O le fa'i, o lona uiga ua aliali mai o se mea ua faamalolia lava i le faama'i, sa faalogo atu i se isi taimi faapea o Salafai e faapea o lo o malosai mai ai le fa'i, aua o Salafai foi ua tau fai atu nei le fa'i ona ua le mafai lava ona tetee le faama'i fa'i ua malosai tele lea faama'i. O lo o taumafai pea eogalulue i faatoaga faatasi ma i maotu e lagolagoina, aepeitai ua le mafai lava i ai se togafiti ma ua leai foi la ma se vailaau a le Malo e pei ona saunia se vailaau; po o le a taatia ia faapea aua o matou lava o lo o taumafai e tetee le faama'i a ua leai se auala e mafai ai ona taofia o lo o malosai pea lealu o le faama'i.

O le koko, ou te faaali atu se tulaga le manuia ua i ai, ona ua pau tele le tau, aepeitai o le a taumafai pea e tuuina atu se talosaga i le alii Minisita o Tupe pe i ai se avanoa emafai ai ona faaopoopoina atu se tau fesoasoani a le Malo i le koko in aia mafai ai ona toe atiina a'e lenei ala manuia, aua o le mea ua vaaia i ai e pei ona faaalii e nisi tootoo, ua matua fai ifo lava le tele o le koko, a e le gata i lea afai lava o le a pula ma pala ai ua faaleaogaina ua faaleamanaia ona ua musu tagata i le pau tele o le tau. Ou te talosaga atu ai e uiga i auala, aua o le tasi lenei o ala manuia o le atiina a'e o faatoaga o auala lava ae peitai o lo o i ai ilenei vai taimi le faale lelei o auala. O lo o aliali mai ua i ai foi nisi auala ua saunia e lenei itumalo ae le i pasia lava ma tuuina atu se tupe, aua ua manao si na nuu ia fia oo atu e vaaia maavatu se tupe e fesoasoani e toe faaumi atu ai le auala, aua o lea auala sa faia lava i o latou lima ma lo latou malosai ma amoina i ua maa, masa latou totogia foi taavale e la'u ai le oneone ma isi lava mea uma faapena, a o lea lava e le i oo atu i ai se fesoasoani a le Malo. E talosaga atu ai e pei o le auala o le tasi nuu o Sili. O lo o i ai foi i lena auala ni faafitauli se tele ua pei lava o ni vanu a e le o tao atu lava le Malo sei teuteu. A o na foi auala o lo o auina, mai ai le tamaoiga e pei foi o le fa'i, popo ma koko a le Malo, a o le mea o lo o i ai nei i

lau vaai; ai lava po o tau i le faiga e sili lo latou auala, aua olea foi auala na o se fesoasoani faatauavaa e oo mai i le aso ua pei lava o vanu le auala, ua ta alofa foi la i le au fai pisinisi ia latou taavale o lo o faaleagaina pea oona o le teuina o auala. Ou te talosaga atu ai foi ona o le mataupu i mea tau auala laupapa. Aua o nei auala ai sa talanoaina talu ai aepetai ua le faataunuina foi, o lea e toe faaoo atu ai le talosaga aua o lo o i ai le faafitauli i nei auala, ona o lea ua tau aliali mai pea faalavelave tutupu e lamatia ai le soifua o le atunuu faatasi a le felauaiga o le tamaoaiga o le atunuu pe a tafe faalausosoo lea vai malosi i Puleia, ua le mafai loa ona sao i ai se taavale e aumai ai pusa fa'i, ma o le mea o le a aliali mai o le a matua taofia lena o le tamaoaiga e pei ona taumafai i ai. E lavea ai foi faatasi ma le talosaga ua i ai i luma o le alii Palemia i tausaga ua mavae, i le auala laupapa i le oga totonu o Gataivai e femalagai ai i le isi itu vai i le isi itu vai o lea auala laupapa, ua leva ona i ai se faaaliga ma ua faatonuina foi o le a fai, ae peitai ua le i faataunuina lava, pe ai se a? O lea la e tuuina atu ai le talosaga ua tali fai fai pau se tamaitiiti i le aoga pe a tuua ona aliali mai ai lea o se faalavelave, a e le gata i lea o le femalagai. Sa oo atu foi le alii Palemia i le tatalaina o le ala, sa silasila lava i ai ma lana Kapeneta ua le manuia lea auala. O lea la sa faaaliga ai foi ma sa oo mai le faaaliga faapea o le a faia, na o ni tusi ua avatu o le a tatina lagolago a ua le maua foi po o le a le tulaga ua i ai ua le maua se faaaliga i se tonu sao, o lea e fia talosaga ai i luma o lenei Fono mamalu. E talosaga atu ai foi ma se tasi vaega, ona o le mataupu tau vai paipa ona o le soifua maloloina o le atunuu. O lo o i ai le talosaga a lenei itumalo ua leva ona taatia i luma o le fono po o luma foi o le alii Minisita o Galuega, a o lenei sa faaaliga foi ia matou sauni o le a aumai se vaega tupe, a ol e mea ua aliali mai ua uma atu foi lenei tausaga a e tilotilo atu lava e lei i ai se vaega tupe e tatau ona faagaioioiga ai lenei paipa aua o le manaoga o lo o i ai le tele o faatoaga o la foi e galala tagata i le fia inu ae leai se vai, o lona uiga o le mea o le a aliali mai, o le a tuu le galuega, aua ua le mafai a o lo o taumafai foi e atiina a'e lo tatou atunuu i tulaga e manuia ai. E toe lagolagoina ia se faaaliga a se tasi tootoo usufono, ona o le tatou paipa lea ua faataoto nei i le Faasaleleaga i lea Itumalo tele ma ua aliali mai ua le manuia ua na o ni nai taimi laitiiti lava e pamu ifo ai e le peapea la e i ai ni vai, a e pei e faasualua, a e sei taumafai se fuafuaga ina ia faamauina ona galueaina lea tulaga aua le manuia ma le soifua o le atunuu. O le mataupu lea ua faaaliga ma o lo o i ai foi nisi o alaalfaga ia Upolu nei e pei ona tagi mai i le fia faaleleia po o le fia faataunuina, o lea ua avatu ai i luma o lenei fono mamalu ma le faamaulalo lavalenei talosaga ina ia mafai ona iloilo ma ia faataunuina ia laasaga, mata e aofia ai le atunuu i ni faalavelave po o ni mea tutupu pe afai e le faataunuina nei faatautu. O le a faapau mai ai i se tautalaga e tusa ma lenei taimi, ia alofa le Atua ia faataunuina taualumaga a le Fono.

Afioga MASOE TULELE



Itumalo Faaalaalfaga:

Vaisigano No.1

Filifilia:

10 Aperila 1964

Faatauto:

16 Aperila 1964

Lauga Faataupu:

29 Iuni 1964

Le Fofoga o le Fono ma le mamalu o lenei Fono. I lena vaiaso seia oo mai i lenei taeao, o lo o faasagasaga tasi pea lava saunoaga ma fetalaiga i le tuuina atu o le faafetai ma le faamalo i le alii Minisita o Tupe. O se lauga matagofie ua tuuina mai i luma o le laulau a fono. I le ua moni lava lea faamoemoe, aua afai tatou te vaai ifo faale mafaufau i le lipoti ua tuuina mai, tatou te iloa ai le fita ma lona faigata, o le mea lea e tatau lava ona sausaunoa atu ma momoli atu le faafetai, aua o le 'au'au lea ma fatu lea o le Malo o Samoa. O lona fa lenei o aso o felafolafoai pea tootoole Fono ma ua o'oo'atu lava i uiga eseese ma matata esese ia saunoaga ma fetalaiga e tusa lava i lenei tauaofiaga, a o le mea o lo o aliali mai ma ua faatumutumu i ai ona o le taimi nei ua tatou oo i ia ua faale lelei fua o le laueleele o le atunuu. O le mea lea ua i ai se faamoemoe ia te au ou te faapea atu ai i lenei fono mamalu, o le a ea se togafiti o le a mafai ona tatou oo atu ai i se tulaga taua ina ia aveeseina ai ia faafitauli o lo o i o outou finagalo ma o tatou faamoemoe ona o le le lava o mea o lo o tagolima ai le Malo? O le manuia o le atunuu ma lona tamaoaiga o lo o tanumia lea i le elelee, ae ou te faapea atu ai i lenei fono mamalu, o le a ea se auala e mafai ai ona tatou oo atu ma tuuina mai lea manuia ina ia solosolo lelei ai le Malo ma ona taualumaga uma o le atiina a'e o mea e pei ona faafinagaloina e lenei fono? E tasi lava le auala, o le galuea'iina lea o le elelee o le atunuu. Ua ou nofo sauni i se taimi o muamua ou te faatuina atu ai se lafo ina ia tuuina atu e le Malo ma le mamalu o lenei Maota se pule i le alii Minisita o Faatoaga na te mafai ai ona ia pulea faatasi ma le nofo a Pulenuu i lea alaalfaga ma lea alaalfaga, ina ia faamalosi ai le galuea'iina o le vao mo le galuea'iina o Faatoaga. Aua afai tatau te mautinoa le tele o tupulaga talavou o lo o latou te tagolima i fua o le laueleele ma fai ni faatoaga ona tatou iloa ai lea o iina tonu o lo o tatou faaletonu ai. Afai o le a mafai e le malo ona tuuina atu ma uuna'iina tupulaga talavou ia galuea'iina le laueleele o le a le toe oo ia i tatou se fia taumafa po o se tagovale i mea a isi uso. O le mea lava lea ua ou tuuina atu ai i lenei Maota Fono ini tautoga aua o lenei lava Maota e mafai ai ona fai ni fuafuaga i le agai atu i luma o le Malo o le atunuu.

Sa faatuina mai e nisi tootoo ina ia faia se lafoga faatino ae ou te faapea atu ai o le soifuaga lenei, e eseese. O le isi lava tagata na te maua le £100 e oo i le £1,000 i le masina, a o se isi lava foi tagata pe na te maua se £1 pe leai lava o le mea lea e peiseai o le tulaga o lo o i ai nei o lo o solosolo manuia lava ma o lo o tatou faamoemoe atu o i latou ia ua maua mea ma tele tupe o i latou lava ia o lo o fofogaina le Malo. A o si tagata ia na o se £1 na te maua po o le leai foi o lo o pau ai lava iina i le £1 lana mea e faatau mai, o si ana foi sina mea e lafo i le Malo.

Sa taua foi e lou uso a tootoo o lo o i lou itu tauagavale se tasi tupe tele ua aliali mai nei e £1,960, i le e faaleai lava sou manatu i ai i lena mataupu, aua o se mea faigata, ou te le faapea ou te tuuina atu foi i le alii Palemia ma le Kapeneta ona o lenei, latou te le ma silafia po o nofoi mai pe leai foi se isi o lo o autu ai lenei faalavelave e tupu mai i lenei tupe tele a le Malo ua toese. O le mea lea, ou te faapea atu ai o le a lavea ai i lau tautalaga.

A o faia la tatou malologa sa musumusuina mai a'u e lau uo lea e i lou itu taumatau ina nei galoi ia te au le tasi saunoaga sa faasino tonu lava i le mataupu tau i uafu. O le mea foi lea ou te faamalu atu ai ile uso a tootoo sa saunoa ma sa ia taua ai faapea, ia faia muamua le uafu i Apia ae taatia le uafu i Savaii. E i ai lava sina mataupu itiiti ou te fia tali atu ati e tusa ma lau saunoaga. E moni lava lou finagalo ona o le atugaluga lava ona o le le lava o le tamaoiga o le Malo o le atunuu, ae ou te faapea atu ai o le mea ua aliali mai i lou mafaufau aua sa saunoa, muamua lava ae mulimuli aen ua toe taosaga i le alii Minisita o Galuega in aia faia se fale mo le uafu i Salelologa. O le mea la ua oo mai i lou mafaufau e le o taalo le tootoo lea i le polo a o lo o taalo i tagata.

O lea foi ou te fia faapea atu ai e tusa i le saunoaga a le tootoo lea, ia malie foi le tootoo lea na saunoa mai nei e peiseai e le o faasno atu i ai lau tautalaga a o lo o faasino lava i se tasi o uso a tootoo o le sa saunoa i le taimi ua mavae ma le vaiaso ua tuanai, o le ala lea ou te faapea atu ai o lea galuega o lo o faia pea lava e oo mai i le taimi nei, ma ua tele foi tupe ua alu ai, ua faia foi fale ma mea eseese uma lava, afai la o le finagalo lea e pei ona faaalua e le tootoo ea, o lona uiga, e tusa lava lea ma le tagao atu o le malo ma aofai mai neiafe ma afe o tupe ma tiai i le sami. O le mea lea ou te faapea atu ai, iamalie ia le finagalo o le tootoo lea, afai lava e i ai sona finagalo faapea e agai mai ia i Apia, a e le agai atu i Sisifo ona o le mamao, ae ou te faapenei atu e i ai lava ni tausaga e alu alu lava afai o le a lelei auala ma mea faapena, e le taumate o ni ou alo po o ni alo faasino ilou alaalfaga o le a agai atu lava i lena uafu. O le mea lea ou te faapea atu ai, e faanoanoa ai foi le agaga ona o i tatou lava foi mai le motu tele ia Salafai a o lenei ua faaalua lou finagalo faapea ia tasi le uafu i Savaii, e moni lava o Apia o le taulaga lea o le Malo, e lelei, o mea lelei uma lava e tatau lava ona fai muamua i Apia, a ua tatau foi i lea fuafuaga ona faia se faatatauga aua lo tatou motu tele ia Salafai. E le o toe mamao ona tuuina mai lea o mea taitasi o lea matagaluega ma lea matagaluega, ma o iina tonu lava o le a avatu ai sau tali i sou malie po o sou le mali po o sou fia malamalama foi e tusa o le lauga ua tuuinamai nei i luma o le fonotaga mamalu. Faafetai.

Afioga Hon PAPALII POUMAU



Itumalo Faaalaalafaga:

Faasaleleaga Nu.2

Filifilia:

10 Aperila 1964

Faatauto:

16 Aperila 1964

Lauga Faataupou:

1 Iulai 1964

Lau Afioga i le Fofoga o le Fono ma le mamalu o le Fono

Aoao Faitulafono, o le a ou taumafai e tali atu i fesili ua tuuina mai.

O le mataupu na fesiligia e le Afioga ia Leutele i le Mea Taitasi 329 – o lo'o faaalua i le faamatalaga o le faamalamalamaga i le puipui (j), ua fesiligia e faapea pe fia tagata togi masina ua i ai i le vaega togiaso? O le tali ou te faapea atu ai, o i latou nei sa i ai i le au totogi masina ae ua pa'u mai i le au totogi aso, o le aofai o totogi o i latou ia ua pa'u mai i le au togiaso lea o lo'o faaalua i le Tala Faatatau Faaopoopo le fuainumera lava lea e talafeagai ai e £1,875 ma ua vaevaeina i vaega eseese. O le isi la Mea Taitasi 370 o lo'o i ai le £4,500 ua faasaoina. Ua silafia i ina le tele o tupe mamā ua faasaoina ina ua aumai i latou ia sa galulue totogi masina i le au togiaso. Silasila i le faamalamalamaga i le mataitusi (j), e toatele tagata faigaluega sa togi masina ua tuu mai i le au togiaso ma o i latou ia o tagata faigaluega ta ofu i le fale ta ofu fou i le Kolisi o Samoa.

O le faamalamalamaga lea ina ia silafia ai e le Maota, e ui lava ina sa totogi masina ia tagata o le aufaigaluega a lenei Ofisa, a'o lo latou toe see ifo i le tulaga togi aso ua maua ai se faasaoina tele o le tupe sa faapea e alu ai i lenei vaega o le Matagaluega pe ana leai lenei fesuiaga. Afai lava e naunau sui usufono mamalu o lenei Maota i se lisi o i latou ia, o le a maua atu lava i se taimi e faatatau i le eseese ua i ai o latou totogi.

O le a ou taumafai foi ma le faaaloalo e tuuina atu ni faamalamalamaga ou te mafai ona tuuina atu e faamalieina ai fesili ua tuuina mai e Tootoo a sui usufono. Ou te talosaga atu foi ma le faaaloalo i le Afioga Afoafouvale ona o lo'o i ai lona malamalamaga tau tupe e ala i le Komiti e Iloiloina Tupe a le Malo, ina ia fesoasoani mai i le faamalamalamaina o ia itu e pei ona sa fesiligia e sui usufono o lenei Maota.

O le fesili muamua lava ua faafofoga i ai lau Afioga i le Fofoga o le Fono ma le Fono mamalu, o le fesili lea a le Afioga Leutele Poutoa, o lo'o auala mai i le Mea Taitasi 389 ma o lo'o faailogaina i le faamalamalamaga i le (j). O le faamalamalamaga o lea Mea Taitasi, ona o se fesili a le sui usufono ua faaalua ai e faapea; pe fia tagata totogi masina ua i ai i le au totogi aso e pei ona faaalua i le puipui (j) e £1,375. Ua faafofoga le mamalu o le Fono i se tasi o vaega o la'u faamalamalamaga. E to'a 10 i latou ua i ai nei i le au totogi aso ma o lo'o galulue ai. I le tausaga ua mavae sa leai se fale ta ofu i le nofoaga lea i le Nofo Tumau i le Kolisi o Samoa. I le tausaga nei ua i ai lea vaega ma ua fuafuaina ai o le a galulue ai le toatolu sa totogi masina faatasi ma le isi vaega o lo'o i ai, ona maua ai lea o le to'a 9 o lo'o galulue totogi aso i lea lava galuega. O le toatasi o i latou nei o le to'a 9 lea e galulue

i le teuteuina o faleaoga i totonu o Malifa i le aoga lea o le Primary School. E tele fale e ao ona teuteuina lelei ona o meatotino a le Ofisa ma o lo'o galue ai le toatasi. O le isi e galue i lona tulaga faakamuta i le Matagaluega ma o lo'o galue lava i le fale kamuta i Malifa. O ia lea o lo'o galue togi aso, ona atoa ai lea o le to'a 9 e pei ona ou taua.

O lo'o i ai le toatasi e to'a 10 ai o lo'o galue togi aso i le aoga maualuga i Salafai. Ua taua foi e le sui usufono lea e faapea, ia faafaigaluegaina alo o le atunuu o lo'o i le nofoaga lea o le Aoga Nofu Tumau i le umukuka ma le fale tamea aemaise ia faatinoina ma tausia le aganuu faa-Samoa, ia le taumamafa i tui ma naifi ae ia faatino pea i le aganuu. O lea ou te tali atu ai ma le faaaloalo, e le o se fia faaleagaina o le lafo po'o fuafuaga a le sui usufono lea, ae na ona ou faamanino atu itu nei. O i latou nei o lo'o alaala i le Aoga Tumau i le Kolisi i Vaivase, o alo o le atunuu ma o nofoaga nei ua fuafuaina maeaea e le Malo. O i latou ia ua i ai i vaega maualuluga ua taua o "Secondary Education." O o latou taimi ua fuafuaina atoa lava ina ia faaavanoaina le faia o a latou suesuega, o le faitau tusi ma itu eseese tau aoaoga ina ia maua e i latou le malamalama e faafetaia'i ai le maualuluga o aoaoga o lo'o i ai nei. I le ma lea foi, latou te le nonofo fua i lenei Aoga Tumau. E pei ona silafia e le mamalu o le Fono, e totogi lo latou nonofo ai i totonu o le Nofu Tumau. O le mea lea afai o le a galulue alo o le atunuu ma faia nisi feau e ese ai, o le a le gata ina maumau ai o latou taimi na ala ai ona fai ia fuafuaga, a'o le a avea foi ma tulaga le malie i lo latou galulue a'o lo'o pili i le alaala ai i le Aoga Nofu Tumau.

O le itu e faapea ia faatino ma taitaiina le faagaioiga o le tausia o tamaiti nofo tumau i aganuu faa-Samoa, ou te faamalamalama atu e faapenei. Silasila foi, o le itu tau aoaoga ua se'e le vaa o Samoa i luma, ua matua see ese lava ma le mea sa i ai i le amataga. O le soifuaga o Samoa, o lo'o i ai lava itu tatou te tausisia ai le aganuu, ae ua tatou faaaogaina le atamai ma le tamaoiga mai fafo ma nisi lava itu lelei tatou te mulimuli ai. E oo foi i o tatou laei ma meataumafa ma nisi lava tu ma aga. E le mafai lava ona tatou toe foi i tua ma ou te iloa o se matua sese maoae pe a toe ki le uati i tua. O fuafuaga ua tatou oo nei i ai i le itu tau aoaoga, o mea uma lava na sa aiaia e le mamalu o lenei Fono atoa foi ma le Fono a le Kapeneta, sa mulimuli atu ai foi le Minisita sa ma sosoo i tausaga e tele. Na o ni nai masina talu ona ou tulai atu i lenei tulaga o le Minisita, ae ou te matua faafetaia lava galuega lelei e tusa ma le atinae o le atunuu i itu tau aoaoga. E i ai nisi o mataupu na lāgā mai e sui usufono mamalu, ae ina ia faasaoina le taimi o le Fonotaga, o nisi o ia mataupu o le a aafia i sa'u tali i finagalo o sui usufono ua faatuina mai a latou Lafo agai i le totogi o aoga.

Ona ou oo mai lea i le saunoaga a le sui usufono mamalu, Tofa Mano Togamau e faasino i le Mea Taitasi e 386 o lo'o faamalamalamaina i le mataitusi (i). O lo'o faapea mai le saunoaga, o tupe alu e totogi atu i le Kolisi o Samoa e £750. Aoga o Vasega Laiti i Apia e £200, o lo'o aofia ai ma le aofaiga atoa o le tupe ua toe faatu atu e £875 mo le totogiina o aitalafu i le tausaga e 1963. O le totogi o aoga mo ia aoga o lo'o aofia ai se alauni mo ia tupe alu. O nei vaegatupe taitasi aemaise i le vaegatupe e £875 o le toe faapuina lea ma o lo'o manino lelei lava e totogiina ai aitalafu i le 1963 e aofia ai mea tau tusi a le

aoga maualuga. Na taunuu mai tusi i lea lava tausaga ae le'i totogiina, o lea ua toe faatulai mai ai lenei aofaiga i le Tala o le Tupe lenei. E ui lava ina faapopoleina le finagalo o lea sui usufono i nei vaegatupe ae ou te faapea atu, o nei vaegatupe ua faamoemoe e toe ola mai i le totogi o pili o aoga.

Ona oo mai ai lea i le saunoaga a le Afioga ia Tapusoa i le Mea Taitasi 382 ma ua faamalamalamaina i le (g). O lo'o faapea mai le faamalamalamaga –"Tausiga o Faatoaga", ma o lo'o aofia ai tupe alu i le suaina o le elelee; aoga maualuga i Salafai e £200, Kolisi o Samoa e £250. O le aoga maualuga i Salafai; ae ou te le'i fai atu se faamatalaga e uiga i le £200 lea e tusi mai ai, e faapenei ona ou faamalamalama atu. E ui lava i le igoa e pei o se igoa faapitoa, o le aoga i Salafai ae o la'u asiasiga talu ai nei ua lua vaiaso talu ai, na ou matua iloa lelei ai e le na o alo o Pule ia Salafai o lo'o aoaoina ai, o loo i ai foi ma alo o Upolu nei o lo'o aoaoina ai ma nonofo tumau ai, e faapea foi i tama ma tiene o lo'o aooga tausavali ma nonofo ai. O lea ua mautinoa ai e le o se aoga na o Savaii a'o le aoga a le atunuu aua o lo'o aoaoina uma ai alo o Samoa. O lenei la vaegatupe e £200 e faasino lea i le galueaiina o mea aoga atoa ma a latou masini e vele ai le vao.

E pei foi ona taua e le sui usufono le teuteu o le mutia, ua i ai nei le masini teu mutia, vaeane le mamalu o sui usufono. O le aoga o lea masini ina ia le mafai ai ona toe galulue alo o le atunuu i le faamamaina o lo latou malae ma lo latou nofoaga, a'o lo'o faaaogaina lea masini e faasaoina ai taimi o tamaiti aoga mai le faatinoina o ia galuega. Na faapea mai foi le sui usufono lea, ia 'aua ne'i galulue alo o le atunuu. O lea ou te faamalamalama atu e faapenei, o lo'o latou sao tupe lava latou i a latou meataumafa, ae vagana le isi vaega lea ona latou te le mafai ona maua ni talo ma ni fa'i. O lea ua taumafai ai e fai ni nai a latou faatoaga e fesoasoani ai ia i latou lava.

O le la tetele i Vaipouli ma lena itu o Salafai i le tausaga na te'a nei na mamate ai a latou faatoaga atoa foi ma le tagovale o tagata na faaleagaina ai le tele o meatoto, ae ou te manatu o le itu tau aoaoga i manatu ma mafaufau o le aufai-uta mamao o le atunuu, e aoga le gaioi o le tamaitiiti po'o le tagata aoga e malosai ai le tino ma faaleleia ai le mafaufau, a'o itula malolo e leai lava se aso e asa ma le malolo o tamaiti uma i o latou moega ua saunia ma ua matua viia i lo'u mafaufau o latou fale ua fausia e tofafa ai. O a latou meataumafa e fia maua, na o ni nai talo e pei ona ou faaali atu po'o ni nai fa'i foi.

Sa ou faatagisia le Ofisa o le Taitai Sili o Leoleo, peitai, ua ofo mai latou te fia faia ae ua leai ni talo o maua i le faatoaga, ma o le a faatali i se vaitaimi ona maua lea o se fesoasoani. Na ou tagi i le Minisita o Faatoaga ina ia laveaiina le faafitauli, ua ofo alofa mai Minisita ma ua ia tuuina mai le avanoa e maua mai ai i Vaa Fa'i uma pusa fa'i mai Fagamalo ma Salelologa e tai 2/- i le pusa fa'i, a'o Asau e 1/- i le pusa fa'i e totogi e le Ofisa o Aoga ma le Malo. O lea vaegatupe e totogi mai e le Ofisa o Aoga i le Ofisa o Faatoaga e tusa ai o le tali alofa mai a le Minisita o Faatoaga. Ua maua nei la e tamaiti aoga lea fesoasoani taua.

O le fale e taumamafa ai tama i le aoga maualuga i Salafai, ua ou vaai i ai ma sa ou alu i ai ma matou aai faatasi ai ma alo o le atunuu se'i o latou vaai ma latou

iloa, o le latou auauna Minisita e fia mafuta ma i latou. Sa ou vaai se fale manaia ua saunia e le atunuu ona o le finagalo o Samoa ia faaleleia nofoaga o alaala ai o latou alo. O se fale manaia tele ma le lelei atoatoa. O mea taumafa ua saunia lelei i le potu kuka e maoae lona faiga ma lona gaoioiga. O ipu e taumamafa ai ma mea uma e oo lava i laulau ma nofoa, o se mea e matua maoa'e. Amuia foi o latou soifuaga ona o lenei tulaga laalaa i luma ua i ai. E mai fea? O le finagalo lava o Samoa ma ou te matua tautino atu ua maoae lea tulaga ma ua faafiafiaina ai alo o le atunuu i lo latou nonofo ai i totonu o lona Aoga Maua-luga.

O fua aoga o aoaoga e pei ona taua e se tasi o sui usufono, ou te ta'u atu sa ou oo i le faapotopotoga a le Aoga i le potu tele ma ua uma ona ou asiasia vaega taitasi ma o le a ou ta'u atu mulimuli fuafuaga agai i lea itu. Ina ua matou feiloai ina ua faapotopoto faatasi le aoga, sa talosaga mai le Alii Fai-aoga Papalagi, o se tasi o alii ua matua lava saunia aua le faaleleia o alo o Samoa i le tulaga tau i le soifua aoaoina, na ia talosaga mai e faapea, "Faamolemole lava se'i e saunoa i le gagana Peretania, o le a faafofoga i ai le fanau ona o le a latou matua fiafia tele ae faalogologo ia te oe a'o e saunoa i le gagana Peretania", ma sa ou talia.

O le mea lea ou te faaali atu ai nei o Salafai, e ui lava ina e fou le aoga, fou lona faavae ae ou te talitonu o aiaiga ua faia e le Ofisa o Aoga i lenei aoga, o le a laalaa atu pea lava i luga ina ia laina tutusa ma Kolisi Maua-luluga uma i Samoa. E le o le igoa la ua faaigoaina ai o le a vave ai ona maua-luga, a'o le aoaoga ia maua-luga e pei ona ou malaga ai ou te fia vaai i ai. O lo'u talitonu lava o le a le toe mamao se taimi e pei ona fuafuaina e le Ofisa o Aoga, o le a tutusa lelei lava le Kolisi i Vaivase ma le Aoga Maua-luga i Salafai. Afai ae oo i lea taunuuga, ou te talitonu o le a tauva loa ia Aoga Maua-luluga a le Malo i tulaga maua-luluga tau i le poto salalau ma matua faamalieina ai finagalo o le atunuu.

O le fesili a le Tofa Lesā e pei ona taua ai le mataupu i le Mea Taitasi 371 o lo'o i ai le faamalamalamaga i le (a) o lo'o faapea mai – Tausiga eseese, Kolisi o Samoa ma le Aoga e Aoaina ai Galuega. Sa ia taua le vaegatupe o lo'o faatulai mai ai. Ou te faapenei atu, o tausiga eseese o mea lava ia e le mafai ona tuua i aso uma aua le teuteuina lelei o fale aoga e pei o potu aoga ma mea uma faapena aua lava alo o le atunuu, lona o lo'o faatulai mai lea vaegatupe faatauvaa. O le £270 mo Aoga e Aoaina ai Galuega ua ou vaai i ai e i ai se tupe e fia faaopoopo i ai mo le faaleleia o lea foi aoga. E le taumate ua i ai nisi o lenei Fono mamalu ua silasila i ai ma ua ou oo atu foi i ai, o le tasi lea o aoga ua tulai mai sona lelei ma lona aoga ua a'oa'o ai nei le poto i matata eseese i mea faigaluega e maua ai avanoa i mea e taua i le faapapalagi o "Trading", e galulue ai alo o le atunuu i mataupu faapisinisi ma mea tau trades. Ua ou vaai i ai i se taimi umi a'o faaaogaina ia masini faigaluega ma mea uma tau gaoioiga e pei ona faaalua masini e faatino ai galuega tau i ueae eletise, o le fausia o mea-a-fale, fauina o vaa, o pusa lavalava, o le faaleleia o afi o masini ma taavale afi ma paipa. Ua ou iloa le aoga tele o ia ituaiga aoaoga ma afai ae faaaua-uina pea pe a finagalo i ai le atunuu, e ui ina goto ai se vaegatupe i lenei vaitaimi i le aoaoina o alo o le atunuu, a'o le a fotua'i mai ai se tulaga maoa'e i le atiaeina o

Samoa i matata eseese ma toe faaolaina ai tupe ua le iloa, a'o le a atili faaleleia ai le tamaoiga o le atunuu i ona po e talafeagai tonu ai i aso o lo'o lumanai.

Faafetai i lau Afioga i le Fofoga o le Fono ma le mamalu o le Fono Aoao Faitulafono, e peiseai na tau tu'u i tua nei mafau-fauga, ae ona o le finagalo o le Tofa Lesa o lē sa lagā lenei fesili ua mafua ai ona avatu se faamalamalamaga, ae ou te le'i manatu e faalautele atu ae na o se tali lava sa ou fia faia.

Sa taua e le sui usufono, Tofa Lesa le eseese o aoga ua taua o aoga a le Malo ma sa ia taua ai le aoga maua-luga i Salafai ma aoga i totonu o Malifa, pe i ai se aoga faa-Itumalo o i ai po'o ni aoga tulaga lua? Ou te faapenei atu, o aoga ia e i Salafai ma aoga maua-luluga i Apia nei, o lo'o i ai foi ma aoga itumalo e taua o Intermediate Schools i Malifa ma aoga e taua o Primary Education Schools. O aoga ia o lo'o totogi pili aoga, e le faapea faatoa totogi nei ina ua fai le Tulafono lea e totogi ai pili aoga, e leai, ua leva ona totogi ma e laina tutusa uma lava ma aoga i itumalo i nuu i tua. O aoga i nuu i tua latou te le o maua fesoasoani a le Malo i aoga maua-luluga nei a'o lo'o totogi lava e i latou le tausiga ma mea uma faapena. Ua leva ona fai lea fuafuaga ae le faapea faatoa fai nei ina ua pasia le Tulafono.

O le saunoaga a le sui usufono Afioga Toleafoa Talitimu o lo'o faasino i le Mea Taitasi 370 ma le 374 o lo'o faamalamalamaina i le puipui (k) ma le (1) e uiga i tupe e fia faasaoina. Na mafua le faasaoina o lea tupe ona o itu nei o le a ou taua. O le Mea Taitasi 370 o lo'o faasaoina mai ai le £4,500, o lona uiga o totogi ia o faiaoga e to'a 15 ma le totogi o tagata e toatolu togi masina lea ua see ane nei i le vaega togiaso. O le aofai o o latou totogi e tusa ma le £4,500. O le Mea Taitasi 374 o lo'o faamalamalamaina i le (1) o lo'o faasaoina ai le £1,500 e pei ona faamanino mai i le (1). Ua toaititi tamaiti aoga nai lo le fuainumera na faamoemoeina ma ua faaleleia atili ai le itu i le tusia o oloa mo le faaaogaina e tamaiti. Sa fesili mai foi le sui usufono lea po'o fea ua agai i ai lenei tupe, afai ua i lima o le Minisita, po'o a mea ua faaaoga i ai? Afai foi la e le'i faaaogaina, po'o fea la o i ai? Ou te tali atu e faapea i le mamalu o le Fono, ua silafia lelei lava e le sui usufono ma lenei Maota, e le faapea o le upu Faasoasaoina o Tupe i le Tala Faatatau o le Tupe ona faapea lea e aumai se vaegatupe i luma o le Komiti e fai i ai se Tala Faatatau o le Tupe, e leai. Na ona faatatau lava, ae le iloa po'o fea e maua mai ai se tupe. A i ai la se tupe ua faatatauina i se Tala Faatatau o le Tupe ona taumafai lea i le Faletupe o le Minisita o Tupe ma le Komiti o Tupe e aumai e faamaonia lona tupe, ae a leai, e leai lava se tupe e aumaia i le Minisita.

Lau Afioga i le Fofoga Fetalai ma le mamalu o le Fono Aoao Faitulafono, ua ou tulai atu ma le faaaloalo e faaaua-u la'u tali atu e tusa ma fesili a le mamalu o sui usufono na totoe mai i le aso ua mavae. O le Afioga Amituanai sa fesili mai i le Mea Taitasi 386. O le tali i lea Mea Taitasi, ua uma ona ou taua i luma o lenei Fono mamalu i le fesili mai a le Tofa Mano Togamau, ae vagana ai o ni fesili se lua a le Afioga Amituanai ou te fia faamalamalamaina atu. Sa ia tuuina mai ni fesili se lua e faapea, pe i ai se aoga tulaga lua ma se aoga faa-Itumalo i Apia nei? Ou te tali atu ma le faaaloalo e faapenei, o lo'o i ai i Malifa le aoga tulaga lua ma le aoga faa-Itumalo

po'o aoga foi faaleogalua ia e lua. O le taua la o Apia ona o Malifa e pei o le tasi lea vaega o le nofoaga ua taua o Apia.

O le vaega e lua o le fesili a le sui usufono po'o le Tootoo lea, o lo'o aofia ai le Mea Taitasi 391 ma e faasino i le fesili i mea-a-fale le vaegatupe lea e £585 mo aoga a Itumalo. Sa faaalua i le saunoaga a le Tootoo le itu e faapea, ia sii i luga tupe mo nei mea ina ia tofusia aoga uma i Samoa, ma e faasino nei mea-a-fale i laulau ma nofoa mo Vaega 14 o lo'o i ai i aoga faa-Itumalo, o vaega fou ia ma vasega o lo'o i ai aoga faa-Itumalo uma i Samoa i Sisifo. E ala ona pa'ū i lalo le vaegatupe mo le fausia o nei nofoa ona o lo'o tausia e le Matagaluega ia nofoa ma laulau ma tufatufa atu i aoga itumalo uma i tua.

Sa taua mai e le sui usufono, Afioga Aiono i lana tautalaga le Mea Taitasi 384. E leai se mataupu sa ia fesiligia i vaegatupe e pei ona faatuina mai, ae na taua le itu i le fesoasoani tau tupe e ao ina tuuina atu e le Malo i le fausia o faleaoga itumalo i Itumalo ona o lo'o fausia lava e Itumalo. E leai lava se mea o faanenefu i lea itu ma e tatau ona ou tali atu i ai, ae vagana o lenei lava Fono mamalu e aiaia ni mea faapea pe a tatau ai. Sa faaalua foi e le sui usufono sona faale-malie e tusa ma le aso na tuupoina mo le totogiina o nisi o alo o le atunuu ua fia totogi e tusa ma le Tulafono lea o le a tuu atu i le Aso Faraiile o le vaiaso o lumanai. E faaali atu e faapea, ua le o i ai ia te au se saolotoga e tatala faasolo atoa ai le Tulafono, ae vagana lava ua malilie i ai le Kapeneta, ma o lea Tulafono ua silafia lava na pasia e lenei Fono mamalu.

O le Afioga Tofilau na ia fesiligia le mataupu i le Mea Taitasi 384. Ou te faaali atu o le mataupu ua ia taua lea o lo'o i lalo o le Mea Taitasi 815. O lea vaegatupe ua uma ona i ai i le Tala Faatatau o Tupe, ae peitai, o tusi ua tuai mai e le'i totogia i le tausaga ua mavae na faaavanoaina ai lea vaegatupe, o lea foi la ua toe faatulai mai ina ia mafai ona totogi ai le tau o ia tusi ma mea aoga e le'i totogia i le tausaga talu ai. Sa taua foi e le Tootoo le itu e uiga i lauu faalogologo a aoga i nuu i tua. O lea itu ua uma ona fai i ai aiaga a le Malo, e faatau lava e le nuu po'o le aoga le latou leitio e faaaga mo a latou aoga.

O le itu mulimuli e pei ona laga mai e lenei Tootoo o le itu lea e uiga i le faaleleia atili o mea-a-fale mo aoga. Ou te tali atu ma le faaloalo e faapea, o lo'o taumafai lava i ai le Fono Aoa ma le Ofisa o Aoga e faaleleia le itu i mea-a-fale aua le fesoasoani atu mo aoga, peitai, e fuafua lava le peleue i le tele o le 'ie o lo'o i ai.

Ma le faaloalo lava lau Afioga i le Fofoga Fetealai ma le Fono mamalu, o le a ou taumafai e tali atu i fesili ua tuuina mai. Muamua, o le Tofa Mano na fesili mai e uiga i le tulaga o aoga faa-Itumalo ma ou te tali atu e faapenei, o le fuafuaga mo le tausaga nei ua amata ona alu a'e aoga a Itumalo ina ia faafetaia i tulaga faafitauli o lo'o i ai nei. Ua na o le o'o atu o alo o le atunuu i le fia maua o ni vasega maualuluga, ae le mafai ona maua ona na o le Kolisi i Vaivase e i ai lea tulaga pe a oo atu i le Form III se'ia oo i Forms i luga atu e tai pei o le Form VI. O le mafuaaga lea ua ala ai ona i ai fuafuaga mo le aoga i Salafai ma ua taua lea aoga o le "High School". Ua fuafuaina foi aoga sa taua o aoga faa-Itumalo ia sa taua e le sui usufono o Palauli i Savaii, Aana ma Falealili ua taua o Junior High Schools. O aoga faa-Itumalo e pei ona sa i ai muamua sa gata mai lava i le Form II. A oo loa i le

Form II ua le mafai e tamaiti ona ulufale i le Kolisi o Samoa po'o nisi Vasega i luga atu, ona gata ai lava lea i ina ua leai se isi laasaga i luga atu. O lea la ua i ai le fuafuaga i aoga nei e tolu ua siitia mai le Form II i le Form IV, e le faapea la ua na o alo o i latou o lo'o alaala i Itumalo e pei ona taua e se tasi o sui usufono, ae aafia uma ai lava alo ma fanau a le Atunuu.

O le mataupu e uiga i le tausiga o aoga ia, e pei lava ona ou tautala atu o lo'o taumafai ina ia maua ni faiaoga lelei e talafeagai ma ia aoga ina ia laalaa i luma. I le ma lea, ua outou silafia lava le utiuti o tupe a le Malo, o lo'o tau fai faatatau lava i ai. Afai foi ae le mafai, o le a fuafua lava le tulaga e mafai ina ne'i soona uunai foi ae tulai mai ai nisi faafitauli.

Sa taua foi e le sui usufono lana fesoasoani i se tasi o ia aoga, faafetai tele ona o lea fesoasoani taua. E faafetai foi i le Ofisa o Aoga i fesoasoani o lo'o mafai ona ofoina mo ia aoga, e moni o lo'o i ai o tatou manao, ae ia tatou fuafua foi i ni e tulai mai e mafua ia i tatou lava.

O le Tofa Lesa sa ia taua le vaegatupe e £450 mo le Tausiga o Aoga ma le faia o fale i aoga ia e pei ona taua i le Tala Faaopoopo o le Tupe, o Aoga ia a le Malo. O nei aoga ua faatatauina i ai lenei vaegatupe, o le Aoga a le Apia Primary, Vaipouli "Dining room", Vaipouli "Library" ma le "Staff room". O vaega ia o lo'o fuafua i ai le vaegatupe lea. E pei ona pau ia o aoga e faasino i ai, o aoga a le Malo. O le tali i le finagalo o le sui usufono, o lo'o i ai se faiga faataoto ma ua manino ma malamalama i ai lenei Fono Aoa, o lo'o tausia lava ma tuuina atu i nuu i tua ma itumalo le vaaiga o latou fale aoga. O so latou sao foi lea e tuuina mai i le atinae o aoga. E le o se mea faatoa faia nei e lo'u tagata, vaeane le mamalu o le Palemene aua faatoa ou tulai nei, a'o le mea lava sa faatino mai i le amataga.

O le itu foi e uiga i totogi o aoga e pei ona fesili mai ai se tasi o sui usufono po'o fea ua ave i ai, o lo'o i ai lava i le Minisita o Tupe ma le Failautusi o Tupe le malamalamaga i lea vaega i le mea ua ave i ai lea vaegatupe o totogi o pili o aoga, a'o vaegatupe na ua faataoto mai i le Tala o le Tupe o lo'o faagaoioi ai nei aoga. O lo'o fesiligia foi se faamaoniga e mautinoa ai e maua lenei vaegatupe. Ia silafia foi e le faapea e totogi mai pili o aoga ona teu lea i le sefe a le Ofisa o Aoga, e leai, o la lava e teu i le sefe tuufaatasi a le Malo, ae faatagi atu i ai lea Matagaluega ma lea Matagaluega e pei foi o lenei talosaga ua aumai nei a lenei Matagaluega.

O le fesili mai a le Afioga Tapusoa i le aso ananafi e uiga i le tausiga o le Aoga i Vaipouli, ou te tali atu ma le faaloalo. O le mataupu i le tausiga o le aoga maualuga i Vaipouli po'o le aoga maualuga i Salafai, o lo'o lagolago lava i ai le Malo, ae atonu e le o atoatoa ona o le tulaga i le fou o aoga ona ua faatuina lenei aoga ae le'i matua mautinoa ma mautu lelei faiga e faagaoioia ai. O lo'o faatau foi e le Malo mea e tatau ai e pei ona faamalalamalama atu i le aso ananafi, ma a o'o ina tatou lavatia le itu tau tupe, ailoga e i ai se sui usufono o le a le ioe e tatau ona faaleleia ia mea? E pei o lenei lava tatou te taumafai. O lenei o le a lua aso atoatoa o lote le vaegatupe faatauvaa lenei o lo'o i ai i le Tala Faatatau o le Tupe, ona o le a ea? O le faigata ma e le faigofie. O lenei e le atoa le £2,000 a'o le a lua aso o tautalagia. Ona o le a? O le vaivai lava o le Atunuu. O lea ou te faapea atu ai, tatou

talia le agai i luma, ae o lo'o agai lava i luma e le tumau i se mea e tasi. Afai tatou te vaaia ua lelei le itu tau tupe, ona faasolosolo atu lava lea, ae le faapea o le a tatou manao i se mea ae le o i ai ni mea tatou te tagolima i ai. E ao ai lava ona tatou onosai pea aua o i ina tatou te maua ai faamanuiaga mulimuli mai.

O le vaeatupe lea o lo'o i ai, ua outou silafia ma sa ou faamalamalama atu ananafi, e £200 e suatia ai le eleele. O se taumafaiga lea ina ia aua ne'i mafatia alo o le atunuu. O le a agai lava i luma a tatou taumafaiga ae le tumau i se mea e tasi, ia tatou talia mea ua tatou oo i ai e pei o lea upu mai le Tusi Paia.

O le saunoaga a le Tootoo Afioga Toomalatai e uiga i le tausiga o le "Hostel" i le aoga maualuga i le Kolisi o Samoa na ia taua ai e faapea, po'o ua i ai nisi e tausia alo o le atunuu. Na ia taua foi o lana faafofoga o lo'o i ai le papalagi ma lona faletua o lo'o tausia. Ou te faapenei atu, na ou tulai mai loa lava ma lipoti mai ia te a'u lea tulaga, na suia ai loa ma lea tulaga. Ua i ai nei le tina matua o le faletua o le Faifeau, e faiaoga i Vaivase i le aoga a le Falefitu, ua ou filifilia lea tina i lona tulaga o le tina o le Galuega aemaise e i ai lona alofa naunau i fanau e avea ma tina o teine po'o alo o Samoa. O le tina lea o lo'o ia vaaia tamaitai i le ao pe a tuua mai lana aoga ma moe lelei ai latou te tofafa faatasi ma fai a latou taulaga ma aoaoina i le faakerisiano ma ia puipuia lelei i latou i le po ina ia talafeagai ma le saogalemu o alo o le atunuu. E faapena foi i alii po'o tama. Ua tuuina atu i ai se vaegatupe faaopoopo aua o se galuega faaopoopo lea mo i laua o faiaoga. E le mafai e se tasi ona galue e aunoa ma se vaega faaopoopo, ae a aumai foi se tagata i tua e naunau lava i se tofoga maualuga, a'o lo'o tau faasoasoa foi e le lava tupe a le Malo ma le Atunuu.

O le itu lena ua oo i ai le papalagi ma lona toalua e pei ona taua. O lo'o i ai i laua, ae nofofo i le falealuga. E lelei foi ona e pei e faamalumalu i le tausiga aoao. O se itu lelei foi lea aua e i ai se mea e mananao i ai le tamā ma le tinā o teine ma tama a o lo'o i ai se tasi e mafai ona lagolago vave ma fesoasoani ina ia atili mamalu ai lea nofoaga.

O nai a'u upu ou te faai'u atu ai, sa ma auai ma se Asiasi Aoga Sili mai Niu Sila i le faatuina o se aoga maualuga i Fiti, na ia faalogologo i la'u tautalaga na ou taua ai le taua o le puipui i le itu tau tupe i so'o se atunuu. Na ia faapea mai, o le mea lea ou te matauina alii e, e te matua taofiofi tele i le itu tau tupe.

Ou te faapea atu i le mamalu o lenei Fono, o le a lava le tiute aupito maualuga o lo'o ia te a'u o le Minisita o Aoga, e fuafua faatatau lava le tipiga o le ofu ma le peleue e tusa ma le tele o le fasi 'ie ua taatia mai. Ia manuia le Fono.

Afioga POLATAIVAO FOSI



Itumalo Faaalaalafaga:

Gagaifomauga Nu.3

Filifilia:

10 Aperila 1964

Faatauto:

16 Aperila 1964

Lauga Faataupou:

9 Iulai 1964

Ou te faaluaina le lafo.

Lau Afioga i le Palemia ma le mamalu o le Maota Fono, o lenei Tulafono o le totogiina o aoga ua tataua ona soloia. Ua tataua i le Malo ona sue mai se isi auala e faatumu ai le vaegatupe a le Malo lea o lo'o alu i totogi o aoga, ae le o le su'e mai i luga o tagata matitiva o le Atunuu. Ou te ta'u atu i le mamalu o le Maota, o le mativa o tagata o le Atunuu i le vaitaimi lenei ua matua uiga ese, ma ua ao foi ona tatou faia se tulaga tataua aua o lenei Malo o le Malo e faaupu faapea, "E Faavae i le Atua," ma o le saolotoga e tataua ona maua e tagata Samoa uma.

Le mamalu e o le Maota, o lenei mataupu o se mataupu ua silafia e le Maota lenei, ma o a'u nei o se tagata o lo'o nofo i nuu i tua i le mea o lo'o alaala ai le au matitiva o le Atunuu. Ou te ta'uina atu i luma o le mamalu o le Maota Fono lenei, ona pau lava lea o le mea o lo'o tagi mai ai le Atunuu o le totogi lava o aoga. Ona pau lava lea o se ala manuia o lo'o maua e tagata vaivai o le Atunuu, o le aoga fua lea o a latou fanau i totonu o aoga a le Malo, ma ou te faatuina atu ma le faaloalo lava i luma o le Maota, afai tatou te iloiloina ma toe teuteuina lenei Tulafono, e le taumate o le a toe foi laasaga o le Atunuu i se tulaga ua tatou laveaiina ai tagata vaivai o le Atunuu.

Ua silafia lava e lenei Maota Fono le upu masani, "O au o matua fanau", ma o le taimi lenei ma laasaga o le alualu i luma o le Malo ua naunau ai uma matua e fia ave a latou fanau i aoga; a'o le vaitaimi foi lenei i nuu i tua ua silafia lava e sui usufono taitasi o lenei Maota, e toatele alo o le Atunuu ua le faaauuina laasaga i aoga ona ua le maua se tupe. O le vaitaimi foi lenei i nuu i tua ua aisi atu lea i lea, po'o ua aitalafu atu foi lea i lea, ona o le taumafaiga lava o tamaiti aoga, ma ua taua lea mea o le aisi ae le o se tulaga lelei lea i totonu o le Atunuu.

O le mea lea lau Afioga i le Fofoga o le Fono, ou te fia faatuina atu ma le ava i le mamalu o le Maota Fono le lafo, *Ina ia soloia lenei Tulafono o le totogi o aoga a le Malo, ae sue mai nisi auala e maua ai se alatupe e sui ai totogi o aoga ae le o le fai i auala faapea o le su'e mai i tagata matitiva o le Atunuu.*

Tofa SAVEA TOSO



Itumalo Faaalaalafaga:

Sagaga le Usoga

Filifilia:

10 Aperila 1964

Faatauto:

16 Aperila 1964

Lauga Faataupou:

12 Aokuso 1964

Le mamalu e o le Fono Aoao Faitulafono ma lau Afioga i le Fofoga Fetalai, ua ou tulai atu ona o le mataupu ua i o tatou luma i lenei taeao.

O le Ofisa lea o Fanua ma Suafa, e le o se Ofisa fou. O onapo o Siamani na amata ai le Ofisa lea atoa ma le Faamasinoga o Fanua ma Suafa. O le tasi la o i latou sa Taitai i le Ofisa lea o Faamasinoga, o le Sui Kovana lea.

Ina ua tau le Taua Tele i le 1914, na solomuli ese Siamani ae suia le igoa o le Ofisa lea i le Ofisa o le Failautusi o Mataupu tau Samoa. O lo'o i ai pea i le Ofisa lenei le Faamasinoga o Fanua ma Suafa ma o le pule i mataupu tau Samoa sa ia taitaiina, ae i ai lava le Resitala lea ua taua o le Resitala o le Faamasinoga o Fanua ma Suafa. Na tauave ai lava lea faiga seia o'o ina taunuu mai MacKay ma Talatonu a'o lo'o tumau ai pea lea Matagaluega. Na o'o ina ua tuumuli ese Niu Sila ae tuua Samoa, ona leai lea o so tatou Minisita o Faamasinoga o Fanua ma Suafa ae tuu atu i le Failautusi Sili o le Malo. E le o aiaina la e le Failautusi le Minisita ma lona Ofisa a i latou tualumaga ma a latou feau, a'o le itu i fafo o le Malo e puipui lava e le Failautusi Sili a le Malo.

O lea la ua sa'o ai ua tataua ona see ese le Failautusi Sili a le Malo ae tu'u i le Resitala o Faamasinoga o le a pulea e ia e pei ona i ai nei lea tulaga ua aiaina i le Tulafono. E leai la se mea o le a afaina ai le Matagaluega o Faamasinoga o Fanua ma Suafa ona o la lava e i ai le Resitala ma le Sui Resitala ma isi tulaga uma, aua o le pule i fafo atu o lea ua lafo atu i le Faamasinoga o Fanua i le Resitala o le Faamasinoga Sili o Fanua ma Suafa. E leai lava la se mea o afaina ai, o lea ua pulea e Samoa nei tofiga uma ma o lo'o gasolosolo lelei lava i le taimi nei.

Afioga SEUMANUTAFAMAUMEA



Itumalo Faaalalafaga:

Falealupo

Filifilia:

10 Aperila 1964


Faatauto:

16 Aperila 1964

Lauga Faataupou:

E leai se saunoaga faamauiina

Tofa TAPUSOA PENI.



Itumalo Faaalaalafaga:

Gagaifomauga Nu.1

Filifilia:

10 Aperila 1964

Faatauto:

16 Aperila 1964

Lauga Faataupou:


26 Iuni 1964

Le Fofofga o le Fono ma le mamalu o le Fono, ua ou tu atu foi e fia faaali sou manatu e tusa ma le lauga a le alii Minisita o Tupe. Ou te fia tautala i fua o Faatoaga e pei ona taua e le alii Minisita i lona pa'u maualalo. Aua o le gaoioiga ole laueleele e tagata fai faatoaga o le a maua ai tupe e tele e faatatau mo ala tupe e pei ona faaalua i lenei lauga matagofie a le alii Minisita o Tupe. Ua faaalua mai ai foi i le mataupu i le fa'i, e faapea, ua tele lava le fa'i, po o pusa fa'i ua maua mai i Savaii ae itiiti i Upolu nei. Ua mautinoa lava e lenei Maota Fono ua faaititia lenei mea toto ona o le leaga tele o le faama'i fa'i. Ua taumafai lava la le Ofisa o Faatoaga latou te galulue faatatau mo lenei faama'i a ua leai lava se mea e faaogaina faapea e toe ola ai se fa'i. O le mea lea, masalo e le iloa po o fai pea lea galuega a ua le mafai ona faamalolo, aua ua alu ai tupe ma vaialau e faatatau mo le tineia o le faama'i. A ua tataua ai i ia eleele pe afai ua le ola ai le fa'i, ona suesue e le Ofisa o Faatoaga pe ave i ai le tapaa foi lea e faasalalau atu i aso ua mavae ina ia gaosia mai ai le sikaleti. E mata o le a mafai e le Ofisa o Faatoaga ona togafitia faapena ia eleele ua le ola lelei ai le fa'i, a e i ai togafiti e pei ona tau atu i le tapaa po o nisi lava laua e i ai le moli ma mea faapena, pe afai lava ina ia aoga lava ia eleele, aua e peiseai ua tele lava nisi nuu ua faanoanoa faapea ua le toe mafai lava ona ola ai se fai, e tiga lava oan taumafai atu a ua leai lava, o lona uiga la o le a mate lava lea eleele o le a leai se mea e tupu mai ai, a e afai e togafiti ma fai i ai nisi mea faapena o le a maua ai nisi tupe e faatatau i le manuia lava o lona lava itumalo atoa foi ma le Malo. O tagata fai faatoaga i nei ona po, e eseese auala e fesoasoani ia i latou ina ia faia ai a latou faatoaga. O le isi, e faamoemoe ia te ia lava e fai ai lana faatoaga, a o le isi o le malamalama i se galuega, pe faatauoloo pe fai sana pisinisi e fesoasoani ia te ia mo le galueaina o lana faatoaga. O ia la tagata fai faatoaga, afai o le a lelei le tau o fua o le eleele e i ai le popo, koko po o le fa'i, ona fai loa lea o lana fuafuaga o le a fai ai le galuega e faatatau mo le faatoaina o le eleele. O le isi la tagata e pei ona tau atu muamua, aemaise tagata faatauoloo ma fai pisinisi, o le a fai loa nai ana tagata faigaluega pe i ai foi sana taavale ma o le a galueaina loa lea fanua ma sue ai loa nisi i se fuafuaga atoa ma ona mfaufauga o le a fai ai lana galuega. O le mea muamua ia fia auala faatatau mo le lafanua o le a faatoaina. O lona lua, o le fela'uaiga o mea o le a faatoain aai ma o le a mafai lava e ia i lea lava taimai po o nisi masina. Afai la ua maea lana gaoioiga i lana faatoaga e pei ona ou tau atu i le felauaiga o taga fa'i ma ato popo po o koko, afai la o le a fua mai, o le a mafai loa foi e lea lava tagata ona felauai foi fua o lana faatoaga i lana taavale. Afala la o le a faasalalau atu foi o le a ta le fa'i i le 6 i le taeao e pei ona i ai lava i nei aso a e faagata

i le 10, o le a mafai lava e i alea ona maua mai se 20 pusa fa'i po o se 50, aua o lo o i ai se fesoasoani ia te ia. O le a silafia lava e le mamalu o lenei Maota Fono o le a tele lava mea o le a fuafuaina ma faataunuaina e ia talu ai ona ua i ai le fesoasoani ia te ia. Ae le gata i lea, o le a le maua foi ia i ni gasegase se tele e pei ona tatou masani ai i ni faama'i e tutupu mai i le gaoioi o le tino i le malosi o le a le maua foi o ia i nisi ituaiga ma'i, o le mafai lava e ia ona sauniuni lelei mea uma mo le faataunuaina e pei ona ia mafaufau i ai. O le a faagata ai i i, a e o le a ou tau atu foi ni gaoioiga a le tagata lea e pei ona ou tau atu e faamoemoe lava ia te ia. E pei lava ona silafia e le 'au fai faatoaga o lo o i tua, afai nei o le a avanoa o ia i se mea faapea, o le a sauniuni loa lana pelu vae atu le paia o le fono, atoa ma ni ato e lalaga ma le amo, ona alu loa lea ua amo loa tamai fa'i ma mea uma lava e faatatau mo le manuia ua na lagona e pei ona folafolaina atu. Ua amata loa ana gaoioiga e pei lava ona masani ai ua fai loa lana faatoaga ma ua oo loa la ina fua mai lana faatoaga e pei lava ona ou tau atu o le a faapena foi lona faaaogaina o le amo avega mamafa pe afai foi o le a faatonu atu o le fa'i e ta i le 6 a e faagata i le 10. E le gata la i le popole i le taimi a o le mamafa o le avega ua amo i tai, e matua faigata lava. A e le gata i lea o se auala vaapiapi lava e alu ai ma lenei avega. Afai la o se auala ua leaga o le a pau loa gau i vae atu le paia o le Fono. O le a toe tu ae i luga ma taumafai lava i atai lenei avega, aua lava le popole atu i le taimi tonu e ta ai le fa'i ona o lona manaoga i le tupe. O lona ua ou tau atu le uiga o le au fai faatoaga. O tagata la ia e faamoemoe lava ia te ia, ma e taumafai ma taumafai, ma taumafai lava ma oo ai lava ina gasegase ai. Ona gata ai lea o lona faamoemoe, aua ua leai lava se fesoasoani ia te ia seia oo mai lava i lenei tausaga, e pei ona ou tau atu le mafatia tele o le au fai faatoaga. A o nisi lava latou te fai fai pea lava seia oo ina avega foi i latou ma ni faafitauli e pei ona i ai i pusa fa'i le pasia. A oo foi i le taimi o le totogi e pei foi ona silafia e nisi ulu faitotoa ua tau atu ua le pasia lona faitotoa ae mea ane ua toe foi atu ai ma le isi seleni o le pusa lelei e totogi ai le pusa le pasia. Aua, o nisi lava ua taumafai taumafai lava ua oo lava ina manuia a latou taumafaiga e fesoasoani foi ia i latou. O le mea la e peiseai ua ala ai oan fai lau tautalaga ina ia mafai ona silafia ai e le susuga i le alii Minisita ma le Ofisa o Faatoaga le faigata ma le taumafaiga o le faatoaina o le eleele i tagata latou te matua toaaga ma le faamoemoe o le a maua ai se manuia mo i latou ma le Malo. O le faaiuga la o lau tautalaga e faapea, ua mfua mai le le pau o le tau o le fa'i, ona o ia tulaga e pei ona ou tau atu, aua a oo loa ina ma'i le tagata sa taumafai toatasi lana faatoaga o le a leai foi ma ni ana pusa fa'i e faia talu ai lava le felauaiga lenei e pei ona ou ta'u atu ona o le leaga o auala. O le mea lea e matua lagona ai lava e lou nei tootoo e pei foi ona lagona e nisi tootoo, afai o le a fesoasoani le malo i auala i uta i faatoaga o le ala tupe maua vave lea ole a mafai e tagata fai faatoaga ona latou o atu i tua ma nonofo ai ma faagaoioi a latou faatoaga ma le faamoemoe ua i ai se ala o le a mafai ai ona faafaigofie ai ona fealuai ai fu o a latou faatoaga. A ua tatau ai lava la ona matua oo ane i le Afioga a le alii Palemia ma lana Kapeneta le pogai o le mea ua ala ai ona itiiti fua o le eleele e gaoioi mai e le atunuu e pei lava ona ou tau atu le ituaiga o tagata fai

faatoaga latou te lei maua se fesoasoani, a e ana fai o le a tausia auala e pei ona taua e nisi tootoo o le a mafai ai loa ona nonofo mau nisi tagata i uta o le a le mafai ona toe nonofo i le aai a o le a mafai ai lava e i latou ona taumafai a latou faatoaga iina ma fua o a latou faatoaga a o le a fesoasoani foi i ai nisi o o latou uso ua maua ni o latou fesoasoani e pei o isi tagata e felauai ai fua o a latou faatoaga, pe a ai auala. E pei foi la ona faatoaina le niu pe afai lava o le a lelei auala i uta i le vaomatua, aua o nisi lava nuu o niu lava ua leva tusa ua 20 tausaga po o le asili atu foi o lo o faaaogaina lava e nei augatupulaga po o nisi foi augatupulaga o le a fotuai mai. E pei foi la ona sauniuni e le Malo ma ua faatinoina foi le mataupu tau i Uafu ma ua tatau foi la ona sauniunia e le Malo ma ua faatinoina foi lemataupu tau i Uafu ma ua tautala foi i ai nisi tootoo e faatatau lava mo le felauaiga o nisi tamaoia; afai lava o le a le faataunuaina ma faatino vave lea ala manuia i mea tau auala in aia mafai ai lava ona oo atu le tele o tagata fai faatoaga i uta i le vaomatua. O lemea la lea, a le faatinoina foi la le manaootagata fai faatoaga ina ia fesoasoani atu lava le Malo i mea tau auala, ma o le a le faamanuiaina foi ia i se mea e poloaina atu ai le Malo. O le a faagata mai ai i i lau tautalaga, ae peiseai o le aano moni lva lona ile pia i le Afioga a le alii Palemia ma le Kapeneta ina ia mafai ona faatino vave se vaega tupe mo le gaosia lava o auala o nuu i faatoaga po o ni auala foi i le Tuasivi, e faatatau lava mo ia galuega tetele o tutu mai nei i o tatou luma e pei ona i ai Uafu tetele e lua i Savaii ma Upolu nei. Ae faaiu atu la lau tautalaga faapenei, e moni lava le Malo i lau Afioga a le alii Palemia ma le Kapeneta, sa tatau lava ona tuutuu i le loloto le tofa ma fai se tonu vave e faatatau lava mo ia faafitauli e tuu mai nei i o tatou luma. Afai ol e a faatuai ma faagesegese o le a le mafai foi la ona vave ona maua se tonu vave e fai ai faalavelave o le a oo mai. Ou te toe faapea atu ai, ia manuia lava lau Afioga a le Palemia ma lau Kapeneta e faatatau lava mole faia o ala manuia e pei ona taua e nisi tootoo ina ia i ai ni Falei'a e pei o Tutuila; a ia vave ona faataunuaina na auala atoa foi ma Maketi e lau mai ai fua o faatoaga.

Afioga TOFILAU LEALOFI



Itumalo Faalaalafaga:

Faasaleleaga Nu.1

Filifili:

10 Aperila 1964

Faatauto:

16 Aperila 1964

Lauga Faataupou:

24 Iuni 1964

Le Fofoga o le Fono ma le mamalu o le fono, ua ou tulai atu e fia avatu lava le faamalo i le Afioga a le Palemia ma le Kapeneta aemaise lava foi le alii Minisita o Tupe. Ou te fia taua le Lauga ua saunia e le alii Minisita ua ia aumaia ai le faamalalama e uiga i le utpe, ma ou e fia tautala foi i ai, ma o lo o i ai foi se tasi vaega o lo o faanoanoa ai ona o lo o i ai nisi itu e le o mautinoa e pei lava ona tusia mai i le lauga a le alii Minisita e tusa ma le lipoti i le Tala Faatatau Faaopoopo o le Tupe. Ou te le faitioina foi, aua o le tulaga lava lea o le tagata soifua, e le

mafai ona atoatoa se lelei, a e ou te fia fesoasoani i ni ou manatu e tusa i le saunoaga ina ia faamalasia ai ma faateleina ai le itu tau tupe, aua le atiina a'e o le atunuu ma lona malo. O itu ou te faamamafaina o le itu lea i le popo, koko ma le fa'i. O nisi fua nei, o faamoemoega o le atunuu i le auala e maua mai ai se tupe mo a tatou tupulaga a ua pau i nei ona po e pei o le tulaga o le popo ma le fa'i. Ae ou te talitonu foi masalo e le maua i Samoa nei se vailaau e mafai ona toe faaleleia ai ia tulaga, pe afai o le a tatou le talanoaina i le mamalu o le lenei fonu, e ao ina susesueina ni auala mautu ma le mautinoa lelei nia ia mafi ona toe faalelei ai lea tulaga pagatia ua tatou i ai nei. O lo o taua ai foi i le lauga a le alii e pei ona saunia le lipoti lea ina ia faaitiitia le faafitauli lea, o lou la malamalama i le faaupuga e tataua ona faaupu ai e faapea; e le uma le faafitauli lea, e peiseai e foliga mai o le a gai atu i lalo lea itu i se tulaga le fetau'i ma le maulalo faapena. O lea foi ou te fautuaina ai le mamalu o le fonu, o lo o talitonu lava lou nei sui usufonu ua atoatoa lelei lava i le mamalu o le Fonu lenei ituaiga taleni esese e tele o ituaiga o matagaluega e i ai e fai pisinisi ma e fai oloa o lo o i ai foi iinei e fai faatoaga, o lo o i ai foi e popoto i fai uamea, o lo o i ai foi le au fai musika ma soo se tulaga lava faapena, o lou lagona la, afai o le a tuu faatasi nei malamalama uma e saunia ai sa tatou tonu lelei i mea o lo o tatou faafesagai nei, o le a mafai ai loa ona tatou maua se isi itu e uiga i le tulaga maualalolea ua tatou oo nei i ai. Ou te lagona e peiseai e matau atu i le lauga a le alii Minisita o lo o faamamafaina lava se tupe maua mai le tiute po o tologi o aoga po o laisene foi, e peiseai ona pua lea o le vaega tupe mamafa ou te iloa ua maua ai nei se tupe mama a le Malo. O le a ea le ala ua mafua ai ona tele nisi ala manuia e pei ona tua e nisi tootoo ua mavae? O le mea lea ou te le faitiaina ai le alii Minisita o Tupe aua ou te malamalama lelei o lo o le malamalama le alii i tulaga tau faatoaga, o lo o le malamalama foi le alii i tulaga tau uamea, o lo o le malamalama foi le alii i mea tau musika, sei vagana lava o se galuega faaofisa oan maua ai lea o le malamalama o le alii Minisita o Tupe. O le mea lea ou te fautuaina atu ai le mamalu o le Fonu ina ia tatou fetuutuunai faatasi, ma aumai le malamalama o alii ofisa, ma alii fai oloa ma le malamalama o alii fai taavale, ma le malamalama o alii fai faatoaga e tuu faatasi ina ia fausia ai se aavae mautu o le a mafai ai ona solosolo malie mai ala manuia i le Komiti o Tupe, ma mafai ai ona faasoaso atu i galuega tau le atiina a'e mo le manuia o le atunuu o Samoa. Aua ua ou vaai i nisi ala manuia ua ou matua faamaonia ma talitonu, e tasi lava le ala manuia o lo tatou Malo, na o lo tatou Eleele lava ma o lenei foi eleele ua ou iloa ua lava ma totoe le tele o mea sili ma le matagofie o le a maua mai ai e Samoa ma faataunuuina ai o tatou moomooga mo aso o lumanai. O le vavae mai o se tupe faaagaga po o se tupe e toina mai i se tupe maua a Samoa ina ia mafai ona tuuina atu i ni Itumalo i Upolu i Savaii latou te galueaina ma faalelei ai auala agai i le Tuasivi, ina ia mafai ona sao uma atu le atunuu i le loloto o le vao o Samoa, aua o iina tonu lava o lo o tanumia ai le tamaoiga sili o le atunuu; ma o iinei foi o le a mafai ona maua tonu mai ai le manuia mo le faataunuuina o o tatou moomooga mo a tatou galuega faatino. O le a mafai foi ona faaogaina uma le numera faitauina o le atunuu o taulelea malolosi ia; aua o

le tele o taulelea o lo o nonofo i lo tatou atunuu o lo o fiafia i se soifuaga filemu, ma ua tataua ona fai so latou sao ina ia tautua i lona malo ma lona lava atunuu, pe afai o le a fuafuaina e le Malo se tulaga faapena ina ia mafai ai ona tatala atu i tua le taulelea ia i lona itumalo ma lona nuu e faaoga tonu i ai lona malosi e tauta ai i le malo, ina ia saga faateleina ai se tupe aua galeuga fuafuaina a le Malo. O au o le tagata fia faatoaga masani, ma ou te fia taua le taimi lea na sei mavae atu nei i le felafolafoaiga foi ma le alii Minisita o Faatoaga, ou te fautuaina ai foi le Minisita o Faatoaga, aua e pei ou te mautinoa o ia o se alii masani tele imea tau faatoaga, po o se alii faatauoloa, po o le faaofisa foi a e faale masani tele foi i mea tau eleele. O lo o faaulutalaina i se Pepa sa ou faitau ai o lo o tusia ai nisi fuafua a le alii e faapea, ua auina atu nisi ofisa i Itumalo o le a alaala ai ma latou faatonutonuina le atunuu. Ou te aumaia ai se tasi mafaufauga o se tala faatatau e faapea, po o le a se mea sa o vaai i ai i le taavale vae atu le mamalu o le Fonu, o le mea muamua ou te vaaia o le mananaia o nofoa, o lona lua, lelei le afi lelei foi pau o le taavale. Ou te faatusaina la lenei mea o le nofoa o le taavale o le Minisita ia, a o le afi, o le Ofisa lenei o Faatoaga, a o pau o tagata faifaatoaga o lona uiga la a mananaia nofoa, malosi le afi ae leaga pa'u, ua le alu le taavale. Afai foi e lelei le Minisita ma ana fuafuaga, toe popoto le afaigaluega i le ofisa e fai galuega a e musu le faifaatoaga e fai le faatoaga, e le mafai ona faia se faatoaga. O le mea lea ou te fautuaina ai le mamalu o le fonu, ina ia fuafuaina se tulaga lelei e mafai ona talafeagai lelei ma le tualga o le Malo ma le finagalo o le atunuu i e ua faatuatuaina mo le tautuaga o le Malo ma le faatinoina o ana galuega ina ia maua ai pea se tupe ia saga malsoi ai pea lava ia le mafai ona faaitiitia le faafitauli o lona uiga, e le uma le faafitauli, ou te masalo ua oo atu i se taimi o le a faaitiitia ai le fua o faatoaga e pei o le tulaga ua i ai i lau Afioga a le alii Minisita o Faatoaga i lau Afioga Laufili, o lo o faafeagai nei ma lea Matagaluega ina ia mafia ona fuafua tataua lea vaega o le tupe ua tuuina atu i lo outou ofisa e tuuina atu i le atunuu po ua tataua lea fuafuaga, aua e leai foi se malosi o alii Ofisa o Faatoaga pe afai e le talafeagai ma el manao o taata fai faatoaga latou o le a mafai ai ona latou faia faatonuga e pei ona latou auau faatasi ai ma nisi o le atunuu. Ou te faitio foi i le saunoaga a le Afioga a le alii Minisita o Galuega o lo o taua ai foi le motu ia Salafai faapea ua soo lelei vai paipa, ae ou te faapenei atu, o i ai le vai paipa i Faasaleleaga o se Itumalo aupito i toatele lenei ia Savaii ma e sili atu i le 10,000 le aofai o tagata soifua, ae paga na o uamea o paipa ae leai se vai, o le mea la ela e fautuaina ai le Malo ma le alii Minisita ina ia faataunuuina i lenei tausaga, aua o le tasi lea o le mafuaga o le malosi o le tamaoiga i le itu tau tupe a le atunuu o le soifua lelei o tagata in aua mafai ona faataunuuina lelei o o latou tiute tauave e tusa ma ia faafitauli ua aliali mai nei ma ua matua mafatia lava lenei itumalo e tele ogapaipa a ua leai se vai. E ui lava ina silafia e le toatele o lenei itumalo le matelaina i le itu tau vai ae ua ave lava a'u ma o latou sui; ma ou te faamalu atu foi i le mamalu o le Fonu, ona e ui lava ina lata mai le taimi o le a faauma ai lau tautalaga, ae peitai ou te fautuaina ma talosagaina le mamalu o le Fonu ma le toatele o tama ma tina po le fanau pele o lea itumalo, a ua ave lava a'i ma o latou sui e tuuina mai la latou talosaga

ma la latou aioiga ia alofagia e le Malo o Samoa ma ia faataunuina lava lea faamoemoe ma lea faafitauli ua faafeagai ma lenei itumalo. Ia manuia le Fono.

Tofa TOLEAFOA TALITIMU



Itumalo Faaalalafaga:

Faasaleleaga Nu.3

Filifili:

10 Aperila 1964

Faatauto:

16 Aperila 1964

Lauga Faataupou:

24 Iuni 1964

Lau Tofa a le Fofoga Fetalai faapea le mamalu

atoatoa o le Fono lenei ou te muamua ona ou momoli atu lau faafetai i le susuga a le alii Minisita o Tupe. Ua aliali mai i le lauga a le alii Minisita o se matua galuega mamafa o lo o faafeagai ma ia. O le fuafuaga o Atiina a'e, o le Tala Faatatau o le Tupe, ma o se fuafuaga e pei o se miti. Ua tatou masani i le tulaga o lea mea o le miti o nisi e taunuu a o nisi ua le taunuu. O lea ou te faafetai atu ai i lau Susuga a le Alii Minisita o Tupe i lou ma eleelega ma lou mataala i le faamaumauina o tupe a le Malo o le atunuu lenei o Samoa i Sisifo atoa foi ma fuafuaga ma mafauauga mo le agai i luma po o le faaopoopo mai o tupe po o le leai foi o se tupe.

Ou te momoli atu foi lau faafetai tele lava i le Malo i le Afioga a le Alii Palemia faapea le mamalu atoatoa o le Kapeneta. Aua o outou finagalo ua outou mauta saga faamaoni ma galulue ma o outou loto tetele i le iloiloina o auala e maua ai le atiina ae aua le tamaoiga o lo tatou Malo. Tatou tuu pea i lo tatou Faavae ia alofa ia saga faamauoaina pea lava lau Afioga a le Palemia faapea foi le mamalu o le Kapeneta aua le taumafaiga mo le atiina ae o lo tatou tamaoiga. Vae ane le mamalu o le Fono, o outou o inisinia faapitoa lea mo le masini o le Malo o Samoa; a o i matou o ē e le o i ai i le Kapeneta, tulou lava le mamalu, o ni auauna inisinia fesoasoani ia te outou, mo le fauina o la tatou inisinia. E vaai agai i luma i lo tatou Malo ma e ou te lagona i lou nei taofi o lo tatou Malo ua tatou taumafai nei i ai o se Malo ua faatuina i se eleele itiiti lava. E pei ona vaai atu i le lauga a le alii Minisita o Tupe o lo o faapitoa lava na o fua lava o faatoaga lo tatou faamoemoe ma le tamaoiga. O lea, o le vaai a lou nei tootoo, afai o lo tatou faamoemoe lenei o fua o faatoaga, ua tauau mai i lenei vaitaimi ina faaitiitia fua o a tatou Faatoaga a e le faateleina. Ua amata i le vaitaimi nei ona tau ufitia uma nai isi itumalo, ua matua leai lava se fa'i. O le niu foi ou te matua molimau atu i luma o le mamalu o le Fono ua amata ona alu le tele o niu. O lo o faapea foi i le koko, aua o lo o i ai le tele o faama'i koko ua faaleagaina ai foi faatoaga koko. A o le tatou Malo ma le mamalu o le Fono ua tatou malamalama leli lava e le faapea e mafai e lo tatou eleele laititi ona tatou maua mai ai nisi ala tupe e fesoasoani i le tamaoiga o le tatou Malo e pei o isi atunuu tetele, o lo o mafai ona eli mai ai i le eleele o le auro ma isi mea eseese faapena, aua e pei ona ou tautala atu i le taimi muamua, o le Malo o lo o faatu i luga o se eleele itiiti lava, pe maua pe le maua e le tatou eleele, a e afai e gaoioi ua leai foi la se eleele o le a tatou

nonofo ai. A o lenei foi ua gaoioia foi la se eleele o le a tatou nonofo ai. A o enei foi ua gaoioia nei ma amataina ia galuega tetele ma le faigata, o Uafu ia. O le faamoemoe moni lava o lau ai fua o a tatou faatoaga o tamaoiga faapitoa ia i lo tatou Malo. A o le vaaiga ma le faanoanoa, ua amata ona tu lelei mai Uafu a e vaai atu i le tamaoiga faapitoa o le a alu atu. Aua o le fa'i ia ua le iloa nei le tulaga o tu ai. O matou nei itumalo ou te tau atu le mea moni i o outou luma, ua matua leai lava se fa'i e oo lava i se fa'i e taumafa ua leai atoatoa lava. O le vaai lava e tasi o lo o ou vaai ai au po o fea le togafiti lea e tape ai le faamai fa'i, ua fiu foi i fai faatonuga e pei ona oo atu le Ofisa o Faatoaga a e le tea ese lava. A toe toto atu foi isi fa'i fou e toe taumafa foi e manu nei e faaleagaina fa'i, a ua le malamalama la i le tulaga o lo o i ai nei e faaleagaina fa'i, a ua le malamalama la i le tulaga o lo o i ai nei pe faapefea le togafitiga o lenei faama'i? O lau faatusa i le taimi ua mavae, o le Malo o Inisinia faapitoa ia a matou nei o nisi ia e fesoasoani ia te outou. Ona i ai lea i le taofi e faapea, o oe o lo o faapitoa mo le galuega, e tele mea o lo o alu i ai lou mafauau e oo ai ina e tago sese i se isi fasi uamea, ae vagana le Inisinia fesoasoani o lo o toa pea, aua e leai se mea o mafatia ai lona mafauau e mafai ona tuusao atu le uamea o lo o e faafinagaloina e fesoasoani atu ai ia i se mea faapitoa. O lea ou te talosaga atu ai ma lou ava ma lou faaloalo le Malo e, ia outou alofagia ia outou amanaia sina a matou fautuaga i le fauina o la tatou Enisinia.

O le taimi lenei ua tatou i ai, ua motu lo tatou Malo i o outou aao, ou te faapea atu lau fautuaga ua tataua ona faagaoioi loa le atunuu atoa. Aua e le gata i le gaoioi mo le fesoasoani tele mo le galuega tele o lo o taumafai e lo tatou Malo a e fesoasoani tele foi i le manuia taitoatasi ma le lautele o tagata uma o le Malo. O lea o le ala lea o lau tala atu faapea, ia faagaoioi, ona o lenei afai lava o el a tatou tuu tasi lava lenei ala tupe, popo, koko, fa'i, ou te lagona e le o le mea lea e autu i ai lou taofi e gaoioi tagata uma lava vae atu le mamalu aua e pei lava ona ou faamatala atu i le taimi o muamua, o le a tauau ina uma le eleele e agai i ai tagata e toto ai lea faamoemoe, ua toe o eleele tau le Malo i gauta o nisi itumalo, ua leai se mea e gaoioi i ai tagata a o eleele ia e i uta ua maua e lo tatou malo, ma ua leai nei la se mea e gaoioi i ai. Na o le mea e tasi, o le a toe foi lava i le mea lea e pei ona ou taua anamua o le nofonofo filemu lava e le gaoioi. A faapea foi ua i ai sina fasi eleele ua tuu atu e galulue ai, e le mafai e se tasi ona faia se faatoaga i sona lava malosi e aunoa ma se tupe e fai ai. Ou te tau atu afai e malosi tagata e fai i ona lima le faatoaga, na o le mea lava e tausi ai lona soifua, a o le upu i se mea agai i le atiinae ae, tailo, e le mafai. O lou iloa la na o e lava ua soifua i le soifuaga manuia o lo o maua a latou seleni. O i latou la ia o le a galulue i fua o faatoaga i lea ala manuia ma mau ai le manuia o le Malo ma latou, a e talofa i le lautele o lo tatou atunuu. O lea la ou te faufautua atu ai lava a'u ma le ava ma le faaloalo, afai e faigata ona toatasi lenei ala manuia o lo o tatou faamoemoe i ai a o lo o tu mai foi faafitauli e faafetaui ai, ai se a ea e taofi ai a e le taumafai e faaulufale mai ni Kamupani gaosi mea ona o mai lea o le tele o aiga o le atunuu e faigaluega ai ma maua ai tupe. O nisi e totoe i le aiga o i latou ia o le a taumafai a maua atu ai le tupe i i e ave e gaosi ai a latou faatoaga mo le atiina

ae o el atunuu, ona le gata lea o lo o manuia ai le agai i gaioiga mo le Malo a o lo o manuia tutusa foi tagata uma o le atunuu lenei na ala ai ona fai lo tatou Malo. Silasila i o tatou uso ia e i ai nei i Amerika Samoa e leai lava ni faatoaga, masalo e laitiiti lava nai faatoaga o lo o i ai i le motu, a o le galulue lava o tagata uma i Kamupani eseese faapena, ou te tautino atu nei o lo o soifua fiafia Tutuila ma Manua. Tulouna le mamalu o le fonu, ona o lou nei lava mafaufau ou te manatu e faapea, afai ou te taumafa i mea taumafa e tele ma lafoai se isi vaega, e leai lava se mea e tupu ai na o oe lava, a o le la e i tua, e leai o le ala lea o louf ai atu ia fautuaina le tatou Malo ia alofagia o se manuia ia sasaa atu ia tutusa lelei tagata uma o le atunuu i se olaga faatasi, ola fiafia ma tapu aao faatasi ai lo tatou Malo ma le fiafia atoatoa. Ou te lagolago atu nai ou mafaufauga e faapea pe toaitiiti foi nisi o el mamalu o le Maota e lei oo i le gaioiga lea e fai i tua o le amo popo, sali popo, ma le tausiga o le aiga atoa, ma le fanau. O nei ona po ua ou taua mea nei, ou te tau atu ua mafatia lo tatou atunuu i tagata o le Malo, ua mafatia, aua ona pau lava lea o le mea e tua i ai, a le alu lava e sali ma popo, o le mea la e fai nei i tua ua no le sali mata o popo tai 4/-, 5/- a o le poloaiga a le Malo o taeao a le tologia ai pili o aoga o le fanau o le a o ese ma le aoga, ou te tau atu ua matua mafati lava.

Afioga TOOMALATAI PEKINA



Itumalo Faaalaalafaga:

Vaimauga Sisifo

Filifilia:

10 Aperila 1964

Faatauto:

16 Aperila 1964

Lauga Faataupou:

26 Iuni 1964


Ma le faaaloalo lava i lau Tofa a le Fofoga Fetalai ma le mamalu o le Fonu. E muamua lava ona ou fia molia le faafetai e ui lava ina ua tele faafetai a e tofu sao lava tagata uma. Faafetai i lenei lauga matagofie ua saunia e le alii Minisita o Tupe ua tuuina mai i luma o sui filifilia o le atunuu, ina ua lava foi aso sa mafaufauina ma faitauai a o lea la ua fia fai foi i ai sina ma natu ona oni fuafuaga foi a lenei tootoo. Faafetai foi i le Palemia ma Minisita o matata eseese o le Malo o Samoa ona o nei mea eseese ua faaalua ma ua maua foi le finagalo onasai e pei lava ona tatu faafofoga i ai i le amataina mai o lenei fonu seia oo mai lava i lenei taimi, e faamalo atu ai ma faafetai i lo outou onosai. O fuafuaga o nei pepa e pei ona tuuina mai ma ua faitau i ai le mamalu o le fonu, o se fuafuaga ua na o ni faufauga a e le o ni mea o i ai, a o fuafuaga a le Minisita ma faatulaga i le koko po o le popo po o le fa'i, so o se matagaluega e alu i ai tupe a le Malo, e maua foi e le Malo. O le mataupu la ua ou fia tuliloaina e au ma ua maua i ai lau faatatau ina ia ou tautala i ai i lenei taeao i le aofia o le Malo, o le mataupu lava lea tau i Aoaoga. I tausaga ua mavae e pei ona matou faalogologo mai tua a o lotea lenei mataupu ma ua pasia, sa lagona lava le vaivai mai nisi uiga i le atunuu ma le mamalu i lenei Maota Fonu ona sa vevesi le atunuu i lea vaitaimi talu ai ina ua totogi maualuga nei aoga. A o tautalagia lenei mataupu i

le tausaga ua mavae, tailo ina nei ou sese a o le mea sa matau mai e matou e peiseai o se mea faafuasei ua oo i totonu o lo outou aofia ma le mamalu o le fonu a o lei talanoaina e sui o itumalo ma itumalo lea lava mataupu. A o lenei ua tatou aofia i lenei tausaga, ua aliali mai nei i lenei lauga e £36,475 o tupe ia e totogi e tamaiti aoga ia tailo vae ane le mamalu ma le paia a o lou lagona ailoga e maua uma lenei tupe. O le vaitaimi lenei o le a faataape ai tamaiti e lei tologia o latou pili i aoaoga. A faapefea nei la, talofa, vae ane le mamalu o Samoa ma le Fonu mamalu ma le Laulau, peiseai e aliali mai, o lenei tulafono ua pasia o le a manuia ai lava n o le tagata e maumea e lava totogi aoga, a o le mativa ma le lautele o le atunuu oi talofa. O le mea la ua aliali mai ma ua iloa lava e lou tootoo e peiseai ua aliali mai o le Malo na o e mauoloa a e le mo e matitiva. Ou te talosagaina ai le mamalu o le fonu i le Kapeneta ma le Palemia, ma le mamalu o le Nofoa, pe leai ea se isi faiga e faatalosagaina ai se isi liuga ia toe saa le fafao ina ia mafai ai e vaega eseese o lenei atunuu ona faaoga a latou fanau ina ia maua le potu ma le atamai e tatau ai, a e aua nei faalolo mai se isi a e fai mo fanau a e maumea aoaoga a le Malo. Le Mamalu o le Fonu, ma le Taitaifono o tootoo ua mavae atu sa na fatu mai ina ia fai se lafoga a le atunuu, a o lenei tootoo vae and le mamalu male paia, e le auai, a e tele faiga e mafai ona fai ai lea mea. Silasila foi na ona faapea mai o le Malo o Samoa, a e silasilai i alii mai nuu mamao ua toatele i totonu o lenei Malo. E tele faiga faapean e mafai ona soso ai i lalo lenei vaega tupe, a e sei taumafai ai leitu lea tau i aoaoga. Na ona valuvalusia o aa o le laau i fanagalo o le Fonu mamalu le Kapeneta ma le Palemia, ina ia fai se isi fuafuaga faapena e pei ona ou faatu atu, e faapena le talosaga atu i lea lava mataupu.

O lona lua, vae ane le mamalu o le Fonu, o mea tau taro ma ogalaau, o lo o auina atu i nuu mamao i la maketi, faamolemole le Minisita sei tau mai pea le tau ua maua ai ia mea, sei faamanino mai e fia malamalama foi ai lou tootoo e oo lava i nei mea o ogalaau vae ane le mamalu, aua silasila foi o le tau o laau o tatou iinei e fai foi la o le manuia ileavatu i fafo a o le puapuagatia foi i le tau ua i ai nei, ua 5/- i le futu le laau Samoa, ai ua manuia ai nuu mamaose sei faamanino mai la e le alii Minisita lea lava vaega ina ia malamalama i ai sui mamalu o lenei Fonu.

O lona tolu, o se mataupu sa ou le manatu ou te tautala i ai, ao le a ou taumafai oan avatu pea, aua ua aliali mai i fafo, olea ou te faaali atu aise manatu e faapea, o le mataupu lenei sa iloiloaina e le Kapeneta ma le Palemia e faatatau i le Faamasino Sili e pei ona sau nei faapefea ona fai lenei mea, ua alu ai foi lenei tupe. E pei ona aliali mai e £1,560. Ou te talosaga atu ai i le mamalu o le Kapeneta ma le Palemia sei faamanino lelei mai lenei mea pe na faapefea ona fai. E fia malamalama lava i ai lou nei tootoo e le taumate e faapea foi lenei Fonu mamalu. I le faaaloalo lava e tatau ai, ona pau ia o mea ua lagona e lou nei tootoo. Ia manuia le Fonu ma ia soifua.

Afioga TUALA PAULO



Itumalo Faaalaalafaga:

Gagaemauga Nu.1

Filifilia:

10 Aperila 1964

Faatauto:

16 Aperila 1964

Lauga Faataupou:

9 Iulai 1964

Lau Afioga i le Fofoga Fetalai a'o le'i faaalua so'u manatu, ou te lagolagoina le lafo ona o itu nei e pei ona faaalua e le uso a Tootoo na ia faatuina lenei lafo, ua le mafai ona tatou taofia pe faamalieleina finagalo o nuu ma itum alo i lenei vaitaimi i lea vevesi.

O taofi faaalua e pei ona matau atu i le Maota i lenei taeao, o se faafiafiaga lava lea ua ou maua i la'u matau atu ona o se faailoga lea e iloa ai ua alualu i luma taumafaiga a lo tatou Atunuu. E ui i le tele o ia finagalo i le lagolagoina ma le teena o le lafo, e peiseai e taua lava ma e faasilisilia i lo'u taofi le talitonuga o Malo Temokarasi e pei ona filifilia e lo tatou atunuu i le tali atu o sui usufono i o latou itumalo ma nuu, ma o mea e finagalo i ai i latou e le tatau ona faia ni o tatou manatu faapitoa taitoatasi, ae faali mataupu ua finagalo i ai afioaga ma itumalo e pei ona avea ai i tatou ma o latou sui i totonu o le Palemene.

I le Fuaiupu 5 i le faasologa o le Lafō o lo'o taua ai e faapea, "Ia fuafuaina e le Malo nisi auala e faaopoopoina ai ana tupe maua, ae le o le aoina mai i pili o tamaiti aoga. Ou te lagona e pei ona saunoa le Palemia, ua le iloa po'o le a le mea o le a fai, a fai atu foi e totogi pili o aoga ua oi fo'i, ae a fai atu foi la nisi fuafuaga a le Malo ae oi fo'i; ae peitai o lo'u lava lagona i lenei vaitaimi i talanoaga ma nisi o le mamalu o le Atunuu, ua latou faapea mai e pei e taua ia i latou pe a i ai se fuafuaga a le Malo i ni lafoga, aua e le tōatele nisi e tatau ona lafo lafoga, aua o nisi lava aiga pe taitoa 10 tamaiti aoga ua faigata ai ona tauave le avega.

O le Aso Gafua talu ai nei na afe mai ai ni tamaiti ma ni ato niu, sa ou fesili i ai pe aisea ua faatau niu ai i le taeao ae le o i le aoga? O le tali, e leai se tupe e totogi ai o matou pili aoga. E ui la ina mafatia le Malo i sauniuniga ua faia ma aiaiga e pei ona agai atu i ai le Ofisa o Aoga faapea le Ofisa o Tupe i le fauina o pusa e ao i ai totogi o pili o aoga ma mea uma faapena, ae ou te manatu e faapea lava i so'o se Malo e fia agai i luma, e le mafai ona taofia fuafuaga aua le alualu i luma o le Malo. Ua outou silafia ma tatou iloa malo tetele i fafo, e tiga lava ona leva ona tutoatasi ma leva ona gaoioi i le faiga o le Malo, ae oo mai nei lava o lo'o tau liuliu ma toe tau faatonotonu. E faapena lava ona fetuutuunai e tusa ma le manaoga o tagata o lona atunuu mai lea taimi i lea taimi.

E pei foi ona taua e se Tootoo e le'i leva ona faamau atu, o le talanoaina o lenei Tulafono talu ai na faateia ai le Maota. Ou te faapea atu la, o se pona lea o le Malo pe afai o le a toe suia lenei Tulafono, ae ua lava le sese na a'oa'o mai i ia sui mamalu o lenei Maota i lea taimi ua tuana'i atu faatasi ma le lē malilie o Itumalo taitasi ina ia tatou toe sasa'a ai le fafao ma toe fai se isi fetuunaiga.

Ona o lo'u taimi ua uma, ou te faai'u atu ai e faapea i lau Afioga i le Fofoga o le Fono faapea sui mamalu o le Maota, ia tatou tepa lava i le Faavae o le Malo mo tagata, na faia e tagata mo tagata.

Afioga TUFUGA EFI



Itumalo Faaalaalafaga:

Vaisigano Nu.1

Filifilia:

27 Me 1965

Faatauto:

13 Iulai 1965

Lauga Faataupou:

7 Iuni 1966

Faafetai lava mo le avanoa. Ua ese le lagona i lenei taeao ona o le lauga mua lenei a lenei sui usufono.

I le faasolo atu la o le vaai i le Maota nei i lou vaai atu i le tala lea i le Afio mai o Lana Afioga Mamalu o le Ao o le Malo, Susuga Malietoa, ma ou toe vaavaai i le itu tala lea i le ata o le Afioga ia Mataafa, ona ou manatu lea i le ata o le tamaloa lea ua toesea; masalo na o Rusia e i ai le masani lea pe a maliu se Taitai o auga Taitai a'o tautua. O le faanaunauga sili lea i e o lo'o ua mau Malo ina ia le toesea lona ata. O lea ou te manatu ai i le tamaloa lea ua toesea lona ata ma o lea ou te tu atu ai i luma o le Maota ma o'u manatu ua faaosofia i le momoo faafuafua i le tausaaafia. Ae paga lea, e le tutusa tagata. A'o le talosaga tumau i luma o le Atua ina ia ou maua lona faamaoni. O le faamaoni e le faaeleleaina i le faufau i se tulaga po'o le faufau leaga i se tagata. E le faatauina foi le mua i le manaomea po'o le agaga faapito i uo ma aiga.

O le tulaga o lo'o i ai le Malo lau Tofa i le Fofoga o le Fono, o lo'o ua ma'i, se'i vaeatu le upu to ia te a'u. Ua lului foi tiga o le ma'i ma ua ao ona taoto le ma'i. O se pelu matagofie ona teuteuina po'o se to'i matautia, ua le aoga lea. Na o sina 'o'e faatauavaa ua iloga lona ma'ai e aoga mole tipiga. Aisea? E ese le taeao e sii ai le fata o Kaisara ese le taeao e tanu ai Kaisara, e ese le taeao e i ai lenei ona ua logologoā le ma'i o le tamaloa, ma o mala faapenei e le tafia i se fetalaiga logomalie, aua e le faapea a ou fai atu nei o pulupulusia o tofaga o le a liua ai i le fulu le fatafata vaivai. Afai o le fatafata vaivai e ao ona ui atu i upu tautino ma upu sasa'o, aua ina ne'i te'i ane ua faasese tagata. O le fesili lava lea o lo'o tu mai i luma nei – O a ma'i ae faapefea foma'i? O le auga tonu lava lea o le lauga i le asō i le avatu i lo'u faamaoni i upu tautino le tali o fesili ia. O a mai ae faapeafea foma'i?

O le Palemene o Peretania e peiseai ua avea ma Palemene matua po'o le tina o Palemene ona ua avea o ia ma faataitaiga o Palemene uma o Malo faa-Palemene. O le Palemene foi lea o lo'o i ai pule silisili aua ua matagofie. O le mamalu o sui tofia aloaia e faavae mai i lona finagalo malie, ma o le tau'i o tupe po'o tulaga o tautua matavela e faavae mai i luga o lona agaga sa'o. O le malosi o itumalo e faamoemoe i atunuu, ae e i le Palemene le pule faasoa. O le pule silisili lenei a le Palemene sa taufao i le va o le Tupu ma le Palemene ma o le nofoaiga a Salesa I, na faasino ai le maa o le Vavau ma ua toto ai le niu o le tuaoi. O ai a faia faiva o Pule? Sa i ai

le faitau ia Salesa I, o lo'o ia te ia ma ana Minisita le pule atoa, ona pau le aia a le Palemene ia nono atu tupe aua lana pulega. Na faaalua le tetee a le Palemene i le taofia o nei tupe. Na siliga tali i seu o le a maua se tonu i le va fealoaloai, tofu tago'au loa itu, tau le taua malolo le tupu ae maua ai ma le iuga o le a aulia le ao. O le Faavae lea o le Pule Silisili a le Palemene e mai luga o le toto maligi ma le Ao o le Tupu o Peretania.

Lau Tofa a le Fofoga o le Fono; i le po ma le ao pe a e saili i Tulafono a Peretania, e te le maua ai le upu "Kapeneta", aua o le Kapeneta o se isi lea Komiti e faatuina i le finagalo malie o le Palemia e faatinoina lona finagalo. O le fesili la o lo'o ua tu mai nei i ou luga, e faapefea ona saili ma faatino le finagalo o le Palemene i atunuu la ia?

O atunuu nei e mua'i fai fono a Vaega po'o Pati, e saili le polokalame o le a momoli i le atunuu ona fai ai lea o fetuunaiga pe faapea atu nei, 'Ia malie a le faia vaipaipa o Aana ailoga ou te toe foi mai'. Pe faapea atu foi se isi itu, 'A fai vaipaipa o Aana pe a e malie mai o le a pulea e le Malo le faatauina atu i fafo o le koko. O fonotaga foi nei e maua ai ma aiaia tulaga e muamua ma le mulimuli. O a mea e muamua, pe muamua fai fale talimalo pe muamua fai vaipaipa? Ona momoli atu lea i le polokalame ma ave i luma o le atunuu, a mau Malo o mea ia o le a fai. E oo foi la i le filifiliga o Minisita o nei Malo e filifili mai i sui o le Maota Fono, ma o lea foi le tulaga o faaeteetega o Minisita i le finagalo o sui o le Palemene. Ma e talu ai faiga faa-Pati, e le gata ina manatu le Minisita i lona itumalo ae tele lona faaeteetega i le atinae o le atunuu. Aua pe a tusaafia e lona itumalo ae foi mai i le Palemene ae pau sui o le latou Vaega Faaupufai pau ai ma le latou Pati e le mau Malo, o lona uiga ua le Minisita. O le mea la e pei o lo'o tuliloaina nei e la'u lauga ona o le leo o le Palemene o lo'o alu atu i le mea o lo'o fofoa mai ai Tulafono Tau Faaofi, ma o a uma lava Teuteuga o lo'o tumau ai pea le taofi ma le finagalo o le Palemene.

Lau Tofa a le Fofoga o le Fono, ou te faanoanoa i le ulagia e le atunuu aua e le alofia le ulagia o le Pule a le Palemene lenei. Ua oo foi i nisi sui usufono o le Palemene, o lo'o talanoa po'o saunoa faatausua i le ato lafo, aua pe tainane nei e 90% e fulisia i se mataupu, ae a le talafetaui ma le finagalo o le Kapeneta mataupu ua i totonu o le ato lafo, e leai lava se faatinoga. Ou te manatu i ni mea e ao ona pine faamau ai la'u faamatalaga-

Ou te manatu i le Feagaiga Faauo ma Niu Sila. O la ua te'i lava ua pulea ai le va fealoaloai o Samoa nei ma Niu Sila, ae e le'i silasila i ai le Maota Fono ma pasia. Ona ou manatu lea i Faigamalo i fafo po'o le vaitaimi o le Peresetene o Uilisona i Amerika ma lana tagi faaoioi i le Senate, 'A i ai ni ou alofa o a'u nei lava lo outou Peresetene e ou le lafo e faatu le Malo, le uluai Malo Afaatasi; ia lagolagoina lenei mataupu. Ua toatamai le tofa ona ua afetualaina e le'i talia. O a la iuga, e le'i auai le Malo o Amerika i le uluai Malo Tutoatasi e faapea foi tuutuuga mai le 1944 i le Fono i le laumua o Kanata a sui o Ulu o Malo, le va o le Peresetene o Amerika ma le Palemia o Peretania. Ina ua uma taulalumaga o lea Fono ma ua lagona mautinoa e le Peresetene lona tusaafia i le Maota Fono, na ia saunoa atu ai i le Palemia, 'Alo mai ina ia ta sainia le Feagaiga'. Na tali le Palemia, 'Ia e finagalo malie e le mafai ona ou sainia se aiaiga i le va o oe ma

a'u, ae vagana ua momoli i luma o le Palemene e faaali i ailona finagalo ma pasia ma ioe i ai, ona faatoa mafai lea ona saini le Palemia Peretania'. O le ala lea ou te molimoli atu ai le agaga lea ona o le eseesea o tulaga. E i ai le faaeteetega ma e leai se aiaiga i le va fealoaloai ma Malo po'o se isi lava mea taua, ae vagana ua siligia le tofa.

Silasila foi i le isi tulaga o le aveesea o le pule po'o le aia a le Palemene po'o le manatu mama i ai o nisi? Na alo nei le Palemene ma filifilia le Komiti e aiaia tulaga i Aso Fiafia ma Aso o Sisiga Fua, ae te'i ane o lea ua pulea e Masiifo Fetau aiaiga o ia mea. E le alofia foi la i la'u fesili i le Fofoga o le Fono aua o le a ou tu nei ma mamalu ma faigata o le Palemene, o mamalu faigata ia e masani ai le Palemene. O ai lava le mitimiti e tofotofa ave i se isi Komiti, a'o lea o lo'o i ai le Komiti ua uma ona aiaia e le Tofa paia i le Maota lenei e faia tulaga nei? Silasila foi la, o ni mamalu ma ni matagofie i le tuai momoli atu o Tusi Valaau ma le tulaga o sauniga o le Tutoatasi? E tele foi sui usufono o le Maota e le'i oo atu ni o latou tusi. O lea la ou te faanoanoa ona o le maimoa mai o fafo i e o lo'o taumafai mai e faamaopopo tulaga o nei faigamea, ae sii mai ma silasila ane o lo'o gaogao nofoa o sui usufono.

Ou te manatu foi i tulaga o le afa ma ua ou avatu ai la le fesili – O a la taga a Tutuila sa fai i tua mai o le afa? I la lea itula ua talai le Fono o lo o fili po ma le ao le tupe-toa ma le manoa a faapefea fofa i faalavelave aua i tatou nei? Ia vaeatu lava le paia o le Maota Fono, ai ua auvalea le tofa ma le uta i lenei Maota Fono e ala ai ona le talai ma iloiloaina lenei mataupu, ma avatu ai i se isi Komiti e anoanoai ai papalagi o i ai. E lua lava la mea o lo'o ou fia faitio ai. Ou te manatu, ana aumai i le Maota Fono, o tonu lelei ma tonu maopopo e maua ai, ma a i ai ni vevesi e tataua ona momoli atu fautuaga i luma o le Maota Fono. E ui foi i ni malamalama o lo o i ai i lenei Komiti, e le sili ae so latou iloa ma so latou alofa i le atunuu nai lo Pulenuu ma Alii Faipule o lo o faafeagai pea ma tagata ma nuu ma itumalo i aso uma aso uma lava; ma e le gata i lea, a gau le malie le atunuu, pe ave atu nei a oloa uma, malie le tuinanau o le mativa mai le afa, ao le gau le malie o le atunuu, pe to atoa mai nei le moana lenei ma aumai uma oloa mai fafo, e le mafai lava ona faasufi le gau le malie lea. O lea la e i ai le taofi, ana aumai e aiaia maea i totonu o le Maota Fono, e i ai lava le taofi maumaututu, e le tau i nei tulaga faaletonu.

Ua puupuu lo'u taimi, o le a ou taumafai atu foi i sa'u taumafaiga vaivai ona tala ootooto atu la'u tapenaga mo le aso ma ou te toe momoli atu e faapea. O le tulaga lea o lo o moomia nei ina ia sao atu le leo o le Palemene i le mea o lo o fofoa mai ai Tulafono. Ona silasila foi a aumai nei la lafo o le masini tau eletise i Apia, e le mafai ona ioe i ai, o lea e puipuia e le Tulafono Tumau, ona ou faapea atu lea – Taofi, faatali vagana ua outou malilie mai i le vaipaipa o Faasaleleaga po o auala galue o Aana. Ae vagana la ua sau le leo mai tua ii i le mea o lo o fofoa mai ai Tulafono ona faatoa mafai lea ona i ai le leo ma fai i ai fetuunaiga e pei ona masani mai ai Palemene mai o. Aua o le tulaga o lo o i ai nei, e vaai faanoanoa i ai, talu ai ua le au le leo o le Palemene i lea tulaga i le mea o lo o fofoa mai ai Tulafono ma nei mea o Tulafono FaaPoloaiga ma Tulafono Faatonutonu o lo o faatu mai tua o le Palemene.

Ou te faatusaina le faiva lea ua tatou fai o le faiva o Manaia. E fatu ma lagi mai e isi le pese ae se'i tulou se upu e to ia te au, e sisiva i ai le Palemene. O a lava le malie i lea pese pe e te oso liliu, pe e te faaalo pe e te lalo, ae fua faatatau lava taga i le pese lea. O le mea la o lo o moomia le mamalu e o le Maota Fono, e le o le sui o taga ae tatou agai i le mea o lo o fatu mai ai le pese.

Ou te fia tautala puupuu la i tualga ia talu ai nei ona ua le au atu pe ua saisaitia pei o le lauao o Taemanutavae le tofa i Tootoo ma, o lea la ua aumai ai ao o Kamupani ma alii mai fafo i le pulega o Malo.

Silasila i le tulaga muamua, o le mea lea o le Tulafono i le faoa o Eleele. O lo o i ai nei le faaupuga e mafai e le Malo ona faoa eleele o lo o faamoemoeina mo se taulaga. O nei tualga e le o pouliuli foi i le Maota po o le atunuu e afua mai i le uunaiga a kamupani ona o lo o manaomia e faatau atu pe fao e le Malo eleele ona avatu lea ma latou. O a'u foi e tau i kamupani ae ua le alofia i lo'u taofi le mea tonu ma le mea sa'o. E le o i ai i le Tulafono a Niu Sila po o Peretania leni faaupuga, aise a? Aua a faoa nei e le Malo, ua sopo pa i le aia tatau a tagata; ma leni, o ai la le lautele o le a puipuia e le Malo, le toaitiiti o Kamupani po o le afe ma afe o Asau e ona eleele ma faasino tonu i ai nei eleele? Le Maota Fono ou te le tautala auiliili i le mataupu leni ona o aso o lo o muamua e aumai ai sa'u lafo. Na o leni lava, a oo mai le matai mai se motu o Salafai e tagai i le tele o le lauelele o le Palemia ma o lo o i ai nei lisi e oo mai i le asō, e maofa i upu nei, tele, lava, lasi. Ae ui i lena tele, lava, lasi lau Tofa a le Fofoga o le Fono, e le'i tuia le tofa i le faatinoga o sana pule i le vai pumo'o i Toamua. E faapenei la, e le aia moo i liu o vaa pe ou te fai atu o ai ua sese, ae na o leni ou te talosagaina pe a foi mai le Afioga i le Alii faapei ona e naunautai i ou eleele totino, e faapena foi le auau o le motu o Salafai ia i a i latou, aemaise leni tulaga au molimoli mai nei e Spencer e faasino i mea tau laupapa e le moomia e kamupani mai fafo se faafeagaiga ma tagata ma eleele tau Samoa, tasi le leo e faafeagai. O mea lava ia o lo o atugalua ai nei Lau Tofa i le motu lea, ai po o fea le mea a falolo mai ai i latou e faasino tonu i ai nei eleele. Tuu ane la i le tulaga i faleaoga, auala, falemai, o galuega totino a le Malo uma nei. O leni lava e alo itumalo e taumafai nei atinae. Aisea? Ona o le manatu alofa ma le fia fai Malo. O le Malo faatoa faatu ae a ua le tulaga tatau, o galuega ia e fitoitonu ma o galuega e ao ina galueaiina e le Malo. O a la tau i leni alofa? Silasila foi le Maota Fono, o lea ua avatu nei tupe e sue ai tupe a le Susuga ia Eti Percival; a fuafua atu la i ai ua le fetai. Ua i ai le agaga vaivai ua le sa'o le faaso, ona silasila lea afai ua tele naua tupe a le Malo, ia uluai fai ana galuega totino ae mulimuli ai ave fesoasoani e sue ai tupe a ia. A manatunatu i ai e tagi'u'u le fatu o le Maota Fono pe a manatu i le sulusulu vale o tina e sue tupe o aoga a tamaiti. Manatu i le timuia ma le laina o itumalo aua faleaoga ma nei falemai, a'o la ua ave tupe fai ai fesoasoani. E pei lava foi ona ou fai atu ma le faaaloalo, a ua lava tupe a le Malo fai muamua lau galuega totino, ona e alo lea e fai le fesoasoani e sue ai tupe a la. E le o pouliuli foi le Maota Fono i le tulaga o Kapeneta, ma le au atu i ai o papalagi. O lo o ia te au nei se Tusi na faamatala e se isi na niuali i leni tulaga. O ana faamatalaga manino faapenei, e le taitai taga se isi i aiaiga

ma taulumaga a le Kapeneta. Vagana ua faafitauli ma ua gaogaosa le matagaluega a le Minisita tau Tupe ona faatoa avatu lea o se talosaga e faataga mai ai ia avatu le Ulu o le Matagaluega e faasoosoo upu ae o se mea e seasea fai. E matau atu nei le atunuu, o le Ulu o Matagaluega ma Alii Papalagi ua faapei foi o nisi Minisita. E oo lava i le Maota nei, o lo o tagai atu nei sui taitasi i le oo mai o alii o Ulu o Matagaluega o lo o ua fai atu le lauga ae avane e ia le tali e molimoli mai e le Minisita. O le faalavelave lava lea e le alofia i lau Tofa a le Fofoga o le Fono, ma ou te manatu o le tofa o lo o faia pule i le Malo leni, ou te faatusaina i le fafine talitane, o le alualu lava o lea papalagi sa po lago i o sau iinei faasufi le tofa, siitia, taamilo le Tofa i le taulaga, avaga ane i lea tala o le vai ma le usuga avaga ane i lea tala o le vai ma le usuga, ua a, ua oi, ua fai leoleo e leoleoina le Palemia, fai leoleo e leoleoina le Ao o le Malo, ao lou taofi i lau Tofa al e Fofoga o le Fono, o le tofa e faia faiva o Pule, e le soona gasea i se vevesi. E le soona gasea i le muga a le Pule pe soona vevesi foi i tala o le Usuga ma le Vai. Ou te manatu ai la i le faataitaiga lea o lo o aumaia i le Malo o Isaraelu ou te le lafoina uma foi faapea ua leaga uma papalagi, po ua lelei uma papalagi ae ou te manatu i le nofoaiga a Solomona ina ua gagae lona mafaufau ma ua tuinanau i le Tupu Tamitai o Seepa ua avanoa ai tagata Seepa na pulea le Malo. O a ona tuutuuga? Ua faaetonu ma vevesi, e i ai ona fautua mai le alii i le Faataoto i lona ataii, "Ia e faaeteete i le fafine ese". Ai se a? Aua o lona laugutu e suamlaie e pei o le meli, a o ona gutu e lamolemole ai lo le suauu, ae mulimuli ane e oona e pei o le laena. Ma e maamaai faapei o le pelu e faataumaai ona itu. O le tulaga o lo o tuliloaina lau Tofa a le Fofoga o le Fono, ia toe faafoi mai lava le aia leni. Silasila e oo foi i mea e le au i ai le Pule a le Palemene, o lea ua na soli. O aia tatau a tagata taitoatasi. O lo o fola manino mai i le Faavae o Samoa puipuiga o aia tatau a tagata e faigaluega i le Malo, a i ai se Pule e soona fai po o se Pule sau e mafai ona tagi atu i le Faamasinoga. Ua a nei, ua ave le Pule a le Palemene e fai ma lafitaga o le loto matau'a.

Lau Tofa a le Fofoga o le Fono, ou te faatagisia lava lau Tofa pe mafai ona ou tali atu le faauilavea ua tuuina mai aua o lou manatu atonu foi o le a talafeagai ai ma fesoasoani i le faia o lau faaiuga e uiga i leni mataupu.

Sa i ai lou manatu o faiga e masani ai Palemene uma o le lalolagi, ma Palemene uma o lo o faavae i luga o le faiga Faavae faa-Palemene a Peretania, ua na o le uiga faaaloalo lava le faaauu pea o se lauga mua a se sui e aunoa ma soo se faalavelave. Sa i ai lou mafaufau faapea e tatau ona taea lena itu e le Susuga i le alii Minisita, ae peitai ua aliali mai ua ese foi le finagalo o le alii Minisita.

Ou te faamalulu atu i le alii Minisita ma ou manatu i le fautuaga a se isi tagata fai Tofa i Peretania i mea tau tupe. A oo i taulumaga faapenei ma ua mautinoa e mativa le Malo i tupe, tautuana ma oe aua nei e mativa i le tauagafau. Lau Tofa a le Fofoga o le Fono, ou te manatu e le gata i le faoa o pule a le Palemene ae oo foi lava i aia tatau o sui taitasi o lo o ua solia foi talu ai lava leni pule sau, ona i ai la lea o tulaga nei ua aveesea ai Larkin ma Moors.

Afai ua tele le loto malosi o i le Kapeneta, e le sue gata lena e pupu ai i fale le sau ae alo ane e fai ai le va ma papalagi ma le Malo o Niu Sila. Silasila foi i le tupe lea

na nono mai nei e £70,000 e aumaia ai ma ona lauvai? A ou matau atu la lau Tofa a le Fofoga o le Fono e miliona ma miliona o lo o ave e Niu Sila i isi Malo mai fafo. Ae le sei tofotofa la, aua e faapea, vagana le finagalo malie o Niu Sila ona tofia lea o Pai ma Lafai e faia le faasoasoaga o tupe na. Ai se a? Aua ua aia i le pulega faale-Malo. O a la aoga o Malo Tutoatasi pe a faapaolo mai pea pule a le Malo o Niu Sila?

O le a faai'u la'u lauga lau Tofa a le Fofoga o le Fono. E i ai lava lo'u agaga mauualalo e faapenei, afai ua paopapa se upu, alofa ia lafoai ona e afua atu i le naunautai i le manuia o le atunuu ma le loto tiga i mea ua lagona o pule le sa'o, ae afai o i ai se aoga mo le manuia o le atunuu, ou te talosagaina le Maota Fono ia e taofi i upu a Paulo ia Filipi, "O a uma mea ua moni, o a uma mea ua sao ma mea uma ua tauleleia, afai o se isi amiotonu po o se mea e ono viia, ia outou manatunatu i ia lava mea".

Ia manuia le Fono.

Afioga TUIA IOSEFA



Itumalo Faaalaalafaga:

Safata

Filifilia:

10 Aperila 1964

Faatauto:

16 Aperila 1964

Lauga Faataupou:

29 Iuni 1964

Faafetai lava mo le avanoa i le mamalu i le Tofa a le Fofoga Fetalai, e faapea foi le mamalu o le Fono. Ou te fia tautala faa tatau i le mataupu ua feagai ai, e uiga i le saunoaga a le Minisita o Tupe. Ou te faamalo lava i le susuga a le Minisita o Tupe i nei saililiga loloto ua aumai i luma o lenei Fono mamalu ua fai lea ma mea ua mafai ona fesailiai ai finagalo agai i ai mo le tau atiina a'e o lo tato Malo Tutoatasi. Ou te lagona ana le tuuina mai lenei faamalamalamaga ma le tulaga ua oo i ai lo tatou atunuu, po ua tatou le maua ni mafauauga e agai i ai, ona o le mea ua faatino mai, ua leai se agai i luma o Samoa, a e na o le agai i tua e faatatau lea i fua o le laueleele. E pei ua faaalua lava ma faatino mai o le fatu lea o le Malo o Samoa o mea e alu i fafo, e i ai le popo, koko ma le fa'i, ma ua tatou mautinoa lava ua tele ina faifai malie ifo ia vaega taua o le Malo. Ua i luma la o le Fono mamalu fautuaga loloto m ale matagofie a sui e fesoasoani i le Malo, ua fofoga i ai le afioaga i le Palemia ma le Kapeneta ma le Fofoga Fetalai ma le mamalu o le Fono i fautuaga a sui taitasi ma o latou faamoemoega i le Malo ina ia mafai ona latou lagolagoina lelei mafatiaga o le a feagai ai ma le Malo o Samoa. O lou talitonuga la, ua leai la se mea o lagolagoina ai pe fesoasoaina ai lo tatou Malo i tagata o le atunuu, aua o lo o i ai pea talosaga ma fautuaga a Samoa mo nisi fesoasoani e faatatau i mea ua uma ona avatu e nisi sui e i ai auala, vaipaipa, ina ia alofagia ai Samoa. Pe a ou mafaufau atu i le talafatai lea e i luma nei, o lo o taumamafa lava i vai lelei, ma silasila i moli eletise, a o nuu itua, o lo o sau pea iinei a latou talosaga ma a latou aioiga i le Malo e fia maua atu s fesoasoani. O le mea lea ou te avatu ai foi se talosaga ma le ava ma le faaalalo tele i le mamalu o le Fono i le

afioga ale Palemia ma le Kapeneta ina ia alofagia nuu i tua e pei ona taupati nei foi le Malo i le totogiina o aoga, talofa aua o lenei ua faaali mai i le saunoaga a le alii Minisita o Tupe, ua solo i tua ma ua le tutus atausaga o le tausaga lava ma pau. O lenei foi ua toe avatu lenei avega i lo atou atunuu e toe faatietie atu i ai a ua i ai lava iina i finagalo o sui. O le isi e mafai ona latou tauave totogi o aoga a le fanau a o nisi e leai, a e ou te talitonu o Malo malamalama uma e matua faatumutumuina i o latou agaga le taua o fanau faamoemoena mo le lumanai o Malo. Ou te talitonu o le tasi lea faatoaga a le Malo o le a pau i lenei vai tausaga, o fanau ia a Samoa ela le oo atu o latou taumafaiga o le a le mafai ona totogi a latou fanau o le tasi lea faatoaga a Samoa o le a pau i lalo i lenei tausaga e pei ona faasolosolo atu fua o le laueleele i se tulaga faigata, ou te talitonu o le a faapea foi o outou alo ma a tatou fanau ma alo faamoemoena o lo tatou atunuu ma lona malo tau atiina a'e. E ui lava ina ou lagona o le mataupu ua uma ona pasia a e ou te fesoasoani ma ou lagolagoina ai foi nisi tootoo, ma e lafo atu ai lava i le afioga a le Palemia ma le Kapeneta sei faamolemole sei toe liuliu lava i ai le tofa mamao i lenei lava mataupu. Ou te talosaga ai foi ina ia maua e nuu i tua se fesoasoani mai le Malo ina ia lagolagoina ai lo latou vaivai mo le tau atiina a'e o fua o le laueleele e pei ona faaali atu e nisi sui i luma o le fono mamalu, e tele lo latou fia gaoiio a e le tusa la latou gaoiio ma le mea o i ai. O nisi latou te lava tauave le gaoiio o ia mea, a o nisi e tele le loto i ai a e faigata ni mea e gaoiio ai, ma o le itu lea e fia talosagaina atu ai ina ia mafai lava ona fai ni auala e le Malo i nuu i tua ina ia mafai ai ona faafaigofie le faagaoiio a latou faatoaga. E le gata i lea, o vaipaipa; faamolemole, ua i ai nisi itumalo ua fia ni o latou Falema'i a o le mea ua faafitauli i Foma'i po o e gasegase o le maua gata lea o le suavai. O le mea lea e talosaga atu ai, e pei ona avatu e nisi sui itu o lo o faafitauli ai nuu o lo o tumamao ma le tulaga. Ou te talosagaina foi le mamalu o le Palemia ma le Kapeneta ma le mamalu o le Fono ona o se itu faapenei, ia tutusa lo outou silasila i mea atiina a'e faatino o le Malo i le taulag, ma lo outou silasila alofa i nuu i tua o e o lo o latou taumafai ona atiina a'e fua o le laueleele e faatino ai lo tatou malo i mea e tatau ona fesoasoani ai le Malo i le atunuu.

Sa lavea i nisi tootoo le Ofisa lea o Faatoaga, ma ou te avatu lava lou nei talitonuga i lenei ofisa i a latou galuega mataofie ona o a latou galuega lelei. Ou te talitonu o le ofisa lenei ua latou uuna'iina le faapalapala ma le faavaivai o lo tatou atunuu i mea e atiina a'e ai nuu. Ou te talitonu ana fai a e sei faamaopoopoina e lo tatou atunuu galuega a lenei ofisa ia latou timaiga ma lagolagoina i mea e fai, po ua lava ona tatou tutu faatasi i se manuia o Samoa. Silasila foi i le sueina o le manu'ainiu o lo o afifio atu pea lenei Ofisa ma taugologolo atu i alaafaga taitasi i niu, oganiu, ina ia aveeseina ma le faatupuina ai pea o le manu'ainiu. Ou te iloa lelei lava aua ou tre vaai foi i ai, ana fai la a e sei galulue faatasi le atunuu latou te lagolagoina lenei faatonuga matagofie, po ua leai ni manu'ainiu. A oo atu le asiasiga ma faatonu ia oganiu vae atu le paia o le Maota, e toe alu atu ua ave ese nsii a o lo o i ai lava nisi, o lona uiga, o la lava e faaputu e isi le manu. Ana le seanoa le Ofisa o lo o latou uunaiina le vaaia o otaota i nuu taitasi

po o penei o lo o fau ai pea ma tele ai le manu'ainiu, faapea foi i niu, o le ofisa lava lenei o lo o atu ma tau atu i ai e aveese, peitai o nisi ua mafai ona latou faamaopoopoina ma lagolagoina lenei galuega matagofie a o nisi nuu ua le mafai, peitai la a alu atu se asiasiga ona fai lea i luga o le aganuu, a e semanu ou te talitonu o se vaega tupe tele le mea e maua e le atunuu i lenei vaega, a o lo o taumafai pea lava le Ofisa o Faatoaga, o lo o latou faaalaina le atunuu, o lo o tuituiina atu pea le faapalapala ma le faavaivai. O lo o galulue faatasi lava ma tofi o lo o tuuina atui le Pulenuu. O le Pulenuu o lo o tauaveina lenei galuega fita foi ma le mamafa faatasi ma le Ofisa lenei, o lemea lea, e talosaga atu ai in aia lagolagoina ma ia fesoasoani foi le Malo i le Pulenuu i le galuega o lo o ia tauaveina, ma ou te talitonu o le ofisa foi lenei o lo o taumafai foi mo timaiga e faatatau i le fa'i ma le niu ina ia totoina. E pei lava ona ou fai atu, ana se mea e lagolagoina ma famaopoopoina e lo tatou Malo faatonuga ma lapataia a lenei ofisa, po u aleai lava se tausaga e pau ai le popo ma le koko ona o le vailaau o lo o feagai nei ma sa feagai ai, o se tasi foi lea taumafaiga sa feagai ai fa'i o le a aoga, a olea ua tino mai, ai lava e le aoga lenei togafitiga mo lea faama'i, e le faapea la ua fai fua e lenei ofisa, e leai o le fesoasoani mo le atiina a'e ole manuia o le Malo o Samoa, aepeitai ua le fetau.

Ua faafeagai nei tatou ma le uafu lea ua galueaiina nei ua tatou vaai atu i ai ma faafetai ua tatou maua sea mea sili a e ou te talosaga atu, ia alofagia e lo tatou Malo, i le afioga a le Palemia ma le Kapeneta faapea foi le mamalu o le fono, ina ia tatou galulue faanatinati e faatatau mo se fesoasoani i le au faifaatoaga ina ia o gatasi ma le uafu lenei. Ia maea mai le uafu ia a ua i ai ni mea e faalagolago i ai ma faamoemoe i ai o le a faaoga i ai le uafu lenei e lauina ai.

O le isi au talosaga, o nuu foi nei e taumamao o latou Falema'i ma lo tatou Falema'i tele i Apia nei, ina ia mafai ona tofi Falema'i o itumalo ma la latou telefonoi ina i amafia ai e ma'i tutupu faafuasei po o mea e le mafaia e le falema'i i tua ona felogonai vave ai ma le Falema'i tele i Atpia nei i taavale ina ia mafai ai ona faafaigofie ona auala mai ai ma'i faigata e le mafaia i le Falema'i i tua. Aua o le ala lea o le tutupu o faalavelave i gasegase ua fia maua se auala e fia vave mai ai i le falema'i a e na o pasi. O pasi e pule lava le tagata ia i lana pasi e sue ai lana pasese ao lenei ua aumai ai ma le ma'i tigaina e le mafai e le ma'i ona faanatinati le pasi lenei, aua e pule lava le tagata ia sei vagana foi le malosi na te totogiina atoa ai le pasi lenei ona sau sao lea i le falema'i. O lau talosaga lea e avatu i lau afioga a le alii Palemia ma le Kapeneta faapea le mamalu o le fono ina ia tofi falema'i i nuu i tua ma le telefoni e mafai ai ona faavave ai fesoootaiga ma lo tatou falema'i i Apia nei. Ona pau lea o lau lauga tau in aia faatasi mai le Atua e tusa ma la tatou fonotaga mamalu.

Afioga TUIA TAOTOFI



Itumalo Faaalaalafaga:

Safata

Filifilia:

10 Aokuso 1966

Faatauto:

31 Oketopa 1966

Lauga Faataupou:

6 Tesema 1966

Faafetai lava i Lau Tofa a le Fofoga o le Fono, ma o le mea ou te lagona ou te tula'i ma le faaeteete ona o lenei tulaga ua ou i ai. Ou te faafetai tele i le Malo o Samoa ma ona tulaga faalupeina, mai lau Afioga i le Fofoga o le Fono, le Afioga a le alii Palemia o le Malo o Samoa ma lo outou vasega mamalu i alii Minisita, ma le galuega fita ma le mamalu o le Palemene a le Malo o Samoa i Sisifo. Ou te matua faafetai atu i luma o le Fono ona o lenei atiina a'e o le Malo ma le Faavae o lo tatou Malo ua mafai ai, ona o lenei ou te lagona ma lo'u mautinoa ona ua u'u pea ma taofi le Faavae o le Malo o Samoa, "O le Atua mo Samoa, Samoa mo le Atua." O la'u faafetai lea ma le agaga maua luga ua silafia e le Atua o faamoemoega ua fofola i luma o le fono mamalu, ioe sa fuafua lava i le agaga ma le faamoemoe ona o le ava tele ma le faaloalo, ou te talosagaina ai lava lenei fono mamalu ona o lenei lava itumalo faaalaalafaga o Safata. I tulimanu e fa o Safata, ua tele manuia ua atiina a'e ai ua faaopoopoina mai ai pea le manuia o le Malo o Samoa, ia o lenei la o le Faavae o le tautalaga, ua moomia e lenei itumalo se tasi e tausia lenei itumalo. Mai Malo ua mavae, sa tausia le mamalu o Samoa o i ai pea lava lenei talosaga se'ia oo mai nei i le tulaga ua tuto'atasi le Malo o Samoa i Sisifo, ua oo ina aumai ma tofi talu ai nei ua leai se tulaga ua i ai i lenei itumalo, ua le laveaia fo'i i le faasoaga o tofi o le Malo ona i ai lava lea o le faamaualaloga i le mamalu o le Fono, afai ua pasia nei tofi e fa, ou te talosaga atu ia faalima ane ia tofi na.

Tofa ULU LUI



Itumalo Faaalaalafaga:

Faleata Sisifo

Filifilia:

10 Aperila 1964

Faatauto:

16 Aperila 1964

Lauga Faataupou:

10 Iulai 1964

Lau Afioga i le Fofoga Fetalai ma le mamalu o le Laulau a Fono, ua ou tulai atu e fesili i le Mea Taitasi 791 – Vaipaipa lea o lo'o faatulai mai ai le vaegatupe e £4,800 i le puipui (g).

O lo'o faaalai ai i le itu lea se tane sima tele e 5,000 kalone mo Manono e £250, ma le isi tane sima tele 5,000 kalone mo Aopo, o lo'o faatulai mai ai se vaegatupe e £250. O le fesili e fia tuuina atu i le Afioga i le Minisita, pe mafai ona ia faapupula mai ia te a'u ma le mamalu o le Fono, po'o le tupe lea e £250 o le a uma ai le galuega lea i

Manono? E faapea foi ma le tane simā i Aopo, pe maea ai i lea vaegatupe ua faataatia mai?

O lo'o i ai le mea o lo'o faaletonu i la'u faitau atu ona o le itu lenei, pe afai e fuafua i felauaiga o mea faigaluega i le avatu i Apia nei i Maono, pe faamata e lava lea vaegatupe? E faapea foi le felauaiga o mea faigaluega i Aopo ona e tasi lea tulaga faigata ona o le mamao o felauaiga. O le mea o lo'o mamafa ia te a'u ona o le taimi tonu e amata ai le galuega ma le taimi e uma ai, pe fia ni aso po'o ni vaiaso, e le gata i lea o ni masina e faatino ai nei galuega ona e tutusa tau o nei galuega e lua, ae eseese mea o le a fausia ai ma le mamao e lauina atu ai mea faigaluega.

Lau Afioga i le Fofoga Fetalai, ua ou tulai atu ona o le lafo o lo'o tusia i lo'u igoa ma o le a ou faitauina atu faapenei, "Ia fautuaina e lenei Fono Aoa le Malo ina ia faaoo atu le paoa po'o le eletise mai Vaitele ia pa'ia le Kolisi o le Ekalesia Metotisi i se taimi vave e mafai ai".

O le mea lenei o le eletise e fia fai i ai se faamatalaga aua o le tasi lea alatupe tele a le Malo o lo'o maua mai ai i nei onapo. Afai o le a mafai ona avatu le eletise i nuu i tua, o le a mafai foi ona maua ai se tupe tele a le Malo. E le gata i lea, o le a itiiti foi se tupe alu i fafo a lo tatou Malo po'o le Atunuu i mea tau penisini ma karasini. O le a mafai ona ou faaali atu nisi mea taua o lo'o faaoga i ai le eletise i nei onapo e pei o le Fale Uaealesi i Maluafou aua o ona masini uma o lo'o alu i le eletise. E le gata i lea ae faapea foi le 2AP ona o masini o lo'o alu uma i le eletise. E i ai foi fale aisa tetele i onapo nei o lo'o maua ai a tatou aisa i aso taitasi, o lo'o alu uma lava i le eletise. E faapea foi galuega o lo'o faia i le Falemai e pei o le Faaata, Fale Tipitipi vaeane le mamalu o le Fono, ma fale tā ofu. O mea uma ia o lo'o alu i le eletise faapea foi moli ma ili i aiga taitasi i Maota po'o Laoa o le Atunuu, o leitio ma pusa aisa e alu uma lava i le eletise.

E pei ona faaalua i le lafo, o le a mafai ona ou avatu se ata e faapupula ai le uiga o mea e fai ai le galuega lea mai Vaitele seia pa'ia le Kolisi i Faleula. O la'u matau atu pe tusa ma le 40 pou e mafai ona oo atu ai le eletise mai Vaitele seia pa'ia le Kolisi i Faleula, ma e fitu uaea o le a mafai ona faaoo atu ai le eletise. O mea ia o le a faia e le Malo, o uaea malolosi e tolu i luga o le a mafai ai ona avatu le eletise i lona malosi e 6,600 kilouati. O uaea e alu i fafo o le a mafai ai ona maua le malosi e 400 po'o le 230 volts ma ni transformers se tolu e mafai ai ona fai le galuega lea. O mea ia e ta'u o transformers e mafai ona faaitiitia ai le eletise i le 6,600 i le 400 ma le 230.

Ona pau ia o galuega o le a faia e le Malo, a'o le faia o galuega i fale o moli i maota po'o laoa, falesa ma isi mea faapena, o le a faia lea e Kamupani o lo'o faia galuega i tua e i ai Nelesoni ma le Afioga Faasavalu, o i laua ia ua maua tusipasi i lea matata mai Niu Sila.

E faapena foi galuega o lo'o ou faia, o lo'o i ai la'u pisinisi mo galuega faapea i le faiga o moli i tua e pei foi o le kamupani lea a Nelesoni. Afai o le a oo atu le manuia lea i nuu ia e i ai Faleula, o le tasi lea vaegatupe tele o le a maua e le Malo i aso uma ma e le gata i lea, o le a faaitiitia ai le tupe alu i fafo a lo tatou Malo i karasini ma penisini. Ou te fautuaina ai le Fono Aoa, lau Afioga i le Fofoga Fetalai ina ia mafai ona aumai ni masini tetele se lua e ta'i 1,000 kilouati, ona tuu lea o le tasi i Malua ae faatu se isi tasi i le Malae Vaalele ina ia mafai ai ona oo

atu le eletise i Falelatai. Ma o le paoa lea o le a oo atu i Falelatai, o le paoa foi lea o lo'o maua i Apia nei. I le taimi nei i Falelatai o loo i ai la latou masini e alu ai la latou eletise ma o la'u matau atu i ai, po'o le 4 i le 5 itula e faaoga ai i le po ia masini, ae afai la e oo atu i ai le malosi o le eletise i o, o le a mafai ona latou maua le paoa i le po ma le ao.

E faapea foi le faapipiina o le afi i le Malae Vaalele, o le a mafai ona taofia ai nisi alatupe o lo'o alu ma masini o lo'o faaoga nei i le Malae Vaalele ma o le a faaoga loa le eletise lea o lo'o alu i Apia nei. O le uiga o lea itu e pei ona ou faaali atu, e mafai ona o faatasi i masini ia e lua ma afi o lo'o i ai nei i Apia vaega uma ia e pei ona tolaulau atu. O nei galuega uma o le a le manaomia se isi mai fafo e faia ona o lea lava ua i ai alo o le Atunuu ua i ai le poto masani ma ua maua foi o latou tusipasi mauaululuga mai atunuu mamao e faatinoina ia galuega.

E i ai foi le tama lea o Matini Kleis ua i ai ona faailoga mauaululuga tau eletise faapea foi le atalii o Bill Moore ma le tama o August Cain, ua foi mai Ausetalia ma faailoga mauaululuga i mea tau eletise. O lo'o tóatele foi nisi ua i ai le poto masani e mafai ona faia ia galuega, ae le faapea na o ni tagata mai fafo a'o lea foi ua mafai e alo o le Atunuu aua ua i ai le poto masani mo lea matata i mea tau eletise.

Tofa UNE SEFO



Itumalo Faaalaalafaga:

Faleata Sasae

Filifilia:

8 Aokuso 1964

Faatauto:

11 Aokuso 1964

Lauga Faataupou:

20 Oketopa 1964

Faafetai i le Fofoga o le Fono mo lenei avanoa ua tuuina mai.

E tasi lava le tulaga lea lau Tofa i le Fofoga o le Fono ou te lei malamalama i ai ou te fia fesili ai, po o tatou maua meaalofa lea mai Niu Sila i tausaga uma, le meaalofa lea ua faaogaina e le Ofisa o Aoga? E pei ona matau atu i ai, e tasi lava le Ofisa lea o lo'o faaogaina lea meaalofa mai Niu Sila na o le Ofisa o Aoga, ae le o faasalalaua i nisi ofisa eseese o le Malo, mo le atiina ae o le itu tau faatoaga. Po o lenei meaalofa o lo'o faasalalauina i aoga uma e i ai aoga a lotu ma so o se aoga lava i tua o lo'o aofia uma i lenei meaalofa na aumai i le Malo o Niu Sila? Pe faapitoa lava na o le Ofisa o Aoga i Apia? E pei ona matau atu foi i ai i tausaga uma i le faagasologa mai o le Malo o Samoa, e lei faaluina lava lenei meaalofa ua tatou maua mai le malo o Niu Sila. E pei o le talaaga lea ou te lei malamalama i ai po o faaoga i aoga uma e lavea ai ma aoga a lotu pe na o aoga lava a le Malo e faaoga i ai lenei meaalofa tele o lo'o tatou maua mai Niu Sila. E le faapea o tuuina atu se isi vaega-tupe mo le atiina ae o le Fai po o se isi tulaga ina ia maua mai ai se tupe maua a le atunuu, aua na o faataitaiga lava ia o lo'o faatatauina e le Ofisa o Aoga mo le aoga i Avele. O lo'o faataitai lava i taimi uma ae tatou te lei iloa po o a ni fua o lo'o maua mai ai. Ou te lei manatu ua i ai ni fua aoga ua lau atu i nuu mamao e aveva ma fua o na faataitaiga, ma o le mea ua

aliali mai - ua alo atu nei le Malo e fai ana taumafaiga i le Kolisi i Alafua, a ua alu foi le anoano o tupe i Avele. Le Fofoga e o le Fono, e tasi lava le mea ou te iloa, o le meaalofo lenei ua taua, o le vaega tele o lenei tupe ua toe foi atu lava i Niu Sila e ui atu i totogi ua totogiina atu i le 'aufaigaluega mai nuu mamao. Ou te fia faasino atu e faapea, sa tatau lava ona faaogaina lenei tupe mo faaitaiga mo se tasi po o le lua ni tausaga ona liliu atu ai lea o lona faaogaina i le atiina ae. Ou te lagona foi le Fofoga e o le Fono, e tatau ona tuuina atu se vaega o lenei tupe i aoga a lotu ma aoga a itumalo ma nuu laia na fausia lava i le taumafaiga a le atunuu. O le mea e faanoanoa ai i le taimi nei, ona ua maua atu e faapea, ua uma loa ona faaalua tupe i le Kolisi Faa-Faatoaga i Avele atoa foi ma faaitaiga eseese sa fai ai, ona faasaga loa lea o le Malo i le taimi nei e tuuina atu ana taumafaiga uma e faaleleia ma atiina ae ai le Kolisi Faa-Faatoaga o le Teropika i Alafua. Le Fofoga e o le Fono, o au fesii na ma ou te fia maua lava se faamalamalamaga mai le Minisita ua aafia ai.

Tofa VAILI TATUPU



Itumalo Faaalaalafaga:

Aana Alofi Nu.3

Filifilia:

10 Aperila 1964

Faatauto:

16 Aperila 1964

Lauga Faataupou:

25 Iuni 1964

Lau Tofa le Fofoga o le Fono ma le mamalu o le Fono, e avatu lau faafetai i le alii Minisita o Tupe, ona o lenei galuega tele ma le matagofie ua oo mai i luma o le Palemene o Samoa. E le se galuega faigofie, e mamafa tele le galuega sa sagai atu i ai le afigoga a le Minisita i nei tusitusiga maea ma le faamalamalamaga maea ua i luma o le Fono. O le mea moni lava ua ou iloa, o lea lava ua i ai i le agaga o le alii Minisita e pei lava o agaga uma o le Palemene le faanoanoa ona peiseai ua oo i se tausaga ua pau ai le Faamatalaga o le Tupe a Samoa i lo le mea sa masani mai ai peiseai sa tau alu agai i luga, ao lenei tausaga o lea lava ua tau mai i le pepa a le alii Minisita, o lo o i ai lona faanoanoa i nisi itu. O lea foi la ou te fia faaali atu ai ni aua fautuaga ma fesoasoani atu i le alii Minisita o Tupe, ona o le atugalua a le alii Minisita o Tupe i nisi mea ua aliali mai e pei o le popo, ma le koko ma le fa'i e tauau ina alu i lalo a e le tauau i luga. O le mea lea ou te iloa, o le popo, o le mea lea ua saunmoa pea i ai le au Usufono, ma o le tamaoiga sili lea o le atunuu, a o le mea lea ua ou iloa, e tusa lava pe toto ni niu ia tele a e agai lava i lalo, aua o lealava e malsi le manu aini. O lau fautuaga la i le Malo ma le Minisita ua tatau lava ona fai se tulafono e puipui ai lenei manu aini. O fuafuaga uma lava ia sa fai e le Ofisa o Faatoaga, e leai lava se mea o aoga, o le a atu e sue manu aini na ona alu ai o tupe i tagata faigaluega a e leai lava se mea o maua mai ai, o le vaomatua a toto i niu e pep uma, o lea la, a malosi lava le tulafono a le Malo e mafai ona faaumatia ai le manu, o le a ola lelei niu, e le o le lapopoa o niu, e leai, o la lava e faasolo ina mamate niu vae atu le mamalu o le Fono, o le

mea lea ou te tautala atu ai lava au ma lou ava, e tatau ona fai se tulafono. Faamolemole le Palemia ma le Mamalu o Minisita ma le Malo, e tatau lava ona toe tuu agai i tua ia fai se paoa o Pulenuu latou te galulueina ai loa itu aua e iloa lelei o Pulenuu ma o latounuu mea e i ai le manu, a o le vaega lea e o atu iinei, na o talane lava o el fale e feoi ai, ona toe o mai lava lea, a o la lava e pepe niu le vaomatua i manuainiu. O le mea lea e ui lava ina taumafai le malo e toto ni niu se miliona i se masina a e miliona foi niu la o le a faaumatia e le manuainiu i lona lava foi masina, ona pa'i lava i lalo o le popo, o le mea lea e fautua atu ai, ua lafo atu i le alii Palemia ma le malo ia teo faavaeina se Tulafono faamolemole mo le tausaga o niu o le atunuu o le a maimau i le manuainiu ua faateleina a e le faaitiitia.

O le Ofisa o Faatoaga e pei o fuafuaga ia ua faia e le alii Minisita, ua lelei lava, o le mataupu e uiga le fai, e leai sou taofi e agai i luma le fa'i a Samoa, aua o el tele o Itumalo o Aana masalo pe toe lua nuu ia o lo o fai a latou pusa fa'i, ua matua faaleagaina atoa, ma ua le maua se fa'i, a o le tupe ua alu ai ua faamaimau e lenei Ofisa i le o atu fai a latou fuafuaga ma vailaau, e leai lava se aoga, o le mea lea e pei o le lagona lava ma le faamoemoe, taumafai ia titina le faama'i fa'i, aua a fai a e sosolo lea faama'io le a alu ese foi lea Tupe Maua a le Atunuu. O le pepa lenei o lo o faaali mai ai faapea, Tupe Maua faaopopo e tele lava tupe e maua mai le tiute, ma lafoga o Tupe Maua, ma le totogi o Aoga, o lemea la ou te iloa, ona pau lava lea o le ala tupe ou te masalo o le a tutumau ai lava, aua e tumau lava, a e ou te fautuaina ai le Ofisa o Galuega ma faatautu mo le isi vaega tupe, e tatau foi ona maua e atiina a'e ai le atunuu, o le isi mea, o le moli uila, a alu atu le moli uila iinei e tau i Mulifanua ma Falefa, e sau lava le tupe latou e pei o le tafe mai o le vai i masina uma, ona maua lea o lona Tupe Maua a le Malo, e faapea foi ma mea o vai paipa, e pei lava o le mea moi lea ou te lagona o le paipa i Faasaleleaga, o le luma o le Malo lona mea e na o le oga paipa, faapea foi le oga paipa lea e alu atu i Faleasiu e tau i Faleatiu, alu atu nei foi le alii fai vai ia, fai ana fuafuaga ua na ona eli lea vai ma eli lea vai ma alu ai tupe a le Malo ia, fai ana fuafuaga ua na ona eli lea vai ma eli lea vai ma alu ai tupe a le Malo a e le o aoga lava o lea la, a galulue le Malo e faamautu lelei vai o nuu o le a tafe mai ai tupe, aua o le a tatau ona laisene e maua ai masina uma.

Ou te fia tautala agai i le Ofisa o Aoga i le lipoti lea e tu mai ai, a e o lea e tau mai i i totogi o aoga, o se mea faanoanoa i lou nei tootoo ona ua totogi aoga a tatou fanau. Ua lelei foi ua maua mai ai lea tupe mo le atiina a'e o le atunuu, a o le mea lava ou te lagona e a'u, ia malie le Malo ma le alii Palemia ma le Kapeneta, sei teo fai se fuafuaga i lenei mea, talofa i fanau o nai tagata matitiva, e moi e leai se tagata mativa i Samoa, a e faigata tele lea tulaga, ou te fautua atu ai, e a pe a fai se isi fuafuaga e fofa ai lenei mea, e tatau lava ona fai se lafoga a Samoa e fofa ai le mea lea, e mafai ona maua ai se tupe e atiina a'e ai Samoa latou, a e alolofa i fanau o nai tagata vaivai, o taeao ua i ai le faatautu a le Minisita o Aoga ma le Faatonu Sili o le a tutuli ai tamaiti, o lea e fautua atu alolofa i ani fanau toe tuutuu atu, ua vave tele lea fuafuaga, e a pe a toe tuu atu i se isi lua vaiaso. O se mea faafuasei faapenei, e tei lea o tagata o le a faaletonu ai le

atunuu i lenei tulaga, e ui i lea o le tulafono lava ia o le tulafono, a e na o le fautuaga i le alii Palemia ma alii Minisita, ia fuafua lelei aemaise le alii Minisita o Aoga, ia onasai ma faifai malie ma alofa i alo o le atunuu e tusa i lenei tulafono faafuasei ua fai mai, a o lea o le a noatia ai fanau a le atunuu, a o fanau foi ia e faamoemoe i ai le atunuu mo a taeao, ma le lumanai o Samoa. Ou te faaali atu ma lou lagona mea o lo o faaalia i nei pepa ma le faaaliga a le alii Minisita, a lona atugalua ona o le koko, o le koko lava lea e mafua mai le leaga o le koko i le Ofisa o Faatoaga, ma tagata faatau koko, mo tagata faipisinisi, ua tiga ona iloa e le asiasi koko e le lelei le koko a ua fai la laua faiga ma le tagata e ana le pisinisi, ma aumai ai koko leaga e tauvatea ai Samoa, o lea la ia fai ai se fuafuaga ina ia mafai ai ona foi le koko a Samoa i le mea e masani ai, masalo na o Savaii o lea e lelei le koko, ao Upolu atoa ua tofua le tagata ma lana faiga e fai ai koko, o lea la o le a tauau lava ina le aoga a ia fai se faiga a le Malo e aoga ai le koko. O le mea moni lava a toe foi le koko a Samoa i lona tulaga lelei ma ia faamautuina ai se tulafono lelei mo le koko, po o se Komiti foi e pei ona taua e nisi tootoo sei latou taofia a le amio piopio lea ua fai i totonu o le au fai koko atoa ma e faatauina koko.

O le Mamalu o lenei Fono, e toatele le au fai faatoaga ma ole mea lea ou te lagona e fai foi lau faatoaga, ua tauau nei ina le teuina, o lea o le a malaia ai fatasi le tagata faamaoni ma le tagata le faamaoni, ia malie le Malo e tataua ona fai se fuafuaga aemaise foi lenei Fono mamalu, ina ia alualu lelei lenei tamaoaiga mo le atiina a'e o le atunuu ma lona Malo. Ou te tautala foi agai i le au faigaluega mai fafo, aua e moni lava o lea foi sa faaalia e nisi tootoo, o Ofisa uma lava e toatele e o mai mai fafo, e moni lava o e maoae, ae faamolemole le mamalu o le Malo ma lenei Fono, sei tau faaoga nai tatou fanau na ave i o sei tau galulue pea sei faataitai, e le mafai lava ona maua se mea lelei pe a le galua na te iloa fai se mea pe a galua, masani iinei, ao le vaega lea e fou mai ia lenei faatoa oo mai o lea lava e faalogologo, o lea la sei faaoga a tatou fanau, na o i o. Ou te tautala agai i le Ofisa o le Falema'i, ona o lea o lo o faaali mai o le atugalua a le alii Minisita mo le pau ifo o le atiina a'e o Samoa, a o le Ofisa lea, o lea ou te vaai i ai e mautu toatle naunau le au faigaluega e alu ai tupe a le Malo, au faigaluega ta'ofu, e tataua i le Malo ona fai se fale ta'ofu, ana alu i ai nei tupe e totogi ai nei tagata e taina nei ofu, ua lava lava ona lava se fale o ta ai ofu ma suisui, ma ua tele foi le au gaosi mea taumafa, o le mea lea ou te iloa e laitiiti le tupe o lo o maua a fanau o lo o tigaina i le tausiga o gasegase, a e tele le tupe ua totogi i tagata ia, tagai foi i le puputa o le au fai mea'ai, ua latou fai uma mea lelei a e ave mea faale lelei i fanau o lo o tigaina i le faiga o galuega ma le tausiga o e puapuatia, o lea la ou te fautua atu ai. Ua uma le taimi a e tele mafaufauga e fia fesoasoani atu ai i lenei mataupu, e faamoemoe i le Atua ina ia fesoasoani atu i le alii Palemia mo Tulafono uma ma fuafuaga taua tatou faamoemoe i le Atua e pei o le Faavae o le Malo, Faavae i le Atua Samoa.